



Barnoota Afaan Oromoo

Kitaaba Barataa



Kutaa 9

Barnoota Afaan Oromoo

Kitaba Barataa

Ministeera Barumsaa Bara 2005



Rippaabiliika Dimookiraatawaa Fedaraalawaa Itiyoophiyaatti
Ministeera Barnootaa


ISBN: 978-99944-2-277-7

Gatiin: Qar. 22.90



Rippaabiliika Dimookiraatawaa Fedaraalawaa Itiyoophiyaatti
Ministeera Barnootaa

Kutaa 9



KITAABA KANAAF KUNUUNSA CIMAA TAASISI

Kitaabni barataa kun qabeenya mana barumsaa keetiti. Qabeenyi mana barumsaa kee ammoo, kan keeti. Qabeenyi kun akka hinbanne ykn hinmiidhamne kunuunsuun gahee keeti. Kanaafis, yaadoleen kurnan armaan gadii si gargaaru.

1. Kitaabicha gaazexaa, waraqaa, laastikaafi wkf gonfi.
2. Kitaabicha yeruma hunda bakka qooraafi qulqullina qabu kaa'i.
3. Yeroo fayyadamtus harki kee qulqulluu ta'uu mirkaneeffadhu.
4. Qolas ta'e keessa kitaabichaatti hinbarreessin.
5. Dubbistee bakka geesse mirkaneeffachuu yoo feetellee, cittuu waraqaa ykn kaardii qulqullina qabuutti fayyadami.
6. Fuula kitaabichaa tarsaasuun ykn fakkii kutanii keessaa baasuun dhorkaadha.
7. Fuulli tarsa'ellee yoo jiraate suphi.
8. Kitaabicha yeroo korojoo kee keessa keessuufi keessaa baafu, akka hintarsaane of eeggadhu.
9. Yeroo namoota biraatiif ergiftullee of eeggannoon akka qaban akeekkachisi.
10. Kitaaba haaraatti gargaaramuu yoo jalqabdu, dugda isaa minjaala irraatti dubbisturra kaa'i. Sana booda, fuula muraasa banuun xiqqoodhuma hanga barreeffama fuulicharra jiru dubbisuu dandeessutti banuun gargaarami. Fuula bante garmalee harkisuun qola isaas ta'ee, fuula kitaabichaa miidhuu waan danda'uuf, akka ija keetti eeggadhu.



Barnoota Afaan Oromoo

Kitaaba Barataa

Kutaa 9

Qopheessitoonni

Salamoon Gadaa (MA)
Tashoomaa Taaffasaa (MA)
Tasfaayee Jimaa (MA)

Gulaaltonni

Addunyaa Barkeessaa (MA)
Alaamirroo Kaasaahuun (MA)
Taarreqeny Mokonnon (MA)
Tashoomaa Egeree (MA)

Madaaltonni

Guutaa Fayyisaa (MA)
Hasan Waaqayyoo (BA)
Nagaasaa Hundee (MA)
Nuuriyaa Ibraahim (MA)



Galata

Qopheessi, maxxansiifi raabsiin kitaaba barataafi qajeelcha barsiisaa kanaa fandii dhaabbiilee qulqullina barnootaa 1-12, manneen barnoota mootummaa keessatti kennamanirratti hojjetan, kanneen akka Fooyyessa Qulqullina Barnoota Waliigalaa (QBW) irraa argameeni.

Federaalli Riippaabiliika Diimokiraatawaa Itoophiyaa Fooyyessa Qulqullina Barnoota Waliigalaatiif qarshii liqaan Waldaa Guddina Internaashinaalaa (WGI), Fandii Faasti Inisheetiivii Kaataalikii (FFIK)fi kanneen guddinarratti hojjetan biroo-Kooporeeshiinii Guddina Fiinlaandii, Xaaliyaanii, Deggersa NiizarlaandiifiUK kan Muummee Guddina Internaashinaalaatiif dhaabbatan irraa argateen kitaabni barataafi qajeelchi barsiisaa kun akka qophaa'u taasisse. Kanaafuu, Ministeerri Barnootaa Itoophiyaa namoota, gareewaniifi qaamolee qophii kitaaba barataafi qajeelcha barsiisaa kanarratti kallattiinis ta'ee alkallattiin hirmaachuun deggersa taasisan nigalateeffata.

© Federaala Riippaabiliika Diimokiraatawaa Itoophiyaatti Ministeera Barnootaa
Maxxansa jalqabaa- 2005/2012

Mirgi abbeentaa gama suurawwaniifi fakkiiwwanii, dokimentootaafi meeshaalee kanneen biroo odeeffannoofi ragaalee isaan of keessaa qaban waliin Ministeera Barnootaa Itoophiyaatiif kan dhiyaate yoo ta'u, mirgichis waggoota shaniif hojiirra oola.

Qopheessaa, Maxxansaafi Raabsaa

Dhaabbata Maxxansaa MK
L.S.P. 12385 Kaampaalaa
L.bil. +256 414-269150
Toora intarneetii www.mkpublisher.com
Kaampaalaa-Yugaandaa
ISBN 978-99944-2-277-7

Mirgi hunduu seeraan eeggamaadha. Hayyama barreeffamaan abbaa mirgaarraa kennamuun ala, gamisa ta'ee guutummaa kitaaba kanaa irraa hir'isuun, itti dabaluu, gamisaan ykn guutummaatti maxxansiisuun, waraabanii raabsuun dhimma dhuunfaafis ta'ee hawaasaaf oolchuun dhorkaadha. Kanaafuu, hayyamni seeraan osoo hinkennamin gochaawwan kanarratti bobba'uun seeraan nama gaafachiisa. Labsii Gaazexaa Nagaariita Federaalaa lak.410/2004, Labsii Ittisa Mirga Abbentaafi Kanneen Isaan Hidhata qaban, Waggaa 10ffaa, Lak.55, Finfinnee, Adoolessa 12, 19996(July 19, 2004).

Daangaa Mirga Abbeentaa

Hanga danda'ametti, mirgi abbeentaa meeshaalee kitaaba kana keessatti dhimma itti ba'amanii heeruu yaallee jirra. Kanneen osoo itti hinyaadamin bira darbamaniif ammoo dhiifama jechaa, maxxansa itti aanu kamiinuu keessatti galateeffachuuf qophaa'oodha.

BAAFATA

Mata duree	Fuula
Seensa:	iv
Boqonnaa 1: Afaaniifi Faayidaa Isaa	1
Boqonnaa 2: Addooyyee	13
Boqonnaa 3: Meeshaalee Walqunnamtii Ammayyaa	23
Boqonnaa 4: Barnootaafi Misooma.....	31
Boqonnaa 5: Faalama Qilleensaa	41
Boqonnaa 6: Nageenya Karaa	51
Boqonnaa 7: Jeneraal Taaddasaa Birruu	63
Boqonnaa 8: Sirna Nyaataa	75
Boqonnaa 9: Miidhaa Ilbiisoonni Qaama Beeyladaarratti Fidan.....	83
Boqonnaa 10: Dhiibbaa Eedsiin Misoomarratti Fidu	95
Boqonnaa 11: Ispoortii Aadaa.....	107
Boqonnaa 12: Fardaan Gulufuu.....	115
Boqonnaa 13: Aramaafi Dhukkuba	125
Boqonnaa 14: Biliilee/ Mahibuubaa	131
Boqonnaa 15: Looga Afaan Oromoo	143
Boqonnaa 16: Yeroo Yeroon Qabi	153
Boqonnaa 17: Garaa Walitti Nahe	161
Boqonnaa 18: Xalayaa Barreessuu	173

SEENSA

Afaan meeshaa wal-qunnantiifi ibsituu eenyummaa ta'uun shoorri inni jiruufi jireenya hawaasa tokkoo keessatti qabu ol aanaadha. Kanaafuu, hawaasicharraa addaan ba'ee bu'aa buusuu hindanda'u. Guddinni afaaniis guddina hawaasaa bu'uureffata. Jiruufi jireenya hawaasaa saayinsiifi teeknooloojiin wal-qabsiisee guddina fiduu kan danda'us barnoota, bulchiisa, siyaasaafi kkf yoo hojiirra oole qofa.

Afaan Oromoo afaan barnootaafi barnoota afaanii ta'uun isaa dhiyoodha. Kanarraan kan ka'e, kitaabni barataa armaan dura bu'uura buusuurratti shoora ol aanaa kan taphate ta'ullee, hanqinoota tokko tokko akka qabu hubatameera. Kitaabni kun ammoo, amma danda'ametti qulqullinni isaa eegamuun kan qophaa'e yoo ta'u, kaayyoon isaas barattoonni ogummaawwan dhaggeeffachuu, dubbachuu, dubbisuu, barreessuu, caaslugaa, ogbarruu, gadi fageenyaan xiinxaluufi kkf akka gabbifatan taasisuudha. Kaayyoowwan kana galmaan ga'uufis barannoowwaniifi gilgaalonni garaagaraa dhiyaatanii jiru. Haalli dhiyeenya gilgaalota kanaas kallattiidhaan jiruufi jireenya guyyuu barattoota giddu-galeessa kan taasifateefi akka isaan dammaqinaan irratti hirmaatan kan kakaasudha.

Fiixaan ba'iinsa kaayyoowwan barnoota kanaatiifis adda dureen shaakala walirra hincinne gochuu kan qabu barataa waan ta'eef, atis haala qabatamaa naannoo keetiitiin waliin qabsiisuun ga'ee sirra eegamu taphachuun mirgaafi dirqama keeti.

Boqonnaa 1: Afaaniifi Faayidaa Isaa

Kaayyoo: Barnoota boqonnaa kanaatiin booda:

- maalummaafi faayidaa afaanii himta.
- hiika jechootaa akkaataa galumsaatiin kennita.
- gosoota afoolaa keessaa yaada mammaaksaa addaan baafatta.
- Yaada dhiyaate qindeessitee barreessita.

Barannoo 1: Dhaggeeffachuufi Dubbachuu



Gilgaala 1:

Shaakala Dhaggeeffachuun Duraa

- A.** Gaaffiwwan armaan gadii barreeffama barsiisaan keessan isiniif dubbisu dhaggeeffachuun dura gareen irratti mari'adhaa.
1. Jiruufi jireenya kee keessatti yaada kee maaliin ibsatta?
 2. Amaloota afaanii karaa kamfaa beekta?
- B.** Jechoonni armaan gadii dhaggeeffanna keessatti gufuu akka sitti hintaaneef hiika isaanii tilmaami.
1. seera
 2. hawaasummaa
 3. maayii



Gilgaala 2:

Shaakala Yeroo Dhaggeeffachuu

Barsiisaan kee barreeffama “Amaloota Afaanii” jedhu siif dubbisa. Ati ammoo dhaggeeffachaa bakka duwwaa guuti.

1. Afaan meeshaalee walqunnamtii dhalli namaa _____ kanarratti maayii itti bahu.
2. _____ kunniin hundi isaanii dubbataa mataa ofii qabu.

3. Isaan keessaas:

_____ fi _____ kanneen jedhaman kun amaloota afaanii keessaa isaan gurguddoodha.

4. Afaan hunduu _____ yoo jennu, afaan kamiyyuu hanga _____ meeshaa walqunnamtii ta'ee, dhimma kanaaf ooletti afaan kamiyyuu walqixa.

5. Osoo _____ jiruu afaan du'uu danda'a.

6. _____ , afaan hunduu seera mataa isaa qaba yoo jennu afaan saba kamiyyuu haala barreefamaafi haali dubbi mataa ofii qabaachuu mul'isa.

7. Walumaagalatti, hundi _____ mataa isaaniifi hidhata cimaa _____ hawaasa isaanii waliin dubbatu wajjin qabu.



Gilgaala 3:

Shaakala Dhaggeeffachuun Boodaa

Gaaffiwwan armaan gadii akkaataa gaafatamteen deebii kee afaaniin kenni.

1. Yaanni ijoon mata duree siif dubbifamee maali?
2. Afaan tokko guddatee tajaajila bal'aa akka kennuuf, maal ta'uu isa barbaachisa?
3. Amaloota afaanii dhaggeeffatterratti hundaa'uun, amaloota afaan oromoo maal jetta?
4. Jiruufi jireenya ilma namaa keessatti afaan gahee akkamii qaba?
5. Tokkummaafi garaagarummaa afaanonni gama amala isaaniitiin qaban adda baasuun himi.

Barannoo 2: Dubbisuufi Dubbachuu



Gilgaala 4:

Shaakala Dubbisuun Duraa

- A.** Dubbisa armaan gaditti siif dhiyaate dubbisuun dura gaaffiwwan kanaan gadii gareen irratti mari'achuun afaaniin dareef gabaasi.
1. Namni tokko jireenya isaa keessatti ollaa isaatiin walqunnamtii uumuuf wantoota gargaaran tarreessi.
 2. Afaan dhala namaatiif tajaajila maali kenna?
- B.** Jechoota armaan gadii osoo dubbisuu hinegalin dura, hiika isaanii tilmaami.
- a. daran
 - b. moggaasuu
 - c. badaa



Gilgaala 5:

Shaakala Yeroo Dubbisuu

- A.** Dubbisa armaan gadii ariitiidhaan/saffisaan dubbisuun gaaffiwwan armaan gadii deebisi.
1. Dubbisni kun keeyyata meeqa qaba?
 2. Keeyyanni waa'ee guddina afaanii ilaalchisee muuxannoo biyya keenya ibsu isa kami?
 3. Gaarummaan afheddummaa biyya tokkoo keeyyata isa kam keessatti ibsame?
 4. Saba tokko saba biraarraa irra caalaa wanti adda godhu afaan akka ta'e keeyyata kam keessatti bal'inaan ibsame?

Afaaniifi Faayidaa Isaa

Afaan meeshaa ilmaan namaa ittiin waliigalan keessaa isa guddaafi faayidaa hedduus kan qabu. Fakkeenyaaf, ulaagaalee sabni tokko ittiin beekamu keessaa inni guddaan afaan isaati. Kana jechuun, sabni tokko, saba kana jennee saba birarraa addaan baasuuf kan nu gargaaru yeroo baay'ee afaan inni dubbatu. Kanamalees, afaan aadaa saba isaa nibaata, darbees ni'ibsas. Faayidaa guddaan afaanii inni biraa namoonni guyyaa guyyaatti jiruufi jireenya isaanii gaggeessuufi fooyyeessuu akka danda'anii, barbaadan, tajaajila walqunnamtii kennudha. Namni tokko rakkina, gammachuu wkf akka fedhetti himachuuf kan gargaaru afaani. Akkasumas, fedhiifi jibba namoota biraa dhagahanii tarkaanfii barbaachisu fudhachuuf afaan tokkoo ol beekuun barbaachisaadha.

Guddinni afaan saba tokkoo guddina hawaasa isaa waliin deema. Kana jechuun, bal'inniifi dagaaginni afaan tokkoo guddina qabeenyaafi aadaa saba sanaa waliin walqabata jechuudha. Qabeenyiifi aadaan saba tokkoo yoo guddachaa deeme, isaan dabalaman kana moggaasuun barbaachisaa ta'a. Kun ammoo, guddina afaan saba sanaatiif karaa bana. Kanaafi guddinni hawaasaafi afaanii walqunnamtii qaba kan jedhamuufis.

Akka ilaalcha yeroo ammaatti, baay'inni afaan biyya tokko keessa jiranii akka rakkootti osoo hintaane, akka bu'aatti ilaallama. Akka ilaalcha kanaatti, afaan adda addaa walbira yoo guddatan, guddinni tokko guddina isaan biroo nicaala; muuxannoon isa tokkorraa argamu, guddina isaan kaaniif nigargaara. Kana malees, afaanota biyya tokkoo kabajuufi guddina isaanii gara hundaan gargaaruun, lammii biyya tokkoo kabajuudha; guddisuudhas.

Yeroo tokko tokko garuu, haalli dhugaa kana faallessu ni mudata. Akkuma seenaa biyya keenyaafi biyya biraarraa hubannu, adeemsi siyaasaa kun afaan saba tokkoo qofti akka guddatuufi beekamu, kan saboota biraammoo akka qancaruufti ukkaamamu yeroo taasisu agarra. Akkuma beekamu afaan tokko haala gaariin guddachuu kan danda’u dubbatamuu qofaan osoo hintaane, afaan barumsaafi afaan hojiin mootummaa ittiin gaggeeffamu akkasumas afaan barreeffamaa yoo ta’edha. Afaan hiree kana dhabe, ‘niguddata’ jedhanii eeguun gowwummaadha. Kun kan agarsiisu, guddina Afaan tokkoof guddina hawaasaatiif siyaasi qooda guddaa qabaachuu isaati.

Walumaagalatti, afaan mallattoolee eenyummaafi meeshaalee walquunnamtii sabni tokko qabu keessaa isa guddaadha. Afaan akkuma aadaa kaanii, guddina hawaasaa waliin deema. Kana malees, afaan tokko akka fedhii saba isaa guututti guddachuuf, sabichaan dubbatamuu qofa osoo hintaane afaan barumsiifi hojiin mootummaa ittiin geggeeffamu akkasumas, afaan barreeffamaa ta’uu qaba. Kan afaan tokko guddachuu danda’us yoo akkas ta’eedha.

B. Gaaffiwwan armaan gadii dubbisicharratti hundaa’uun barreeffaman suuta dubbisuun deebisaa.

1. Ergaan waliigalaa keeyyata 3^{ffaa} dubbisichaa maali?
2. Gaaleen ‘kun immoo’ jedhu keeyyata 2^{ffaa} keessatti maal ibsa?
3. Afaan mallattoolee eenyummaafi meeshaalee walquunnamtii sabni tokko qabu keessaa isa guddaadha yoo jennu maal jechuu keenya?
4. Ergaan waliigala dubbisa kanaa maali?

C. Jechoota armaan gadii haala galumsa isaaniitiin himoota itti aanan sirritti akka xumuraniitti filadhu. Jecha tokko si'a tokkoo ol hinfayyдамиин. Bifa jechoota tokko tokkoo geeddaruun nidanda'ama.

muuxannoo	fedhii	tattaaffii	kabajuu
ulaagaalee	tooftaa	fooyyessuu	abaaruu
moggaasuu	lalise		

1. Rakkoolee jiruufi jireenya keessatti nu mudatan _____ adda addaatiin jala darbuun nu barbaachisa.
2. Halkaniifi guyyaa _____ malee, rakkina nu mudate kana keessaa bahuu hindandeenyu.
3. Abbaan kiyya barnoota idilee hinqabu; haata'u malee, _____ jireenyi hedduu isa barsiise.
4. Aadaa Oromoo keessatti Hammachiifni ayyaana daa'ima maqaa ittin _____.
5. Midhaan baranaa rooba gahaa waan argateef, baay'ee _____
6. Dandeettii Afaan Oromoo kee _____ kitaabolee kamfaa dubbiste?
7. Ati waan namaa hinfuudhiin malee, _____ wayiituu si hingahuu, hinsodaatin.
8. Yeroo ammaa naannoo keenyatti Koolleejjii Barsiisotaa galuuf _____ barbaachisan keessaa tokko Afaan Oromoo sirriitti dubbachuu, dubbisuufi barreessuudha.
9. Nama tokko _____ isaa malee halkaniifi guyyaa yoo hojjechiisan, yeroo baay'ee bu'aa hinqabu.
10. Namoota umriin isaanii kan keenyaa olii _____ aaduma keenya.

**Gilgaala 6:****Shaakala Dubbisuun Boodaa**

Gaaffiwwan armaan gadii hubannoo dubbisarraa argatteefi muuxannoo kee walitti fiduun deebisi

1. Yaadaa “osoo uummanni jiruu afaan du’uu nidanda’a,” jedhu fakkeenya kennuun ibsi.
2. Afaan tokko guddate kan jedhamu yoo maal ta’e?.
3. Afaan tokko guddatee tajaajila bal’aa akka kennuuf, maal ta’uu isa barbaachisa?
4. Faayidaan Afaan Oromoo kennaa jiru maal maali? Faayidaan kun daran akka cimu gaheen kee maali?
5. Walitti dhufeenyi dagaagina afaaniifi guddina hawaasaa gidduu jiru maali?

Barannoo 3: Afoolaa**Gilgaala 7:****Shaakala maalummaafi gosaa afoolaa**

Gaaffiwwan armaan gadii akkaataa gaafatamteen deebii kee afaaniin kenni.

1. Dhalli namaa dandeettii barreeffamaa osoo hingonfatiin dura maaliin waliigalaa ture?
2. Afoola Oromoo keessaa kam beekta?
3. Afoola Oromoo keessaa kan jaarsolii malee daa’imman yeroo baay’ee dhimma ittiin hinbaane isa kami?

**Gilgaala 8:****Shaakala Mammaaksaa**

A. Mammaaksa armaan gadiitti kennaman keessaa, kan hiikaan ykn yaadaan mammaaksa kennamee fakkaatu filadhu.

1. Fagaatuyyuu mana ofii, hammaatuyyuu fira ofii wayya.
 - (a) Wanti ofii gaarii ta’uu
 - (b) Ofittummaan dhimmaan barbaachisaa ta’uu.

- (c) Naanna'aa oolee galgala mana keenyatti galla.
- (d) Manni fagoos ta'uu, suuta deemuu qabna.
2. Manaa baala, alaa gaala.
- (a) Mana ofiitti kabajamuu namootaa.
- (b) Namoonni humnaa ol hiixachuun alatti of mul'isanii manni isaanii duwwaa ta'uu isaa
- (c) Namichi alaa kabajaa guddaa qabu, manatti maatii isaatin kabaja dhabuu is
- (d) b fi c
3. Yoo manni namatti jige, biyyatu namarraa kaasa; yoo biyyi namatti jige, maaltu namarraa kaasa?
- (a) Namni humna qabu osoo uummanni bira hingahiin yoo manni itti jige, ofirraa kaasa.
- (b) Biyyi yoo birmachuu dide mootummaan keessa galuu qaba.
- (c) 'Biyyi sinjibbiin; lammiin sinjibbin; sabni sinjibbiin,' jechuudha.
- (d) Aangoo qabaannaan kan fedhee jigu ofirra kaasta.
4. Mariyatan malee, maraatanii mana hinbulchan
- (a) Loluun ykn oori'uun malee bultiin hinoo'itu.
- (b) Oo'een hinjiru taanan manni nagaa hinargatu.
- (c) Nama rakkate wajjiin haasawa baay'isuun yeroo fixuudha
- (d) Uummata mari'achiisurra ofiif murteessuu wayya.
5. Mana ofii haxaawwatanii, mana ormaa haxaa'u.
- (a) "Ofirra sinjaaladhu; ormaan sinqixxeessu".
- (b) Haati ormaa osoo qaanqee ofiirraa hinfuune daa'imarraa fuuti.
- (c) Ofii ciisan, namaa siqan.

B. Ergaa mammaaksota armaan gadii jecha mataa keetiin erga ibsitee booda, kan hiriyoota keetii wal bira qabii madaali.

1. Badiin biyya wajjinii godaansa.
2. Eeboo darbatanii jinfuu hinqabatani.
3. Adaamii ollaa hagamsaa, imimmaan irraa hinqooru.
4. Abbaa gaariin nama dhalchuu mannaa, ayyaana gaarii dhalachuu wayya.
5. Jaalalaan malee nageenyi, duumessaan malee roobni hinjiru.

C. Mammaaksa naannoo keetti mammaakamu shan hiika isaanii wajjiin barreessun daree keessatti hiriyoota kee wajjiin ergaa isaa irratti mari'adhaa.

1. _____
2. _____
3. _____
4. _____
5. _____

D. Yaada mammaaksota armaan gadii xumuruuf, filannoo kenname keessaa filadhu.

1. Beekkanneen yoo _____

A. dursanii tilmaamani	B. jalaa bahani
C. ofirraa faccisani	D. ofii beekkatani
2. Waraabessa darbee _____

A. sareen argite	B. sareen jalaa kaatte
C. sareen dutte	D. sareen olkaatte
3. Biddeenni Waaqaa _____

A. hindhumu	B. hincabu
C. furdaadha	D. bal'aadha
E. hunduu deebiidha	
4. Biiftuun abbuma ilaaleef _____

A. dhugaadha	B. gara bahaati
C. sirriidha	D. bahaa gara lixaati

5. Gafarsi osoo loon fakkaatu _____
 A. jaldeessa wajjin oola B. daggala gala
 C. nama tajaajila D. nama nyaata
6. Gadadoo _____
 A. yaadatu fixa B. sirbatu fixa
 C. kolfatu fixa D. jalaa jechuutu fixa
7. Gaddeemtuun harree _____
 A. harreedhaan daldalti B. harreedhaan qotti
 C. fardaan harree jijjiirti D. horsiisuuf fudhatti
8. Huuqqataan kan _____
 A. abbaati B. jabaatu
 C. of kunuunsu D. hojjetu
 E. yaadu
9. Ollaa hamaan _____
 A. lukkuu horsiisa B. buna nama waamu
 C. ijoolleetti dubbata D. saree horsiisa
 E. holaa horsiisa
10. Ajaathe jedhanii _____
 A. qayee ofii hingadhisani B. ollaatti gaman
 C. kophee ofii ala bulchan D. quba ofii hinmuran
 E. hunduu deebiidha

Yaadannoo Mammaaksa

Gooroowwan afoola sabni Oromoo bal'inaan dubbii gabaabsuun, mi'eessuuniifi miidhagsuuf itti fayyadamu keessaa tokko mammaaksa. Mammaaksi afoola(ogafaan) kamiyyuu caalaa jireenya uummatichaan kan walqabate.

Uummanni Oromoo mammaaksa isaatiin ragaa baha. Kanaafis, mammaaksota “dubbiin mammaaksa malee, ittoon soogidda malee” fi “Mammaaksi koobaa dubbiti,” jedhan ilaaluun gahaadha. Waan dhama qabu dubbachuufis yeroo barbaade “aaki jedhan waa tufan, mammaakan waa himan” jechuun iddoon hawaasichi mammaaksaaf

laatu cimaa ta'uu mul'isa.

Mammaaksi hawaasa Oromoo biratti waan hedduuf mammaakama. Fakkeenyaaf, qarutuma, tuffii, jaalala, hawwii, haqa, gootummaa, doqnummaa, jibbaafi kkf, agarsiisuuf nimammaakama. Ergaa mammaaksa tokkoo hubachuuf wantoonni adda addaa nama gargaaruu malu. Fakkeenyaaf, aadaa, seenaa, durdurii faa beekuu barbaachisaadha.

Barannoo 4: Barreessuu



Gilgaala 9: Shaakala keeyyata barreessuu

- A.** Fakkiwwan armaan gadiitti kennamanirratti hundaa'uun keeyyata tokko barreessuun agarsiisi.



A




B



C



D



E

B. Mata duree armaan gadii keessaa tokko filachuun keeyyata tokko barreessi.

1. Dhibee walquunnamtii saalaan darbun
2. Buna danfisuu
3. Bosona kunuunsuu

Yaadannoo

Ogummaa Keeyyata Barreessuu

Barreessuun dandeettii irra deddeebi’anii yoo shaakalan gonfatamuu danda’uudha. Kanaaf, namni keeyyata barreessu tokko, adeemsa hordofuu qabu beekuu qaba. Kunis, matadureerratti barreessinu filachuu, mataduree sakatta’uu yookiin wantoota achi keessa galchinu itti yaaduu, mataduree irratti barreessinu daangeffachuu; kunis hima ijoo murtaawaa ta’e tokko qabaachuu, akkasumas, qabxiwwan hima ijoo deeggaran lafa kaawwachuun murteessoodha. Yaadolee hima ijoo deeggaran tartiiban kaahuun barbaachisaadha.

Fakkeenyaaf,

Tamboo Xuuxuu

Akkaataa namoonni hedduun tamboo xuuxuu itti eegalan keessa inni tokko, dhiibbaa hiriyatiini. Dhiibbaan kun umrii dargaggummaa keessatti bal’inaan calaqqisa. Kaayyoon isaanii inni guddaan hiriyoota isaanii biratti jaalatamummafi fudhatamummaa argachuuf. Gareen kun jalqaba tamboo xuuxuuf ilaalchi qaban gaarii ta’uu dhiisuu danda’a. Garuu, adeemsa keessa hiriyoota fakkaachuuf gara xuuxuutti seenu. Egaa namoonni sababoota garaagaraatiin tamboo xuuxuu baranis booda keessaa bahuun rakkisaa waan ta’uuf sadarkaa kana osoo hingahin irra deebi’uun gaariidha.

Boqonnaa 2: Addooyee

Kaayyoo: Barnoota boqonnaa kanaatiin booda:

- fakkii ilaaluun ergaa isaa niqayyabatta.
- maalummaa addooyee nihimta.
- hiika jechootaafi gaaleewwanii adda baafatta
- jechootarraa birsaga baasta.
- maalummaa jechoota tishoofi akkaataa jechoonni tishoon itti ijaaraman ni'ibsita; jechoota tishoos ni'ijaarta.
- walitti dhufeenya namoota naannoo keetii nibarreessita.

Barannoo 1: Dhaggeeffachuufi Dubbachuu



Gilgaala 1:

Shaakala Dhaggeeffachuun Duraa

- A.** Barreeffama barsiisaan isiniif dubbisu dhaggeeffachuu osoo hineegalin, gaaffiiwwan armaan gadii gareen irratti mari'adhaa.
1. Ati hiriya qabdaa? Hiriyaan kee/tee maal hojjeta/tti?
 2. Ati fira qabdaa?
 3. Tokkummaafi garaagarummaan hiriyummaafi firummaa gidduu jiru maali?
 4. Hiriya kee/tee ni'amantaa? Maaliif?
- B.** Jechoota armaan gadii, osoo gara dhaggeeffachuutti hinseeniin dura, hiika isaanii tilmaami.
- (a) sansaka (b) miliquu
- (c) adabbii

**Gilgaala 2:****Shaakala Yeroo Dhaggeeffachuu**

Barreeffama barsiisaan kee siif dubbisu dhaggeeffachaa iddoo duwwaa guuti. Sana booda deebii keessan gareen walii mirkaneessaa.

1. Jiruufi jireenya ilma namaa keessatti walqunnamuun, yaada waljijjiiruun, _____tattaafachuun hojii guyyaa guyyaan hojjetamaa oolu.
2. Manneen barnootaa keessatti barataafi baartaan, _____, hojjetaafi hoojjetaan wanta waliin dabarsan hedduudha.
3. Qabxii argachuuf ykn adabbii jalaa bahuuf _____ itti miliqan barbaadu.
4. _____, darbee barattoonni baay'een walitti dhufeenya gaarii barsiisota isaanii waliin qabu.
5. _____, amanamummaan sammuu bilisa ta'e horachuuf gahee addaa qaba.
6. Kanneen armaan olitti ka'aniin alattis _____ lammii biyyaaf yaadu horachuuf bakka ol'aanaa qaba.

**Gilgaala 3:****Shaakala Dhaggeeffachuun Boodaa**

Gaaffiwwan armaan gadii mata duree dhaggeeffaterratti hundaa'uun barreeffamaan erga deebistee booda, gareen irratti mari'adhaa.

1. Ergaan waliigalaa barreeffama dhaggeeffattee maali?
2. Hiryummaan maali? Amanamummaan hoo?
3. Hiriyooni kee hunduu amanamoodhaa?Maaliif?
4. Namoonni hiriya walgodhachuuf ulaagaan beekamuu qabu jiraa? Fakkeenya kennuun ibsi.
5. Hiryummaan saalaan kan murtaa'uu?



Barannoo 2: Dubbisuufi Dubbachuu



Gilgaala 4:

Shaakala Dubbisuun Duraa

- A.** Gaaffiwwan armaan gadii, osoo gara dubbisuutti hinseenin dura, fakkii armaan olii ilaaluun gareen irratti mari'adhaa.
1. Shamarran fakkii kanarratti argitan kunniin maal gochaa jiru?
 2. Shamarran kunniin hiriyoota moo fira fakkaatu?
 3. Hiriyyaa qabaachuun faayidaan isaa maali?
 4. Naannoo keetti addooyeen lamaan maal waliigodhu?
- B.** Jechoota armaan gadii gara dubbisuutti osoo hinseeniin, hiika isaanii tilmaami.
- (a) ulaagaa (b) waadaa



Gilgaala 5:

Shaakala Yeroo Dubbisuu

A. Barreeffama armaan gadii saffisaan dubbisuun, gaaffiiwwan armaan gadii deebisi.

1. Yaanni waliigalaa dubbisa kanaa maali?
2. Dubbisni kun keeyyata meeqa qaba?
3. Keeyyanni waa'ee gaa'ilaaw odeessuu keeyyata meeqaffaadha?
4. Akkaataa kakuun itti adeemsifamu keeyyata meeqaffaa keessatti ibsame?

Addooyee

Dhalli namaa erga gara addunyaa kanaa dhufee jiruufi jireenya eegalee, karaa adda addaatiin walqunnama. Walquunnamtii kana keessaas waljaalachuun, walitti firoomuun akkuma jiru waljibbuunis, walirraa baqachuunis nijra. Namoonni wal fakkeenya saalaatiin, umriitin, sadarkaa barnootaatiin, naannoon, sabummaan, hojiifi kkfniin walitti dhufuun hiriyoumuu yookiin firoomuu danda'u. Haalli kunis walitti dhufeenyi namootaa sadarkaa adda addaa akka qabaatu taasisa. Kanaafuu, nama hundatti firoomuun ykn hiriyoumuun hindanda'amu. Hiriya baafachuun namarraa gara namatti adda ta'uu danda'a. Kunis hunduu ulaagaa mataa ofii qaba waan ta'eefi. Namni hundi ulaagaawwan isaa keessatti nama yaadaafi amalaan waliigalan caalatti filatu.

Uummata Oromoo biratti hiriyummaan aadaa kabaja guddaa qabu. Keessumaayyuu addooyeen shamarran Oromoo biratti haalaan beekamaadha. Kunis kan shamarran Oromoo jaalala dhugaa, kabajaafi maalummaa hiriyummaa ittiin agarsiisani. Kanaafuu, addooyeen kan dubri umriifi naannoo jireenyatiin walitti dhiyaatan hanga waliin jiranitti waljaalachuufi walii dhaabbachuuf waadaa waliigalani. Waadaan waliigalan kuni kakuu hiriyummaa isaanii cimsu ta'a.

Haalli kakuun kun itti raawwatus seera mataa isaa qaba. Dura jarri lamaan quba moggee walqabatani akkana jechuun kakatu:

A. Addooyyee Addooyyee B. Oo koo!

A. Yoon lammata maqaa kee dhaye maqaa koo duuti haa dhooftu.

B. Koollee duuti haadhooftu.

Kakuu kaan booda hiriyoonna lamaan addooyyee waliin jedhu malee maqaan walhinwaaman. Naannoo tokko tokkotti ammoo, hiriyoonna lamaan maqaa biroo walii moggaasuun walwaamu. Fakkeenyaaf, Arsiitti kumuudee, Hanguggee, Bilillee faa walii moggaasuun walwaamu. Waadaa waliigalan kana eeguuf jecha dubara moggoo taatellee maqaa ishiitiin hinwaaman.

Addooyyee lamaan yeroo gammachuus ta'ee gaddaa walbira dhaabbatu. Yeroo boqonnaa isaanii guyyaa Sanbata Guddaa waliin dabarsuun, dhimma qaban hundarratti waliin mari'atu. Dhimmi gaa'ila raawwachuu yoo isaaniif dhiyaate, waa'ee gurbaa isaan ilaallatee iyyaafatanii irratti mari'atu. Mariin qotee bulaa ta'u isaa, amala bayeessa qabaachuu isaa, harkaqaalleessa ta'uu isaa, dureessa/sooressa ta'u isaarratti ta'uu mala. Haaluma kanaan ulaagaa kaadhimummaa guutuufi guutuu dhabuu isaa mirkaneessu. Kana malees, gammachuu warra isaaniirratti waliin hirmaatu. Fakkeenyaaf, yoo warri isaanii sirna adda addaa godhatan nuffii tokko malee walgargaaru. Haaluma kanaan gaafa rakkoos wal-irraa hinbaqatan.

Hunda caalaa ammoo cidha waliirraa hinhafan. Qophii cidha wliirratti hirmaatu. Addooyyeen heerumaaf qophooftu maal gochuu akka qabdu gorsu, akka ishiin haala gaariin mana horattu yaadaan gargaaru. Kana malees, kan misirroon fudhattee heerumtu dhaleefi dhangaa adda addaa qopheessanii mi'a manaafi uffata bitaanii walii gumaachu. Bakka tokko tokkotti ammoo, heexoo dubarri

heerumaaf kaatu dhugdu waliin dhugu; sirba cidhaa jala bultii waliin sirbu. Dhumarratti, gaafa heerumaa baye-bayee fi taritaarii baafachuun booyanii fira boochisu. Walumaagalatti, addooyeen haala shamarran jireenya keessatti gaddaafi gammachuu irratti waliin dhaabbatanialala waliif qaban ittiin ibsatani.

B. Gaaffiwwan armaan gadii erga barreeffama armaan gadii gadi-fa-geenyaan dubbistee booda, deebisi. Deebii keessan gareen irratti mari'adhaa.

1. Addooyeen maali? Maaliif barbaachise?
2. Keeyyanni 2^{ffaan} waa'ee maali ibsa?
3. Keeyyata 6^{ffaa} bo'oo 1^{ffaa} irratti gaaleen "hunda caalaa" jedhu maal ibsuufi?
4. Haalli kakuun itti raawwatamu seera mataasaa qaba jechuun, maal jechuudha?
5. sababni addooyeen lameen maqaa isaanitiin wal-hinwaamne maali?
6. Addooyeen lameen yeroo akkamii wal-bira dhaabbatu? Akkamitti?
7. Addooyee lameen maal jechuun walii kakatu? Maaliif kakatu?

C. Akkaataa odeeffannoo barreeffama armaan gadii keessatti laatameen, himoota armaan gadii dhugaa yookiin soba jechuun sababa waliin deebisi.

1. Akka aadaa Oromootti addooyeen shamarran qofaaf hayyamama.
2. Namni jiraachuuf, hiriya isa barbaachisa.
3. Naannoodhaa naannootti addooyeen garagara.
4. Addooyeen lamaan guyyaa rakkoo qofa walbira dhaabbatu.
5. Hiriyyummaan tasa kan uumamu waan ta'eef wal-biraa yeroo deeman ni'irraanfata.

D. Jechoota gaaleewwan roga 'A' jalaa, kan barreeffamicha keessaa bahaniif, hiika galumsaa isaanii roga 'B' jalatti laatamaniin waliitti firoomsi.

A.

1. gumaachuu
2. nuffuu
3. iyyaafachuu
4. walbira dhaabbachuu
5. dhalee
6. baye-bayee
7. Moggoo
8. kakachuu
9. addooyee
10. fira

B.

- a dhalataa/ aantee
- b kennuu/ arjoomuu
- c odeeffannoo argachuuf gaaffii dhiyeessuu
- d dadhabuu/ rifachuu
- e. booyicha dubarri gaafa heerumaa boochu
- f. "Hinargine" yookiin' hindhageenye"
jechuun dhugaa bahu.
- g. Hiriyyummaa shamarran lama gidduutti taasifamu
- h. wal-gargaaruu
- i. waadaa galuu
- j. maqaa wal-fakkaatu qabaachuu.
- k. gammachuu
- l. galaa



Gilgaala 6:

Shaakala Dubbisa Boodaa

Gaaffiiwwan armaan gadii haala naannoo keessaniitin walqabsiisuun gareen irratti mari'adhaa.

1. Shamarran qofa moo, dhiirris addooyee walgodhatu? Eeyyee yoo jettee akkamitti? Lakkii yoo jette maaliif?
2. Naannoo keessanitti addooyeen maal jedhamuun beekama?
3. Hiriyooni naannoo keetii yeroo addooyee waliif ta'an, maal walii-moggaasu? Maal jechuun wal-waamu?
4. Naannoo keetti addooyee lamaan yoo hiriya waliif ta'an akkam jedhanii kakatu?
5. Weedduu cidhaa "addooyee" ilaalchisee naannoo keessanitti weeddifamu daree keesatti waliif weeddisaa.
6. Addooyee ilaalchisee qabxiwwan biroo maal faa hiriyoota keetti himuu dandeessa?

Barannoo 3: Caasluga



Gilgaala 7:

Shaakala Caasluga

Yaadannoo: Sagaleeleen walitti dhufanii birsaga uumu; birsagoonni ammoo walitti dhufuun jecha uumu. Birsaga jechuun qaama jechaa ta'ee, kan dubbachiistuu qofaan ykn walta'iinsa dubbifamaafi dubbachiistuun uumamu. Jechoonniis seera caaseffama afaanichaa eeguun walitti dhufanii gaalee, ciroo ykn hima uumu.

A. Gaaffiwwan armaan gadii gareen irratti mari'adhaa.

1. Sagaleewwan walitti dhufanii maal uumu?
2. Birsagoonni lamaafi lamaa ol walitti dhufuun maal uumu?
3. Jechoonni lama yookiin lamaa ol ta'anii jecha adda ta'e tokko yoo uuman, jecha sanaan maal jennaan?
4. Jechoonni jecha tishoo/diigala uuman kun garee jechoota akkamirraa ijaaramuu danda'u?

B. Dubbisa armaan olitti dubbiste keessaa jechoota tishoo baasi. Hiika isaaniis akka galumsa isaaniitti kennuun gareen irratti mari'adhaa.

Fakkeenyaaf, Sanbata + guddaa= Sanbata guddaa

Sanbatagudda- guyyaa addooyyeen lamaan itti boqonna argachuu danda'an

Gareen jechoota isaanii maqaa + maqibsa

Sanbata + guddaa

C. Jechoota armaan gadii tishheessuun hiika isaanii kenni.

- | | |
|-------------------|------------------|
| 1. gaara + gadi | 2. qofaa + galuu |
| 3. gidduu + galuu | 4. qote + bulaa |
| 5. bifa + badii | 6. mataa + duree |
| 7. saba + lammii | 8. miila + jala |
| 9. roga + sadi | 10. yoom + eessa |

D. Jechoota 7 'C' jalatti hiika kenniteef kanneen, garee jechootaa kam kam keessaa akka walitti dhufan himi.

- | | |
|----------|-----------|
| 1. _____ | 2. _____ |
| 3. _____ | 4. _____ |
| 5. _____ | 6. _____ |
| 7. _____ | 8. _____ |
| 9. _____ | 10. _____ |

E. Jechoota tishoo gilgaala 7 'C' jala jiran keessaa filachuun himoota armaan gadii keessatti bakka sirrii ta'etti guuti. Sanaan booda, gareen irratti mari'adhaa.

1. Asoosama tokko keessatti ta'iinsoota ibsuuf yoomiifi _____ tti kan jedhu argamuun dirqama.
2. Gaaraa _____ yemmuu konkolachisnu of eeggannoon barbaachisaadha.
3. Biyya keenyatti sabaafi _____ adda addaa waliin jiraatan.
4. Baay'atees narraa hinhafne; dhabees hinbeelofne; _____ ttin jiraadha.
5. Osoo hinbarreessin dura _____ irratti barreessan filachuun barbaachisaadha.
6. Aadde Boontuun erga ijoolleen ishii heerumanii _____ taate.
7. _____ biyya keenyatti bara kana si'a sadi badhaafaman.
8. Obbo Qajeelaan qotiyyoo _____ ta'e bitee namni irraa bitu dhabame.

9. Kitaaba tokko tokko keessatti fakkiin _____ argina.
Innis ibsa dabalata qaba.
10. Obbo Qilxuun qotiyyoo qonnaa _____ dhahuun gaarii
miti jedhu.
11. Manni jireenya baadiyaa fakkii _____ qaba.

Barannoo 4: Birsaga



Gilgaala 8:

Shaakala Birsaga

- A. Gaaffiiwwan armaan gadii gareen irratti mari'achuun deebisaa.**
1. Sagaleen lamaafi lama ol walitti dhufuun maal uumu?
 2. Yeroo jechoota uumnu birsagonni Afaan Oromoo haala kamiin mul'atu?
- B. Jechoota armaan gadii birsaga birsagatti addaan qooduun birsaga meeqa akka qaban agarsiisi.**
- | | |
|----------------|---------------|
| (a) addooyyee | (b) aadaa |
| (c) Oromoo | (d) misirroo |
| (e) hiriyummaa | (f) shamarran |
| (g) cidha | (h) naannoo |

Barannoo 5: Barreessuu



Gilgaala 9:

Shaakala Barreessuu

Hiriyummaa shamarranii (addooyyee) naannoo keetii ilalchisee barruu keeyyata 3-5 qabu barreessun, dareef dhiyeessi.

Boqonnaa 3: Meeshaalee Walqunnamtii Ammayyaa

Kaayyoo: Barnoota boqonnaa kanaatiin booda:

- fakkiilee ilaaluun yaada isaan dabarsan himta.
- hiika jechootaa haala galumsaatiin himta.
- barreeffama siif dhiyaate saffisa adda addaatiin dubbisuun ergaa isaa himta.
- seera eegdee falmii gaggeessita.
- keeyyata yaada ifa ta'e dabarsu barreessita.


Barannoo 1: Dubbisuufi Dubbachuu



Gilgaala 1:

Shaakala Dubbisuun Duraa

- A. Fakkiilee armaan gadii ilaaluun, gaaffiiwwan kanneen gareen irratti mari'achuun deebisaa.
1. Meeshaalee wal quunnamtii uummataa kan jedhaman kanneen armaan gadii keessaa kam faa beekta?
 2. Faayidaa meeshaaleen wal quunnamtii kunniin uummataa kennan himi.
 3. Bu'aan ati meeshaalee kanneenirraa argatte jiraa? Maala fa'i?
- B. Osoo gara dubbisuutti hinseeniin, hiika jechoota armaan gadii tilmaami.
- (a) tamsaasuu
 - (b) mi'aa
 - (c) dhaamuu



**Gilgaala 2:****Shaakala Yeroo Dubbisuu**

- A. Gaaffiwwan armaan gadii dubbisa siif kenname saffisaan dubbisuun deebisi.
1. Yaanni waliigala dubbisa kanaa maali?
 2. Ergaan keeyyata jahaaffaa keessatti darbe maali? Inni keeyyata 3^{ffaa} hoo?
 3. Biyyi barumsa televijiiniin dabarsuun beekamte kami? Kutaawwaan kamiif irra caalatti itti fayyadamte?

Meeshaalee Walqunnamtii Ammayyaa

Akkuma sochii hawaasummaa adda addaa, barumsi bu'aa saayinsiifi teeknooloojii kan burqisiisu qofa osoo hinta'in ofiis itti fayyadamaa jira. Kanaaf, fakkeenya guddaa kan ta'u barnoota idilee sagantaa barnoota raadiyoofi televijiiniin tamsa'ee deeggarsa cimaa kennuu danda'uu isaati. Sagantaan kun addunyaa guutuu keessatti haala qabatamaa biyyichaa irratti hundaa'ee hojiirra oolus, biyya keenya keessatti ammas gahaa akka hintaane ogeessonni barnootaa hedduun ni'ibsu. Sagantaan kunis akka bal'achuu qabu nihubachiisu.

Raadiyoofi televijiiniin barsiisuun humna namaa barsiisuuf barbaachisu qusata. Kun ammoo barsiisonni fedhii barattoota isaanii guutuuf yeroo gahaa akka argatan taasisa. Kana malees, barsiisonni dandeettiifi muuxannoo gahaa qaban yeroo barsiisan, barattoota hedduun ilaalamuufi dhaga'amu akka danda'an godha. Dabalees, barumsi filmiin, raadiyooniin yookiin televijiiniin kennamu barattoota miliyoonaan lakkaa'aman qaqqabuu danda'a. Barumsa gosa adda addaas barattoota fagoo jiran yookiin kanneen barnoota idilee hinarganneef dhiyeessuun nidanda'ama. Waggootii hedduu

darban keessatti fiilmiifi raadiyooniin biyyoota baay'ee keessatti namoota hinbaranneef barnoota gosa adda addaa dabarsaniiru. Kanaanis dubbisuufi barreessuu irraa eegalee kan akka barnoota qonnaa ittiin barsiisuun danda'ameera.

Biyyoota barnoonni sadarkaa tokkoffaa keessatti babal'ate keessatti fiilmiifi raadiyoon kan fayyadan barumsa daree bakka bu'uuf osoo hintaane, kan barsiisaan dhiyeessu caalaa barumsa kennamu bu'uura isaarraa ka'uun beeksisuufi gabbisuufi. Mootummoonni fiilmii biyya isaaniitiif maallaqa niramadu. Fiilmiin kunis tolaan manneen barnootaa, kolleejjota, gumiiwwaniifi, namtokkeefillee nidhiyaatuuf. Yuunivarsiitoonni baay'een barumsa fagootiif fiilmii ofii qopheessu.

Garuu fiilmii gabaabduu tokkollee qopheessuuf mi'aawaa waan ta'uuf, biyyoonni baay'een fiilmiitti fayyadamuun isaaniitti ulfaata. Kanaaf jecha uummataaf barumsa gatii salphaan dhiyeessuuf addunyaarratti raadiyoon caalaatti filatamaa ta'eera . Ardiwwan addunyaa tajaajilli raadiyoo harka baay'een keessatti dabale keessaa lisiyaan fakkeenya tokko.

Yeroo dheeraaf, biyyoonni industiriidhaan dagaagan baay'een sagantaa barnoota raadiyoo uummata isaaniitiif kan dhiyeessan yoo ta'u, dhaggeeffattoota raadiyoo alaatiif ammoo barnoota afaanii qabu. Abbaan fedhe, bakka fedhee addunyaa keessatti barnoota afaan adda addaatin biyyoota adda addaarraa dabru raadiyoo sanaan hordofuu danda'a. Fakkeenyaaf, Awustiraaliyaatti ijoolleen bakka adda addaatti argaman barumsa isaanii giddu-galeessa mana barumsaa qilleensarraa tamsa'u dhaggeeffatu. Ijoolleen kun raadiyoo ofiitiin dhaamsa dabarfachuu, yeroo barumsi xumuramus barsiisaa raadiyoo sanaaf gaaffii dhiyeessuu danda'u. Gatiin televijiniin kan raadiyoo caalaa mi'aadha. Kanaafuu, bal'inaan hojiirra ooluu hindandeenye. Televijiniin garuu bu'aadhaan caalmaa

niqabaata. Barattoonni ijaan ilaalaa sagalee dhaggeeffachaa akka baratan waan dandeessisuuf barumsa ittiin dabarsuuf filatamaa ta'aa jira.

Ameerikaan barumsa televijiniin dabarsuudhaan biyya hunda dursiti. Barumsa sadarkaa 1^{ffaa}, 2^{ffaa}, fi 3^{ffaa} bal'inaan ittiin gaggeessuu dandeesse. Kana malees, qorannaafi opiraasiyoonii godhamu kan dura barattoonni muraasni qofti ilaalan, har'a laaboraatoriifi mana yaalii keessatti barattoonni hedduun televijiniin hordofuu danda'aniiru.

Barumsi televijiniin dabru akka babal'atu kan taasise jijjiirama sirna "Saatalaayitii" irratti godhame. Kunis kan ta'uu danda'e saatalaayitiin ergaa isa qaqqabu hunda gara lafaatti waan tamsaasuuf, ardii hunda waliin gahuufis saatalaayitoonni waltajjii barbaachisaa ta'anirratti dhaabamanii daandii qabatani jiru. Haaluma kanaan barnoonnis bu'aa saayinsii ammayyaatti fayyadamuun bal'inaafi qulqullina barnootaa dabalaa jira. Kunis saayinsiifi teeknooloojii babal'isuuf barnoota akka barbaachisu, barnoota guddisuuf ammoo saayinsiifi teeknooloojiitti fayyadamuu akka qabnu nuhubachiisa. Biyya keenyattis sagantaaleen barnootaa kanneen raadiyoofi televijiniin dabran bu'a qabeeyyii waan ta'aniif bakka hingeenyetti babal'achaa deemuu qabu.

B. Akka yaada dubbisa armaan oliitti gaaffiiwwan armaan gadiitiif deebii sirrii ta'e suuta dubbisuun afaaniifi barreeffamaan kenni.

1. Tamsaasa barumsa fiilmii caalaa raadiyoodhaan dabarsuun maaliif wayya sitti fakkaata?
2. Barumsi raadiyoofi televijiniin kennamu hojii barsiisota filatamoo akkamiin caalaatti bu'a qabeessa taasisa?
3. Tamsaasni barumsaa babal'achuun hojii barsiisaa akkamiin deeggaruu danda'a?

4. Saatalaayitiin tamsaasa barumsaarratti jijjiiramni fidu maali?
5. Barumsa raadiyoodhaan kennamu moo kan televijiniin kennamutu caala? Akkamitti?
6. Tokkummaafi garaagarummaa sagantaa barnoota raadiyoofi televijinii ibsi.

C. Jechoota armaan gadii dubbisa keessaa bahaniif hiika kallattii barreessi.

- | | |
|----------------|-------------|
| (a) tamsaasuu | (b) ibsuu |
| (c) qaqqabuu | (d) mi'aa |
| (e) jijjiirama | (f) dhaamuu |
| (g) muraasa | |

D. Himoota armaan gadii keessatti jechoota jala sararamaniif akka galumsa isaaniitti hiika isaanii barreeffaman kenni.

Fkn. (a) Galchaa nyaachuun nama yaraa ta'uudha.

Hiika – salphaa

(b) Lakkoofsi namoota walga'iirratti argamanii yaraa ture.

Hiika – muraasa /xinnaa/

1. AIDSii biyya lafaarraa balleessuun salphaa miti .
2. Osoo beekanii balleessuun salphaa miti.
3. Dubbii keessa hinbeekne seentee hinborcin .
4. Taliila kana gubbaan seentee hinborcin .
5. Jette jettee namaatu jara addaan kute.
6. Baalettii galee buluuf, ganamaan ka'ee kute.
7. Fardi sakaallaa kute.
8. Mammaaksi Oromoo, “kan qotiyoon iyyuu malu qacceen iyya “jedha.
9. Qacceen bineensa tokko tokkoo lafarraa badeera jedhama.

10. Dubbii qabbaneessi malee gaccee itti hinta'iin.
11. Waaqoon farda odolcha dhangalaasaa darbe.
12. Inni mana kana ijaaruuf humnaafi horii isaa itti dhangalaasaa ture.

E. Jechoota keeyyata armaan gadii keessatti jala sararamaniif hiika isaanii akka galumsaatti barreessi.

Kitaaba kana qopheessuuf kanan ifaaje adda kiyyaa miti. Aanaan kiyya hundi mammaaksafi sirboota mimmiidhagaa hisataan naa funaanuun isaanii waan yoomiyyuu hindagatamne. Dhumarratti, hunduma qixatti Obbo Jamaal abbaa Duraa waan hundaan cinaa kiyya dhaabbachuu isaaniitiif Waaqni isaanii haa tolu. Akkasumas, afoola Oromoo kan akka galaanaa waraabbamee hindhumne keessaa yartu ishii qofa fudhachuun dhiyeesseen jira. Kunis, barattoota quba qabsiisuufi malee akaakuun afoola Oromoo kana qofa ta'ee miti. Gama birootiin ogummaa uummata kanaa yoo keessa lixanii ilaalan waan nama aja'ibsiisu hedduutu jira.



Gilgaala 3:

Shaakala Dubbisuun Boodaa

Gaaffiwwan armaan gadii dubbisa dubbiste bu'uureeffachuun muuxannoo kee waliin walqabsiisuun ibsa bal'aa barreeffamaan kenni.

1. Ati raadiyoo dhaggeeffachuu moo televiijinii daawwachuu jaallatta? Maaliif?
2. Teeknooloojii ammayyaa biyya keenya keessatti babal'isuuf hojiin akkamii hojjatamuu qaba?
3. Biyya keenya keessatti haalli tamsaasni raadiyoofi teeleviijinii amma irra jiru sadarkaa gaariidhaa? Akkamitti?

Barannoo 2: Dubbachuu



Gilgaala 4:

Shaakala Falmii

Gaaffiwwan armaan gadii keessaa tokko filachuun seera falmii eeguun irratti walfalmaa.

1. Pilaazimaa Teeleviijinidhaan barachuu wayya moo barsiisadhaan barachuu wayya?
2. Tamsa'ina HIV/AIDSii hir'isuuf raadiyoo moo teelviijinii gargaaramuu wayya?

Seera walfalmii:

Walfalmii haala sirriifi bu'a qabeessa ta'een gaggeessuuf, osoo walfalmiitti hingaliin, dura bu'aa/ falmii gaggeessaafi abbootii murtii (barattoota daree hunda ta'uu malu) filachuufi seera adeemsi falmii ittiin qajeelfamu duraan dursuun irratti walii galamee barreeffamaan qopheessuu barbaachisa.

Barannoo 3: Barreessuu



Gilgaala 5:

Shaakala keeyyata Barreessuu

Faayidaa raadiyoofi televijiiniin dhukkuba HIV/AIDSii hir'isuurratti qabu keeyyata jechoota 150-200 qabu barreessuun dareef dhiyeessi.

Boqonnaa 4: Barnootaafi Misooma

Kaayyoo: Barnoota boqonnaa kanaattiin booda:

- barreeffama siif dhiyaate saffisa adda addaatiin dubbisuun yaadota guguddaafi yaadota callaa hubatta.
- hiika jechootaa haala galumsaatiin himta.
- gaaleefi gosoota gaalee adda baastee hubbatta; barreeffama keessatti sirriitti itti fayyadamtas.
- maqaafi gosoota isaa adda baastee hubachuun himoota kee keessatti sirriitti itti fayyadamta.

Barannoo 1: Dubbisuufi Dubbachuu



Gilgaala 1:

Shaakala Dubbisuun Duraa

Barreeffama armaan gaditti siif dhiyaate dubbisuun dura, gaaffiiwwan armaan gadii gareen irratti mari'achuun deebisaa.

1. Barnoonnifi misoomni walitti hidhata maalii qabu?
2. Barnoonni guddina diinagdee mirkanessuun ala, faayidaa maal faa qaba?
3. Misooma jechuun maal jechuudha? Misoomaafi guddina gidduu gara-agarummaan jiraa?
4. Suuraan armaan gadii kan eenyuu akka ta'e beektaa? Waa'ee dubartii kanaa maal beekta?
5. Fakkiin hojii misoomaa armaan gadii Itoophiyaa keessatti ijaaramaa jiru kun maali? Faayidaa maalii qaba?



Gilgaala 2:

Shaakala Yeroo Dubbisuu

- A. Barreeffama “Barnootaafi Misooma” jedhu saffisaan dubbisuun gaaffiiwan armaan gadii deebisi.
1. Galmoota misoomaa bar-kumee kan bara 2015(ALAWtti) akka raawwataman Dhaabata Mootummoota Gamtaa’aniin kaa’aman keessaa isaan barnootaan walitti hidhatan maal fa’i?
 2. Investimantiin barnootaa eenyu faa fayyada?
 3. Garaagarummaa biyyoota misoomaan walcaalanii maaltu uume?
 4. Ergaan Elen Joonsan sarliif maali?

Barnootaafi Misooma

Barnoonni misoomaaf bu’uura. Barnoonni uummata humnoomsa. Biyyootas nicimsa. Balbala ittiin hiyyummaa keessaa of baasan banuufiin, uummattootaafi biyyootaa ‘walqixxeessuu’ keessatti gahee ol’aanaa qaba. Biyyoonni addunyaa galmoota misooma bar-kumee akka bakkaan gahan gochuuf qoonni barnootaa murteessaadha. Galmoota misoomaa barkumee saddeettan keessaa lama barnoota ilaallatu. Isaanis, daa’imman hundi barnoota sadarkaa 1ffaa xumuruufi barnoota sadarkaa 1ffaafi sadarkaa

2ffaa keessatti walqixxummaa saalaa mirkaneessuudha.

Kana malees, barnoonni-keessattuu barnoonni shamarranii-galma fayyaa daa'immaniifi walhormaataa; akkasumas, galma eegumsa naannootiin walitti qabate kallattiin deeggara. Yaadni, "Dhiira barsiisuun nama tokko barsiisuudha; shamara barsiisuun garuu maatii hunda barsiisuudha" jedhu, barbaachisummaa barnoota shamarranii sirriitti ibsa. Kana jechuun, barbaachisummaan barnoota ijoollee dhiiraa xiqqaadha jechuu osoo hintaane, shamarri boru haadha ijoollee yemmuu taatu, yoo barnoota qabaatte ijoollee ishiis kunuunsuun fayyaa isaanii eegdee barsiisti jechuudha. Biyyoonni misooman, bu'uurri misooma isaanii tokko shamarran barsiisuudha jedhama.

Investimantiin barnootaa nama dhuunfaa, hawaasa, akkasumas addunyaa mara fayyada. Barnoonni qulqullina qabuufi kan uummata hunda walgahe hiyyummaafi dhabiinsa wal-qixxummaa hir'isuu keessatti gahee ol'aanaa qaba. Fayyaa namoota dhuunfaa fooyyessuun, misoomni biyyootaa bu'uura amansiisaarratti hundaa'ee itti fufiinsaan akka mirkanaa'u taasisa. Namoonni dhuunfaas ta'ee, biyyoonni beekumsa akka uuman, hojiirra oolchaniifi daddabarsan dandessisuun diinagdeen saffisaan akka guddatuufi addunyaarratti dorgomaa ta'ee akka ijaaramu taasisuuf furtuudha. Hawaasa dimokiraatawa ta'e ijaaruu keessattis qoda murteessaa qaba.

Bu'uurri misoomaa cimaan qabeenya uummamaa osoo hintaane, humna nama barateeti. Nama barate jechuun nama beekumsaafi ogummaa cimaa; akkasumas ilaalcha gaarii goonfate jechuudha. Humni nama baratee hagam misoomaaf murteessaa akka ta'e hubachuuf haala biyyoota badhaadhanii kan akka biyyoota Awuroppaa, Ameerikaa Kaabaa, Jaappaanifi kkf, biyyoota saffisaan misoomaa jiran, kan akka Chaayinaa, Indiyaa, Biraaziil, Kooriyaafi kkf fi biyyoota misoomaan duubatti hafan kan akka biyyoota Afrikaa hedduu gammoojjii Sahaaraatii gaditti argaman walmaddii qabani ilaaluun nidanda'ama. Sababni garaagartii bal'aa biyyoota kanneen gidduu

jiru garaagartii qabeenya uummamaa miti.

Biyyoonni Afrikaa hedduun, kan hiyyumaan gadadamaa jiran, qabeenyi uummamaa isaanii kan biyyoota badhaadhaniitii ol yoo ta'e malee, gadi miti. Fakkeenyaaf, bosona addunyaa keessaa %3.4n biyya Rippaabiliika Dimookiraatawaa Koongoo keessa jira. Qabeenyi bishaanii biyyattiin qabdus daran guddaadha. Haa ta'u malee, biyyattiin misoomaan duubatti haftuudha. Biyyi kun akka fakkeenyaatti haa fudhatamtu malee haalli biyyoota hedduu akkasuma. Sababni kanaa ammoo hanqina humna nama baratee, kan saayinsiifi teeknooloojii hammayyaatti fayyadamee qabeenya uumamaa misoomsuu danda'u dhabamuudha. Dhuguma kana hubachuun, yeroo ammaa kana ltiyoophiyaan misooma itti fufiinsa qabu mirkaneessuuf lammii ishii hundaaf barnootaafi leenjii qulqullina qabu waliin gahuuf tattaaffii cimaa gochaa jirti.

Dhumarratti, barbaachisummaa barnootaa ilaalchisuun, dhaamsa pirezidaantiin Laayibeeriyaa, Aaddee Elen Joonsan Sarliif dabarsan yaa ilaallu.

“.... Wanti tokko, wanti egeree fooyya'aa nagaya amansiisaa qabuuf ija keenya banu barnoota qofa. Laayibeeriyaa keessatti, barsiisaan cimaan tokko, jechoonni akkamitti akka qubeeffamaniifi lakkoofsonni akkamitti akka ida'aman qofa osoo hinta'in, daa'imman akkamitti jireenya egeree gaarii argachuu akka danda'an itti agarsiisuu akka danda'u mataa kootiin argeera.

Daa'imman keenya hundi mirga barachuu qabu. Barnoota jechuun, barnoota hundaa miti. Filannoo bal'aa qabna. Haala waldiddaafi walitti bu'iinsa armaan dura addunyaa keessatti hubachaa turre itti fufuu danda'uun ykn haala daa'imman keenya egeree nagaa-qabeessafi onnachiisaa/abdachisaa ta'e arganiin barsiisuu dandeenya. Barnoonni-inni sirriitti qulqullina qabeessa ta'e-daa'immaniif abdiifi carraalee gaggaarii laata.... Manni barnootaa iddoo nageenyaa ta'uu danda'a; ta'uus qaba... Barnoonni qulqullina qabu nageenyaaf wabiidha, nageenyis barnootaaf bu'uura. Nagayaafi misooma mirkaneessuuf ammoo daa'immanis dirqama qabu.

B. Barreeffama armaan olii suuta dubbisuun, gaaffiiwwan armaan gadii deebisi.

1. Barnoonni uummattootaafi biyyootaa akkamiin wal-qixxeessuu danda'a?
2. Fayyaa daa'immaniifi wal-hormaataa mirkaneessufi eegumsa naannootiif barnoonni shamarranii maaliif barbaachisaa ta'e?
3. Galmoonni misoomaa bar-kumee meeqa?
4. Bu'aan beekumsa argachuu, hojiirra oolchuufi daddabarsuu maali?
5. Biyyoonni saffisaan guddachaa jiran biyyoota kam fa'i?
6. Akka yaada Elen Joonsan sarliifitti, barnoonni misoomaaf bu'uura ta'e, barnoota akkamiiti?
7. Ergaan waliigalaa keeyyata 3^{faa} maali?

C. Akkaataa odeeffannoo barreeffama armaan olii keessatti laatameen, himoota armaan gadii Soba ykn Dhugaa jechuun deebisi. Soba yoo jette, himichi akka dhugaa ta'utti sirreessii barreessi.

1. Barnoonni garaagartii misoomaa biyyoota adda addaa gidduu jiru dhiphisuuf faayyada.
2. Barnoonni biyya misoomsuu danda'u, uummata hunda walgahuu baatus, barnoota qulqullina qabu.
3. Barnoonni investimantiidha.
4. Akkaataa odeeffannoo barreeffamicha keessatti laatameen biyyi Dimokiraatawaa Ripaabliika koongoo biyya dimookiraasiin keessatti mirkanaa'e.
5. Akka yaada Elen Joonsan Sarliifitti, barsiisaan cimaan tokko, barattoota isaa beekumsa qalamaa qofa osoo hintaane ogummaa jireenyaas barsiisuu qaba.
6. Misoomaafi nageenya mirkaneessuun gahee mootummaa qofa.

D. Jechoonni armaan gadii barreeffama armaan olitti dubbiste keessaa fudhata-man. Hiika galumsaa jechoota kanneenii filannoowwan laataman keessaa filadhu.

1. murteessaa (k. 1)

A. murtii kennaa B. ol-aanaa C. dirqisiisaa D. amansiisaa

2. gahee (k.2)

A. qooda B. hirmaannaa C. murtii D. dhiibbaa

3. furtuu (k. 2)

A. bantuu B. salphistuu C. murteessaa D. agarsiistuu

4. gonfate (k.3)

A. argate B. horate C. badhaafame D. hirphate

5. gadadamaa (k. 3)

A. qoratamaa B. salphataa C. dirqamaa D. rakkataa

6. egeree (k. 4)

A. bara-dhufu B. gara fuul-duraa C. abdi D. ilaalcha



Gilgaala 3:

Shaakala Dubbisuun Boodaa

Hubannoo barreeffamicharraa argatteefi muuxannoo keerratti hundaa'uun, gaaffiiwwan armaan gadii deebisi. Erga dhuunfaan deebistanii booda gareen irratti mari'achuun dareef gabaasaa.

1. Hubannoo/barumsa barreeffama kanarraa argatte keeyyata tokkoon gab-aabsii ibsi.
2. Misooma Oromiyaa saffisiisuun, uummata Oromoo hiyyummaa keessaa baasuuf gaheen barattoota Oromoo maali jetta?
3. Qulqullinni barnootaa misooma mirkaneessuuf hagam barbaachisaadha? Maaliif?
4. Qulqullinni barnootaa akkamiin mirkanaa'uu danda'a?

Barannoo 2: Caasluga

Yaadannoo

I. Gaaleefi Gosoota Isaa

A. Maalummaa Gaalee

Gaaleen caaseffama himaa keessatti, qaama himaa yoo ta’u, jecha ykn garee jechootaa kan hojii tokkoof dhaabbatanidha. Gaaleen hima keessatti akka qaama tokkootti socho’a.

Fakkeenyaaf, hima “Intalli faaraan bareedduun dhufte” jedhu keessatti, gaaleen “**Intalli faaraan bareedduun**” jedhu akka qaama tokkootti waliin dhabbata. Gaaleen olitti gurracha’ee barreeffame kun hanga tokko hiika qabaatuus, ergaa guutuu hindabarsu.

B. Gosoota Gaalee

Jecha akka mataa gaaleetti tajaajilurratti hundaa’uun, gaaleen bakka afuritti qoddama. Isaanis:

1. **Gaalee maqaa:** Gaaleen maqaa jechuun, gaalee maqaadhan duurfamu / hogganamu ykn kan mataan isaa maqaa ta’e jechuudha.

Fkn. Manni moofaan sun jige .

Gaaleen gurraacha’ee barreeffame kun, gaalee maqaa yoo ta’u, mataan gaalee kanaa maqaa **manni** jedhu.

2. **Gaalee gochimaa:** Gaalee gochimaa jechuun, gaalee gochimaan duurfamu ykn kan gochimni mataa ta’eef jechuudha.

Fkn. Qananiin biddeena xaafii tolchite.

Gaaleen gochimaa gurraacha’ee barreeffame kun, gochima **tolchite** jedhuun oogganama. Jechoonni kan gaalee kana keessa jiran maal akka tolchite ibsu.

3. **Gaalee durduubee:** Maataan gaalee durduubee, durduubeedha.

Fkn. Namoomsaan gara manaa deeme.

Gaaleen durduubee gurraacha’ee barreeffame kun, durduubee **gara**

jedhuun oogganama.

4. **Gaalee maqibsaa:** Gaaleen maqibsaa, maqibsaan oogganama ykn mataan gaalee kanaa maqibsaa jechuudha.

Fkn. Taliileen **barnoota ishiitiin daran cimtuudha.**

Gaaleen gurraacha'ee barreeffame kun, maqibsaa **cimtuu** jedhuun oogganama.



Gilgaala 4:

Shaakala Gosoota Gaalee

A. Himoota armaan gadii keessaa gaaleewwan adda baasuun gosoota isaanii himi. Gaaffiiwwan erga dhuunfaan deebistanii booda gareen irratti mari'achuun sirrii ta'uu keessan mirkaneeffadhaa.

1. Qullubbii adiin dhibee hedduuf qoricha.
2. Barattuu cimtuun abdi biyya ishiiti.
3. Saffisaan hojii manaa xumure.
4. Tolashiin dheengadda heerumte.
5. Hordofaan Hambisaarraa sangaa ergifate.
6. Turaan hucuu adii bitate.
7. Kitilaan Afaan Oromoo barsiisaa jira.
8. Namichi rasaasaan dhahame, battalumatti du'e.
9. Gammadaan caccabsaa aannaniin unatee nyaate.

B. Himoota mataa keetii kudhan kan gaaleewwan adda addaa of keessaa qaban barreessii barsiisaa keetti agarsiisi.

II. Maqaafi Gosoota Isaa

Maqaa jechuun, jecha namni, iddoon, meeshaan, yaadniifi kkf ittiin waamamani.

Fkn. **Elemtuun** maqaa meeshaa aannaniiti.

A. Gosoota maqaa

Maqaan gosoota shanitti qooddama. Isaaniis:

1. **Maqaa dhuunfaa.** Maqaan dhuunfaa jecha namni, iddoon, meeshaan, ykn wanti tokko dhuunfaan ittiin waamamu jechuudha.
Fkn. Tolaa , Ayyaantuu, Gammachuu, Roobe, Finfinnee, bakkanniisa...
2. **Maqaa gamtaa /waliinii).** Maqaan gamtaa, maqaa wantoonni gosa tokko keessatti ramadaman waliin ittiin waamamani.
Fkn. nama, re'ee, jaldeessa, kophee ...
3. **Maqaa dimshaashaa.** Maqaan dimshaashaa maqaa wantoonni addaddaa bakka tokkotti ittiin waamamani.
Fknf; hoomaa, bineensa, uummata...
4. **Maqaa meeshaa:** Maqaan meeshaa maqaa meeshaaleen qabatamaa ta'an adda addaa ittiin waamamani.
Fkn. eelee, suummoo, buqqee, aannan ...
5. **Maqaa Killayyaa:** Maqaan kun jecha wantoonni qabatamaan osoo hinta'iin, yaadaan jiran ittiin waamamani.
Fkn. dimokiraasii, jaalala, badhaadhina, gammachuu...



Gilgaala 5:

Shaakala Gosoota Maqaalee

Maqaalee armaan oliitti akka fakkeenyaatti laatamaniin ala, gosoota maqaa shananiif maqaalee sadi sadi barreessuun, himoota mataa keetii ittiin barreessii dareef dhiyeessi.

Barannoo 3: Barreessuu



Gilgaala 6:

Shaakala Keeyyata barreessuu

Mata-duree “Qulqullina Barnootaa Mirkaneessuu keessatti Gahee Barattootaa”, jedhurratti keeyyata tokko, kan jechoota 100-150 qabu barreessuun akka siif sirreessu barsiisaa keetti kenni.

Barsiisaa keetti laachuun dura, yaada kee tartiiba ifa ta’een qindeessuu, jechoota sirriitti qubeessuu, sirna tuqaalee adda addaa sirriitti itti fayyadamuu keefi kkf irra deebitee dubbisuun haalaan hubadhu. Yoo dandeesse, hiriyooni kee dubbisanii yaada fooyya’insaa akka siif laatan gochuun irra deebi’ii barreessi.

Boqonnaa 5: Faalama Qilleensaa

Kaayyoo: Barnoota Boqonnaa kanaatiin booda:

- barreeffama siif dhihaate haala adda addaatiin dubbisuun dhaamsa isaa himta.
- jechootaaf hiika faallaa kennita.
- fuftootaafi akaakuu isaanii addaan baastee hubachuun itti fayyadamta.
- maqaan akka maqibsaatti tajaajiluu isaa hubatee himoota kee keessatti itti fayyadamta.
- hennaa ammeennaa fayyadamuun himoota ijaarta.

Barannoo 1: Dubbisuufi Dubbachuu



Gilgaala 1:

Shaakala Dubbisuun Duraa

- A. Osoo barreeffama armaan gadii hindubbisin gaaffiiwwan kanneen gareen irratti mari'achuun deebisaa.
1. Faalama qilleensaa jechuun maal jechuudha?
 2. Qilleensa maaltu faala?
 3. Miidhaan faalamni qilleensaa qaqqabsiisu maal fa'i?
 4. Faalama qilleensaa hambisuuf ykn hir'isuuf maaltu godhamuu qaba?
 5. Fakkiiwwan armaan gadii faalama qilleensaatiin walitti dhufeenya akkamii qabu?



B. Jechoonni armaan gadii barreeffamicha keessa jiru. Osoo barreeffamicha hindubbisiin dura hiika jechoota kanneenii hiriyoota keetiin walitti himaa.

- | | |
|-------------------------|------------------------------|
| 1. sirnakkoo | 3. Oozoonii(O ₃) |
| 3. naannawa nam-tolchee | 4. dhuka'oota |



Gilgaala 2:

Shaakala Yeroo Dubbisuu

A. Barreeffama armaan gadii saffisaan dubbisuun gaaffiiwwan kanneen deebisi. Deebiiwwan dhuunfaan deebistan gareen irratti mari'achuun dareef gabaasaa.

1. Yaadni waliigalaa dubbifamichaa maali?
2. Faaltoonni qilleensaa maal fa'i?
3. Rakkoowwan faalamni qilleensaa qaqqabsiisaa jiru maal fa'i?
4. Biyyoonni shanan sadarkaa olaanaan kaarboondaayi'ooksaayidii qilleensatti gadilakkisan eenyu fa'i?
5. Faalama qilleensaa hir'isuuf falli maali?

Faalama Qilleensaa

Yeroo keemikaalonnifi wantoonni xuraa'an ykn summaa'an adda addaa gara qilleensaatti gadi lakkifamuun ilmaan namaafi lubbu-qabeeyyii biroo yookiin naannawa uumamaafi nam-tolcheerra miidhaa geessisan faalamni

qilleensaa uumame jedhama. Qilleensi sirna gaazotaa walxaxaafi jijjiiramaa ta'e yoo ta'u, lubbu-qabeeyyiin dacheerra akka jiraatan taasisuuf gahee murteessaa qaba. Qaamni qilleensaa Oozoonii (O_3) jedhamu akka uffata qorraatti dachee uwwisuun akka humni aduu guutumaa guututti dacheerra qubachuun faayyaa ilmaan namaa, lubbu qabeeyyii biroofi sirnakkoorra miidhaa hinbulchine dhoorka. Haa ta'u malee, Oozooniin yeroodhaa gara yerootti sababa faalama qilleensaatiin miidhamuun haphachaa wanta jiruuf ilmi namaas ta'ee sirnakoon dachee balaaf saaxilamaa jira.

Wantoonni qilleensa faalan jajjaboo, dhangala'oofi gaazota ta'uu danda'u. Faaltonni kunis kan uummamaa ykn namtolchee ta'uu danda'u. Wantoota gochoota namaatiin uumamuun qilleensa faalan keessaa guguddoon kan armaan gadiiti.

- **Salfar Ooksaayidii (SO_x):** Salfar Ooksaayidiin koompaawundii keemikaalaa yoo ta'u, dhoo'insa Voolkaanoofi aara industiriirraa baahuun uumama. Cileefi boba'aan koompaawundii Salfarii wanta qabaniif, yemmuu gubatan Salfardaayi'ooksaayidii (SO_2) uumu. Salfar daayi'ooksaayidiin ammoo yoo Naayitiroojiin daayi'ooksaayidii (NO_2)n walitti makame Asiidii salfarii (H_2SO_4) uumu. Kanaafuu cileefi boba'aa akka madda humnaatti itti fayyadamuun Ooksaayidoonni Salfarii (SO_2 fi H_2SO_4) gara qilleensaatti lakkifamuun faalama qilleensaa akka uuman taasisa.
- **Naayitiroojiin Ooksaayidii(NO_x):** Ooksaayidoota Naayitiroojiinii heddu keessaa inni sadarkaa ol'aanaan qilleensa faaluun beekkamu Naayitiroojiindaayi'ooksaayidii(NO_2) dha. NO_2 n koompaawundii keemikaalaa yoo ta'u, yemmuu wantoonni adda addaa oo'a daran olaanaa ta'een gubatan uumama. Naayitiroojiindaayi'ooksaayidiin daran **Summaa'adha**.
- **Kaarboonmoonooksaayidii (CO):** Kaarboonmoonooksaayidiin gaazii bifaafi foolii hinqabneefi kan nama hingubne ta'ee, daran summaa'aadha. Kan uummamus, boba'aa akka gaazii uumamaa, cileefi muka guutumaa guutuutti gubachuu dhabe ykn walakeessan gubatanirraayi. Wantoonni

gubataan qaama konkolaattotaa keessaa bahanis madda guddaa gaazii kanaati.

- **Kaarboondaayi'ooksaayidii(CO₂):** Gaaziin kun bifa, fooliis ta'ee, summaa'ina hinqabu. Maddi gaazichaa wantoota gubatan, oomisha simmintoofti afuura beeyilladoonni baafatani. Gaaziin kun oo'insi qilleensaa akka daran dabaluu gochuu keessatti gahee guddaa qaba. Akkuma beekkamu yeroo ammaa oo'insi addunyaa wanta dabalaa deemeeff miidhaan adda addaa gahaa jira.
- **Amooniyaa (NH₃):** Amooniyaan keemikaala bifa gaaziitiin argamu yoo ta'u, foolii badaa qaba. Amooniyaan wantoota xaa'oofii qoricha adda addaa oomishuuf oolan keessaa isa tokko. Kan maddee qilleensatti makamus wantootumaa kanneenirraayi. Keemikaalli kun kan bal'inaan faayidaarra oolu ta'us, keemikaala balaafamaa waan ta'eef, qilleensa faaluu keessatti gahee mataa isaa qaba.
- Fooliin balfaa kuufameefi dhangala'oota xuraa'anii, kan magaalootaafi industiriiwwan keessaa bahanirraa madduun qilleensa faala. Faaltonni qilleensaa kan dhuka'oota adda addaa keessaa maddanis gahee isaanii qabu.

Faalanni qilleensaa fayyaafi lubbuu namaarratti miidhaa olaanaa qaqqabsiisa. Akka ragaan Dhaabbata Fayyaa Addunyaa (DhFA) agarsiisutti, sababa faalama qilleensatiin waggaa waggaatti namoonni miiliyoonni 2.4 nidu'u. Kanneen keessayis miiliyoonni 1.5 sababa faalama qilleensaa mana keessatti uumamuun du'u. Waggaa waggaatti uummanni Ameerikaa gofti kan 500,000 ol ta'an sababa dhibee onnee faalama qilleensatiin uumamuun du'u.

Qorannoowwan adda addaa akka agarsiisanitti du'a sababa dhibee sombaatiin qaqqabuufi faalama qilleensaa kan boba'aa gubataa konkolaattota keessaa bahuun uumamu gidduu walitti dhufeenya cimaatu jira. Lakkoofsi namoota waggaa waggaatti sababa faalama qilleensatiin du'an kan sababa balaa konkolaataatiin du'an nicaala. Akka qorannoon

bara 2005 taasiifame mul'isutti, Awurooppaa kessatti waggaatti namoota 310,000 oliitu sababa faalama qilleensatiin du'a.

Dhibeewwan faalama qilleensatiin uumamanii lubbuu namaa galaafatan kan akka asmii, dhibeewwan onnee, Sombaafi dhibeewwan ujummoo qilleensaa fa'i. Lakkoofsi namoota dhibeewwan kanneeniin biyyoota industiriin guddatan keessatti du'aa jirani saffisaan dabalaa dhufuun sadarkaa yaaddessaarra gaheera. Dhibeewwan kunneen lubbuu namootaa galaafachuun alas, namoonni hedduun manneen yaalaa keessa ciisani akka yaalaman taasisuun tajaajila fayyaa uummataaf kennamurratti dhiibbaa geessisaa jiru. Baasiin biyyoonni adda addaa yaalii dhibeewwan kanaaf baasaniifi hir'inni oomishtummaa sababa namoota dhibichaan hojjirraa dhabamaniin uummamu guddina diinagdeerratti miidhaa olaanaa qaba.

Saanduqni armaan gadii biyyoota sadarkaa olaanaatti CO₂ qilleensatti gadi-lakkisuun oo'insa qilleensaa addunyaa dabalaa jiran agarsiisa.

Biyya	CO ₂ isaan waggaatti qilleensatti gadilakkisan (Toonii 10 ⁶)n	Gahee isaanii akka addunyaatti
Chaayinaa	6,103	21.5%
Ameerikaa	5,752	20.2%
Ruusiyaa	1,564	5.5%
Indiyaa	1,510	5.3%
Jaappaan	1293	4.6%
Jarman	805	2.8%
Inglizii	568	2.0 %
Kaanaadaa	544	1.9%
Kooriyaa kibbaa	475	1.7%
Xaaliyaanii	474	1.7%
Dimshaasha gahee isaanii dhibbeentaan		67.2%

Kaarboondaay'ooksaayidii maddisiisuu keessatti gaheen Afrikaa akka ardiitti 1.8 % qofa. Kuni ammoo biyyoota tokko tokkoof yoo hirame baayyee

xinnaadha. Haa ta'u malee, biyyoonni industiriin hinguddatin gaheen isaan qilleensa faaluu keessatti qaban xiqqoo ta'us, rakkoolee sababa faalama qilleensaatiin uummaman kan akka hongee, lolaa , dhibeewwan adda addaafi kkfniin daran miidhamaa jiru. Kanaaf yeroo ammaa biyyoonni qilleensa faaluu keessatti gahee guddaa qaban biyyoota kaaniif beenyaa akka kaffalan kan jedhamuuf.

Rakkoo faalama qilleensaa salphisuuf tarkaanfiiwwan adda addaa fudhatamuu qabu. Tarkaanfiiwwan kanneen keessaa inni tokko, kaarboondaayi'oksaayidii qilleensatti gadi lakkifamu hir'isuudha. Kuni ammoo kan ta'uu danda'u madda humnaa bobaa'aafi cileerraa argamu hir'isuun humna maddeen qulqulluu kan akka bishaanii, bubblee, biqiltoota, hurka, aduufi kkfirraa maddisiisuudha. Gama kanaan hojiin Itiyoophiyaan hojjechaa jirtu addunyaaf fakkeenya garii ta'aa jira.

B. Barreeffamicha irra deebitee sakkaataan dubbisuun gaaffiiwwan armaan gadiitti barreeffaman deebisi. Deebii walfakkaatan deebisuu keessan mirkaneeffachuuf, gareen irratti mari'adhaatii dareef gabaasaa.

1. Wanti dachee akka uffata qorraatti uwwisee jiru maal jedhama?
2. Gosoonni faaltota qilleensaa sadan maal fa'i?
3. Sababa faalama qilleensaatiin addunyaarratti waggaatti nama meeqatu du'a?
4. Ameerikaa keessatti qofa waggaatti nama meeqatu sababa faalama qilleensaatiin du'a?
5. Qilleensa dachee teenyaa sadarkaa tokkoffaan kan faalaa jiru biyya kami?

C. Gaaffiiwwan armaan gadii akkaataa odeeffannoo dubbisicha keessatti laatameen Dhugaa ykn Soba jechuun deebisi. Yoo Soba jette sababa kenni.

1. Oozooniin (O_3) qilleensa qulqulluu beeyilladoonni afuura baafatani.
2. Qilleensa faaluu keessatti gaheen ilma namaa olaanadha.
3. Kaarboonmoonooksaayidiin gaazii summaa'ina hinqabne.

4. Amooniyaan gaazii faayidaas miidhaas qabu.
5. Fooliin balfa kuufameefi dhangala'oo xuraa'erraa bahu qilleensa hinfaalu.
6. Faaltonni qilleensaa boba'aafi cilee gubaterraa maddu Salfar'ooksaayidii jedhama.
7. Naayitiroojiin'ooksaayidiin koompaawundii keemikaala foolii badaa qabuufi summiirraa bilisa ta'e.
8. Biyyoota diinagdeen badhaadhan keessatti miidhaan faalamni qilleensaa qaqqabsiisaa jiru gadi aanaadha.
9. Addunyaarratti namoota balaa konkolaataatiin du'anirra kan faalama qilleensaatiin du'antu caala.
10. Faalamni qilleensaa lubbuu namaa qofa osoo hinta'iin diinagdees miidhaa jira.

D. Jechoonni armaan gadii dubbisa armaan olitti dubiste keessaa bahan. Haala hiika galumsaa isaanitiin iddoowwan duwaa himoota armaan gadii akka sirriin xumuran filadhuu barreessi.

- A. murteessaa B. sirnakkoo C. haphachuu D. summaa'aa
E. balaafamaa F. balfa G. dhiibbaa H. maddisiisuu.

1. Investimentiiwwan abbootii qabeenyaa biyya keessaafi biyyoota alaatiin Oromiyaa keessatti gaggeeffamaa jiran biyyattiif galii guddaa _____ danda'u.
2. _____ dhangala'aan Finfinnee keessaa gadi lakkifamu yoo ofeeggannoon too'atamuu baate, uummata gar-jallaa magaalattii jiranirratti miidhaa guddaa fiduu danda'a.
3. Dhangala'aan xuraa'ee warshaalee keessaa bahu garmalee _____ dha.
4. Sochii misooma ariifachiisaa fiduun hiyyummaa dhabamsiisuuf taasifamu keessatti gaheen humna nama qulqullinaan leenji'ee _____ dha.
5. Biqiltoota haaraa dhaabuufi mukkeen uummamaan jiran akka

hinmancaane kunuunsuufi bineensota bosonaa balaarraa eeguudhaan madaalliin _____ akka eeggamu gochuun nidanda'ama.

6. Dhuka'aan Nukileeraa garmalee _____ wanta ta'eef oomishamee hojiirra akka hinoollee dhoorkamuu qaba.
7. Bokkaa cimaan roobee erga caamee booda hurriin samii keessaa wanta _____ f aduun baate.
8. _____ hongeen sababa hiri'ina roobaan uummamu qabeenya beeyiladaarraan gahu dandamachuuf, horsiisee-bultoanni boolla bishaanii qotachuu qabu.

E. Jechoota 'D' jala jiran keessaa C,D, Efi H faallaa isaanii barreessi.



Gilgaala 3:

Shaakala Dubbisuun Boodaa

Deebii gaaffiiwwan armaan gadii hubannoo dubbisicha keessaa argattee fi beekumsa kee waliigalaarratti hundaa'uun dareef dhiheessi.

1. Faalamni qilleensaa Itiyoophiyaarra hagam miidhaa geessisaa jira? Miidhaan yoo gahaa jiraate, maal maal fa'i?
2. Faalama qilleensaa hir'isuu keessatti gaheen barattoota maali?
3. Faalamni qilleensaafi baayyinni uummataa walitti dhufeenya qabu? Akkamitti?
4. Faalamni qilleensaa amma qaqqabaa jiru kun yoo itti fufe, gara fuul-duraa maaltu ta'a jettee yaadda?

Barannoo 2: Caasluga

Yaadannoo

Fufiileefi akaakuu isaaniifi maqaa akka maqibsaatti fayyadamuu

A. Fufilee(maxxantuu)fi Akaakuu Isaanii

Fufii jechuun dhamjecha ykn qaama jechaa taatee, kan qofaatti hiika guutuu hinqabne jechuudha. Kanaafuu, fufiin hiika argachuuf, jecha biraa kan mataa ofii danda'ee dhaabbatuutti maxxanuu qabdi. Gama biraatiin hirkattuu jechuunii dandeenya.

Fakkeenyaaf, fufiin **al-** jettu hiika qabaattus, hiikni ishii ifa ta'uu kan danda'u yoo of danda'aa tokkotti hirkatteedha. Haa ta'u malee, jecha **lama** jedhutti yoo galte, jecha biraa **al-lama** jedhu uumti. Jecha haara'a kana keessatti hiikni ishii si'a kan jedhu ta'a. Afaan Oromoo keessatti hirkattuu gosa lamatu jira. Isaaniis:

1. **Fufii duree:** Fufii jalqaba jechaarratti hirkattu jechuudha.

Fkn. al- hin- wal- ni- fi kkf jalqaba jechoota, alsadi, garmalee, walduukaa, barkumee jedhanitti hirkatu.

2. **Fufii giddee:** Fufii hundee jechaa addaan saaquun gidduu galan. Hataa malee, fufii giddeen qorannoon ballaan geggeeffamee bira hinga'amne.

3. **Fufii duubee:** Fufii dhuma jechaatti hirkattu jechuudha.

Fkn. -icha----- saricha
-oota---- namoota
-tti----- alatti fi kkf



Gilgaala 4:

Shaakala Fufiilee

Jechoonni armaan gadii jecha hundee fi fufiilee ijaarraman. Jechootarraa fufiilee adda baasuun fufii duree ykn fufii duubee ta'u himi.

mitimootummaa	sarummaa	namooma	garlamee	summaa'aa
gaddeemtuu	walqixxummaa	fardeen	faaltota	jalqabuu

B: Maqaa akka Maqibsaatti Fayyadamuu

Gareen jechaa tokko akka garee jecha biraatti tajaajiluu danda'a. Fakkeenyaaf, jechi tokko ramaddii garee maqaa ta'ee osoo jiruu, akka maqibsaatti tajaajiluu danda'a. Fakkeenyaaf, **Buna Jimmaa** yoo jenne, Jimmi maqaa iddooti. Haa ta'u malee, gaalee kana keessatti akka maqibsaatti gale. Bunni waa'ee isaa dubbachaa jirru, buna eessaa ykn kan akkamii akka ta'e ibsa.

**Gilgaala 5****Shaakala maqaa akka maqibsaatti tajaajilamuu**

- I. Gaaleewwan armaan gadii keessatti maqaalee akka maqibsaatti tajaajilan adda baasuun akkamitti akka maqaa ibsan himi.
 1. midhaan mukaa
 2. Tulluu Salaalee
 3. Saawwan Booranaa
 4. rooba arfaasaa
 5. aduu roobaa
 6. guntuta durbaa
 7. Cilee doddotaa
- II. Tokko tokkoo gaaleewwan armaa oliitiin hima mataa keetii barreessuun barsiisaa keetti agarsiisi.

C. Henna Ammeenna

Henna jechuun yeroo danaa gochimaan ibsamu jechuudha.

Hennaan ammeenna gochoota yeroowwan armaan gadiitiinc raawwataman ibsa.

1. Gochoota irra deeddeebi'amuun amaleeffaman.
Fkn. Daraartuun yeroo hunda ganama ganama shaayii dhugdi.
2. Haala amma jiru ibsuuf.
Fkn. Ishiin gammadduudha.
3. Wanta akka waliigalaatti dhugaa ta'e ibsuuf.
Fkn. Bineensi niyuusa.
Kaarbo onmoonooksayidiin gaazii summaa'aadha.
4. Yeroo gara fuulduraa ibsuuf.
Fkn. Qormaanni boru sa'aa 2tti eegala.

**Gilgaala 6:****Shaakala Henna Ammeenna**

- A. Himoota armaan gadii keessaa himoota henna ammeennaatiin barreeffaman adda baasi.
 1. Yoo funyaan dhahan, ijji niboossi.
 2. Namichi daran miidhamaadha.
 3. Manni barumsaa keenya iftaan, gaafa Wiixataa, banama.
 4. Bala konkolaataatiin waggaa waggaa namoonni millionni 1.2 lubbuu isaanii dhabu.
 5. Badhaaneen shoboxee sirbaa jira.
 6. Yaada ofii ibsachuun mirga uummamaati.
 7. Bishaan lubbuudha.
- B. Henna ammeennaatti fayyadamuun himoota mataa keetii shan barreessii barsiisaa keetti agarsiisi.

Boqonnaa 6: Nageenya Karaa

Kaayyoo: Barnoota boqonnaa kanaatiin booda:

- barreeffama siif dhiyaate dubbisuun ergaa dubbifamichaa himta.
- hiika jechootaa akka galumsaatti himta; faallaa jechootaas barreessita.
- faayidaa, sarara xiqqaafi tuttuqaa sirriitti hubachuun barreeffama kee keessatti itti fayyadamta.
- wantoota walbira qabdee tokkummaafi addaddummaa isaanii barreessita.
- faayidaa hennaa amsiiqaa hubachuun hima keessa galchuun itti fayyadamta.
- odeeffannoo gabatee keessaa barreeffamatti jijjiirta.

Barannoo 1: Shaakala Dubbisuufi Dubbachuu



Gilgaala 1:

Shaakala Dubbisuun Duraa

Barreeffama armaan gadii osoo hindubbisin dura gaaffiiwwan itti aanan gareen irratti mari'adhaa.

1. Nageenya karaa jechuun maal jechuudha?
2. Nageenyi karaa konkolaataa Itiyooophiyaa keessatti sadarkaa akkamiirra jira?
3. Biyya keenya keessatti sababoonni balaa konkolaataa maal fa'i?
4. Balaa konkolaataa sukaneessaa agartee beektaa? Yoo agartee beekta ta'e akkamitti akka uummameefi miidhaa hagamii akka qaqqabsiise dareetti himi.
5. Fakkii armaan gadiirraa maal hubatta?



Gilgala 2:

Shaakala Yeroo Dubbisuu

A. Barreeffama “Nageenya Karaa” jedhu saffisaan dubbisuun gaaffiiwwan armaan gadii deebisi.

1. Ergaan waliigalaa barreeffamichaa maali?
2. Dubbisichi keeyyata meeqa qaba?
3. Faayyadamtoonni karaa eenyu fa’i?
4. Balaan konkolaataa dabalaa deemuu isaaf sababni guddaan maali?
5. Balaan konkolaataa biyyoota akkamiitti hammaata?
6. Rakkinni bala konkolaataa Itoophiyaa keessatti hagam cimaadha?

Nageenya Karaa


Yaadni nageenya karaa jedhu, itti fayyadamtoonni karaa konkolaataa hagam balaarraa bilisa ta’anii karaarra bobba’anii akka galan agarsiisa. Itti fayyadamtoota karaa yoo jennu, konkolaachistoota, namoota konkolaataa yaabbatanii imalan, akkasumas namoota lafoo karaarra deeman hammata. Barreeffama kana keessatti akka addunyaattiis ta’ee, akka biyya keenyaatti balaawwan karaarratti uummaman, sababoota isaaniifi fala isaanii ilaalla.

Babal'inni magaalootaafi guddinni industirii saffisaan dabalaa jiru, guddina diinagdee wanta fideef fedhiin geejibaa yeroodhaa gara yerootti dabalaa jira. Haa ta'u malee, hanguma sosochiin geejibaa dabalaa deemu, balaan karaarratti uummamus daran dabalaa jira. Odeeffannoowwan madda adda addaa akka agarsiisanitti addunyaarratti waggaatti namoonni miiliyoonni 1.2 sababa balaa karaarratti uummamuun yoo lubbuu isaanii dhaban, miiliyoonni 20 ol ammoo nimadaa'u ykn qaamaa hir'atu. Yeroo ammaa akka walii-galaatti balaan konkolaataa baayyinaan lubbuu namaa galaafachuun sadarkaa 11ffaarraa yoo jiraatu, bara 2020tti sababa du'aafi qaamaa hiri'inaa ta'uun sadarkaa 3ffaatti ol guddata jedhamee tilmaamameera.

Balaan karaa konkolaataarratti uumamu rakkoo fayyaa uummata addunyaa maraa ta'us, baayyinaan kan uummamu, Itoophiyaa dabalatee, biyyoota galii gadi-aanaafi giddu galeessa qaban keessatti. Itoophiyaa keessatti namoonni lafoo karaa konkolaataarra deemaniifi namoonni konkolaattota daldalaa imaltootaa yaabbatan baayyinaan balaaf kan saaxilaman yoo ta'u, biyyoota qarooman(misooman) keessatti balaan hedduuminaan uummamu konkolaattonni namoota dhuunfaa walitti bu'uuni. Kan baayyinaan miidhamanis konkolaachistootuma abbaa konkolaataa ta'ani. Fakkeenyaaf, Ameerikaatti balaawwan ciccimoon 60% konkolaachistootarra kan gahan yoo ta'u, Itoophiyaatti garuu 5% qofa. Kana jechuun ammoo baayyinni namootaa Itoophiyaa keessatti balaa konkolaataa yeroo tokkootiin du'an kan Ameerikaa harka 30n caala jechuudha. Odeeffannoon bara 1998 bahe tokko akka ibsutti balaa konkolaataatiin Itoophiyaan Ugaandaa duursuun addunyaa keessaa sadarkaa 1ffaarra akka turte mul'isa. Kun ammoo rakkinni kuni biyya keenya keessatti hagam yaadessaa akka ta'e mul'isa.

Gabateen armaan gadii biyyoota addunyaa muraasa keessatti konkolaattota 10,000, kan heeyyama qaban keessaa meeqarra balaa cimaan akka qaqqabu agarsiisa.

Fakkii: Konkolaattoota 10,000 Eeyyama argatan Biyyoota Filaman Keessatti



Akkuma walii-galaatti sababoonni bala konkolaataa qaqqabsiisan gurguddoon, saffisaan oofuu, wantoota sammuu namaa adoochan kan akka alkooliifaa dhuganii oofuu, qabattoo ykn gonfoo mataa haala gahaafi sirrii ta'een itti fayyadamuu dhabuufi rakkina/ hanqina konkolaataan walqabate.

Qu'annoon Itoophiyaa keessatti gaggeeffame tokko balaawwan konkolaataa uummamaniif sababoota armaan gadii addatti kaa'eera.

- Daandiin gahaafi qulqullina sadarkaa isaa eeggate jiraachuu dhabuu.
- Beekumsi uummataa nageenya karaa ilaalchisee jiru gadi-aanaa ta'uu.
- Namoonni, konkolaattoonnifi beeyiladoonni walitti makamanii karaatti fayyadamuu.
- Seerri nageenya karaa ilaallatu gahaan dhabamuu; kan jirus haala gahaan hojiirra oolchuu dhabuu.
- Rakkoo hanqina konkolaataa.

- Namoota miidhamaniif waldhaansi gahaan laatamuu dhabuu.
- Seerri inshuraansii balaa konkolaataa dhabamuu.

Sababoota balaa konkolaataa qaqabsiisan kan armaan olitti tarreeffamaniin alattis namootas ta'ee meeshaalee konkolaataan tokko fe'uu qabuu ol itti fe'uu, hirriba gahaa osoo hinrafin yeroo dheeraaf walitti fufanii oofuu, gama konkolaachistootaatiin naamusni gahaan dhabamuufi kkf bal'inaan mul'atu.

Sababoota balaa konkolaataa armaan olitti ibsamaniin badiin lubbuu namaafi qabeenyarra gahaa jiru daran olaanaadha. Akkuma gabaasa ogeeyyii nageenya karaa(tiraafikoota) irraa yeroo hunda dhageenyuti Magaalaa Finfinneefi naannawa ishii qofa yoo fudhanne, guyyaan osoo balaan hinuummamiin nagaan oole jira jechuun hindanda'amu. Keessumattuu balaawwan tokko tokko garmalee suukaneessaa waan ta'aniif arguu mitii dhagahuun illee namatti ulfaata. Sababa balaa konkolaataatiin, lubbuu imaltoota konkolaataa guutuu akka hintaane ta'uun baduufi qabeenyi qarshii miiliyoonotaatti tilmaamamu daaraa ta'uun waanuma yeroo yeroon qunnamu ta'eera.

Gaaffiin dhumarratti ka'uu malu, "Malli balichaa maali?" kan jedhu ta'a. Balaan amma qunnamaa jiru kun akkanumatti kan itti fufu yoo ta'e, yeroo dhihoo keessatti rakkina cimaa hawaasummaafi diinagdee ta'uun misooma biyyaa gufachiisuu danda'a. Kanaafuu, mootummaafi uummanni waliin ta'uun rakkinicha hiri'suuf, yoo danda'ames hambisuuf, hojjechuu qabu. Uummanni barnoota nageenya karaa ilaalchisee laatamu hunda xiyyeeffannoon hordofuun hojiitti jijjiiruu qaba. Mirgaafi dirqama isaabeekuun, sochii nageenya karaa mirkaneessuuf taasifamu keessatti abbummaan dammaqinaan hirmaachuu qaba. Qaamoni leenjii konkolaachisummaa laatan, leenjii gahaafi qulqullina qabu laachuu qabu. Konkolaachistoonni itti gaafatamummaa ulfaataa baachuu isaanii hubachuun of eeggannoo cimaan konkolaachisuu qabu. Saffisa heeyyamamuu ol oofuun, naamusa badaa agarsiisuun, lubbuu namaa caalaa maallaqaaf dursa kennuun balaaf

nama saaxiluu hubachuun of eeggannoo taasisuu qabu.

Namoonni lafoo daandii konkolaataarra deeman seera tiraafikaa eeguun balaarraa of eeguu qabu. Of eeggannoo taasifamuu qabu keessaa yeroo hunda qarqara daandii karaa bitaa qabataniid demuu, ‘Zeebraa’ irraan cehuu, bitaa-mirga ilaallataniid cehuu, konkolaataa dhaabbatuun dahatanii cehuu dhiisuu, beeyiladoota daandiirra oofuu dhiisuu, ijoolleen akka daandiirratti hintaphanne dhoorkuufi kkf. Kan biraafi inni guddaan, qaama konkolaattotaa yeroo yeroon sakatta’uun nageenya isaanii eeguudha. Dhumarratti of eeggannoo kanneen hunda bira darbee yoo balaan uummame, lubbuun namootaa akka hindabarre gargaarsa atattamaa taasisuufiin gara mana yaalaa dhiheenya jirutti battalumatti geessuun lubbuu miidhamtootaa baraaruu nama hundarraa eeggama.

“ Qabattoo sirriitti hidhachuun, miidhaa balaa konkolaataa 40-60% haa hir’isnu.”

B. Barreeffama armaan olii sakattaan dubbisuun gaaffiiwwan armaan gadii deebisi.

1. Sadarkaa addunyaatti waggaatti namoota meeqatu balaa konkolaataan du’a? Meeqatu madaa’a ykn qaamaa hir’ata?
2. Yeroo ammaa balaan konkolaataa lubbuu namaa galaafachuun sadarkaa meeqaffaarra jira?
3. Bara _____ balaan konkolaataa lubbuu namaa balleessuun sadarkaa 3^{ffa}tti ol guddata.
4. Biyya _____ keessatti balaawwana ciccimoon 60% konkolaachistootarra kan gahu yoo ta’u, Itoophiyaa keessatti garuu balaan ciccimoon konkolaachistootarra gahu _____ % qofa.
5. Bara 1998 Itiyoophiyaan akka addunyaatti balaa konkolaataatiin biyya kam duursuun 1^{ffaa} turte?

C. Barreeffama armaan olii suuta hubannoon dubbisuun gaaffiiwwan armaan gadii deebisi.

1. Baayyinni namootaa balaa konkolaataan biyyoota misoomaniifi kan guddachaa jiran keessatti du'aa jiran maaliif garaagartummaa guddaa godhate?
2. Itiyoophiyaa keessatti namoota akkamiitu baayyinaan balaa konkolaataaf saaxilama? Maalif?
3. Sababoota balaa konkolaataa qaqqabsiisan keessaa yoo xiqqaate afur barreessi.
4. Balaan konkolaataa sukaneessaa jedhamu kan akkamiiti?
5. Balaa konkolaataa hir'isuun dirqama eenyuuti?
6. Of eeggannoon namoota lafoo karaa konkolaataatti fayyadamaniin taasifamuu qabu maal fa'i?
7. Qabattoo hidhachuun miidhaa balaa konkolaataan uumamuu danda'u hagamiin hir'isuu danda'a?

D. Jechoota roga 'A' jalaa, kan barreeffama olitti dubbiste keessaa bahan, hiika isaanii akka galumsaa roga 'B' jala jiran waliin walitti firoomsi.

- | A | B |
|-------------------|--|
| 1. lafoo | A. dhugoomsuu |
| 2. hammata | B. shalagame |
| 3. fala | C. hiikoo/mala |
| 4. hir'ina | D. hubannoo gadi fageenyaa |
| 5. tilmaamame | E. of keessatti qabata |
| 6. saaxilaman | F. nama miilan deemu |
| 7. addatti | G. ittiin of dhoksanii |
| 8. suukkanneessaa | H. miidhama |
| 9. xiyyeeffannoo | I. qofaatti |
| 10. jijjiiruu | J. si'aayinaan |
| 11. mirkaneessuu | K. hamma/kan argaa dhageettidhaaf hintolle |
| 12. dammaqinaan | L. hiikuu |
| 13. dahatanii | M. qaamaa-qalbiin. |

E. Jechoota armaan olii keessaa kan armaan gadiitti tareeffamaniif faalla isaanii barreessi.

- | | |
|----------------|-----------------|
| 1. lafoo | 2. tilmaamame |
| 3. saaxilaman | 4. suukaneessaa |
| 5. daamaqinaan | 6. dahatanii |



Gilgala 3:

Shaakala Dubbisuun Boodaa

Hubannoo dubbifamichaarraa argatteefi beekumsa kee waliigalaarratti hundaa'uun gaaffiiwwan armaan gadii deebisi.

1. Barreeffama dubbisterraa wanta haaraa maal baratte?
2. Ulfinni rakkoo balaa konkolaataa Itiyooophiyaa keessatti qaqqabu kan barreeffamicha keessatti ibsameefi kan ati duraan beektu hagam walsima?
3. Balaa konkolaataa hir'isuuf sirraa maaltu eeggama?
4. Wantoonni naannawa keetti balaa konkolaataaf sababa ta'aniifi kan barreeffama kana keessatti caqafaman hagam walfakkaatu? Sababoonni biraa kan barreeffamicha keessatti hincaqafamin hoo jiruu?
5. Balaa konkolaataan walqabatee muuxannoo addaa, kan hir'oota keef barnoota kenna jettee amantu, yoo jiraate dareetti himi.

Barannoo 2: Caasluga

Yaadannoo

A. Sarara Xiqqaafi Tuttuqaa

I) Sarara xiqqaa (-)

Sarari xiqqaan faayidaalee armaan gadii qaba.

- a) Jecha jechoota lamarraa uumame gidduutti iddoo sagaleen keessaa haftetti gala.

Fkn. - dura + ta'aa = dura-taa'aa

- itti + aanaa = itti-aanaa

- qonnaan + bulaa = qonnaan-bulaa
- diigdamii + lama = diigdamii-lama

b) Qarqara (dhuma) sarara barreeffamaarratti jecha addaan kutuuf. Jechi adda cituu kan qabaatu birsagarratti.

Fkn. Afaan Oromoo afaanoota addunyaaratti bal'inaan dubbataman keessa tokko.

I. Tuttuqaa /Fuftuu (...)

Tuttuqaan barreeffama keessatti yaadni tokko citee hafuu agarsiisa. Iddoo yaada osoo hinbarreeffamiin hafeeti bakka buuti jechuudha.

Fkn. Abbaan Tulluu beeyilladoota gosa heddu kan akka , harree, farda, hoolaa... qaba.



Gilgaala 4:

Shaakala Sirna Tuqaalee

Himoota armaan gadii keessatti sarara xiqqaa (-) fi tuttuqaa (...) bakka barbaachisanatti galchi.

1. Siddiseen intala ayyaan qabeettiidha.
2. Biqiltuun gurra harree jedhamu lafa saqaatti marga.
3. Abbaan Gurmeessaa, “Farda koo ilma kiyya angafa, Gurmeessaaf, Sangaa gurraacha san intala tiyya Ayyaantuuf, gaachana koo” jedhee osoo hinxumuriin lubbuun isaa baate.
4. Biyyoonni Afrikaa Bahaa, Itiyoophiyaa, Keeniiyaa, Jibuutii, _____ Ugaandaadha.
5. Eessumni koo qarshii torbaatamii torba naaf kenne.

B. Henna Amsiiqaa

Hennaan caasluga/seerluga afaanii keessaa gosa tokko yoo ta’u, yeroo gochi tokko itti raawwatame ykn itti ta’e agarsiisa. Hennaan amsiiqaa ammoo gosa henna ammaa yoo ta’u, gocha amma/yeroo dubbiin raawwatamaa jiru wanta ta’aa jiru agarsiisa. Gochi henna amsiiqaatiin ibsamu ammaan

tana ittifufaa wanta jiruuf hinxumuramne .

Fkn. Fardi garbuu nyaachaa jira.

Yeroo himni kun dubbatamu fardi gocha garbuu nyaachuu raawwachaa jira, hinxumurre ykn garbuu fixee ykn quufee nyaachuu hindhabne.



Gilgaala 5:

Shaakala Henna Amsiiqaa

- A. Himoota armaan gadii keessaa, himoota henna amsiiqaatiin barreeffaman adda baasi.
1. Tolashiin Afaan Oromoo barsiisaa jirti.
 2. Caalaan Herrega barsiisa.
 3. Saffisaan Finfinnee bahuuf jira.
 4. Haati Waariyoo Wandaboo uffachaa jirti.
 5. Margaan sangoota bitee gurgura.
 6. Nu'i irbaata nyaachaa jirra.
 7. Kitaabni barataa haarofni hojiirra oolee jira.
 8. Arfaaseen barnoota ishii kan yunivarsiitii xumuraa jirti.
 9. Faalamni qilleensaa guddina dinagdee addunyaarratti dhiibbaa geessisaa jira.
 10. Namoomsaan kitaaba seenaa Oromoo barreesseera.
- B. Henna amsiiqaatti fayyadamuun himoota mataa keetii shan barreessuun barsiisaa keetti agarsiisi.

Barannoo 3: Barreessuu

A. Wantoota walbira qabani barreessuu

Wantoota lama ykn lamaa ol walbira qabani barreessuun, tokkummaafi garaagarummaa wantoota sanneen gidduu jiru agarsiisuu nama dandeessisa. Fakkeenyaaf, keeyyaata armaan gadii dubbisuun garaagarummaa konkolaataan imaluufi xiyyaaran imaluu ibsi.

Konkolaataafi Xiyyaara

Konkolaataan imaluufi xiyyaaran imaluun garaagarummaa heddu qaba. Tokkoffaa, gatiin tajaajilaa konkolaataa kan xiyyaaraarra daran gadi bu'aa ta'us, xiyyaarri saffisaan konkolaataa caala. Konkolaatadhaan imaluun iddoowwan qalbii namaa hawwatan, kan akka bosonaa, tulluu, laggeenifi kkf, daawwachuu nama dandeessisa. Haa ta'u malee, konkolaataan xiyyaara caalaa balaaf kan saaxilame. Qabxiin garaagarummaa biraa ammoo, fageenya isaan deemani. Xiyyaarri osoo galaanaan ykn gufuu biraatiin hindaanga'iin biyyoota heddu qaxxaamuree fageenya kiilomeetira kumaatamaa yoo imalu, konkolaatan haala kanaan imaluu hindanda'u. Akka waliigalaatti konkolaataafi xiyyaaran imaluun faayidaafi hanqina mataa isaa qaba.



Gilgaala 6:

Shaakala Keeyyata Barreessuu

A. Mata-dureewwan armaan gaditti laataman keessaa tokko filachuun akkaataa fakkeenya keeyyata olitti dubbisteen keeyyata tokko barreessi.

1. Gaangee ykn farda yaabbatani imaluu.
2. Baddaa jiraachufi gammoojjii jiraachuu.
3. Saayinsii Hawaasaafi saayinsii uumamaa.

- B. Odeeffannoo gabatee armaan gadii keessatti laatame barreeffamatti geedda ruun keeyyata tokko barreessi.

Gabatee : Hirmaannaa Hojii Baadiyyaatti koorniyaan

T.L	Hojii	Dhiira (%)	Dubartii (%)
1	Hojii qonnaa	60	40
2	Saawwan eeguu	70	30
3	Daa'imman guddisuu	10	90
4	Bishaan waraabuu	10	90
5	Hojii mana keessaa	5	95
6	Gabaadhaa meeshaalee bituu	40	60
7	Manaafi dallaa ijaaruu	70	70

Boqonnaa 7: Jeneraal Taaddasaa Birruu

Kaayyoo: Barnoota boqonnaa kanaatiin booda:

- dubbisa siif dhihaate akkaataa adda addaan dubbisuun ergaa isaa hubatta.
- jechootaaf hiika galumsaa laatta.
- sirna tuqaalee keessaa tuqaafi buufata xiqqaa adda baasuun tajaajila isaanii hubattee himoota kee keessatti itti fayyadamta.
- maqibsaafi gosoota isaa hubatta.
- hennaa raawwima ammeenna hima keessatti itti fayyadamta.
- geerarsa goota faarsuuf naannawa keetti geeraramu funaantee barreessita.

Barannoo 1: Dubbisuufi Dubbachuu



Gilgaala 1:

Shaakala Dubbisuun Duraa

- A. Osoo dubbisa 'Jeneraal Taaddasaa Birruu' jedhu hindubbisiin, gaaffiiwwan armaan gadii gareen irratti mari'adhaa.
1. Suuraawwan fuula itti aanu irratti argaman kan eenyuu fa'i?
 2. Waa'ee Jeneraal Taaddasaa Birruu maal beekta?
 3. Jeneraal Taaddasaa Birruu uummata Oromoof maal gumaache?
 4. Hojiin Jeneraal Taaddasaa Birruu maal ture?
 5. Jeneraal Taaddasaa Birruu eessatti dhalate?



B. Jechoota armaan gadii kan barreeffama dubbisuuf jirtu keessaa bahan hiika isaanii hiriyoota kee waliin irratti mari'adhaa.

- | | |
|----------------|--------------|
| 1. fashaleesse | 2. wareegame |
| 3. haaloo | 4. dararama |



Gilgaala 2:

Shaakala Yeroo Dubbisuu

A. Barreeffama armaan gadii saffisaan dubbisuun gaaffiiwwan kanneen deebisi. Deebii keessan gareen irratti mari'achuun dareef gabaasaa.

1. Hojiin abbaa Jeneraal Taaddasaa maali?
2. Maqaan akaakayyuu Jeneraal Taddasaa eenyu jedhama?
3. Jeneraal Taadasaan barnoota isaa maaf addaan kute?
4. Jeneraal Taaddasaan akkamiin mana hidhaa biyya Sumaaliyaa keessaa bahuu danda'e?
5. Jeneraal Taaddasaan akkamiin loltuu idilee ta'ee qacarama?
6. Haala maaltu akka Jeneraal Taaddasaan yaada isaa geeddaratee qabsoc Oromootti makamu isa taasise?
7. Jeneraal Taaddasaan yeroo lammaffaaf maaliif hidhame?

B. Barreeffama armaan gadii sakattaan dubbisuun gaaffiiwwan kanneen deebisi.

1. Jeneraal Taaddasaan yoomifi eessatti dhalate?
2. Bifti Jeneraal Taaddasaa kan akkammii ture?
3. Haati Jeneraal Taaddasaa abbaan isaa erga du'ee hagamitti duute?
4. Jeneraal Taaddasaan erga booji'amee gara Sumaaliyaatti geeffamee, iddoo maal jedhamutti hidhame?
5. Jeneraal Taaddasaan leenjii loltummaa yeroo duraaf eessatti fudhate?
6. Jeneraal Taaddasaan Itiyooophiyaa keessatti barnoota waraanaa mana barumsa maal jedhamitti barate?
7. Jeneraal Taaddasaan H/sillaasee ajjeesuuf yaalii godhee kan ture yoomi?

Jeneraal Taaddasaa Birruu

Taaddasaa Birruu Godinaa Shawaa Kaabaa (Salaale), Aanaa Hidhaabuu Abootee, Ganda Siree Morosee jedhamutti abbaa isaa Obbo Birruu Kenneefi haadha isaa Aaddee Boontuu Waaqjiraarraa bara 1914 dhalate. Bifti isaa magaala ifaa yoo ta'u, nama dheeraafi dhaabbata qajeelaa qabu ture. Jeneraal Taaddasaan nama tasgabbaa'aa haata'u malee, dandeettii dubbatee nama amansiisuu adda ta'e qaba ture. Walqixxummaa namootaatti wanta amanuuf, namoota sadarkaan isaa gadis ta'ee, isaa ol turan haaluma tokkoon simata ture.

Jeneraal Taaddasaa Birruu ilma qonnaan-bulaa yoo ta'u, osuma barnoota isaa barachaa jiruu, bara 1928 mootummaan abbaa irree Xaaliyaanii biyya keenya weerare. Abbaan Taaddasaa Obbo Birruu Keennee, jaalala biyya isaaf qaburraa kan ka'e, weerara Xaaliyaanii fashaleessee birmaddummaa biyyaa kabachiisuuf gootota biroo waliin bosona lixe. Loltuu cimaa kan ture Obbo Birruun, erga loltoota diinaatiin yeroo dheeraaf walwaraanaa turee booda, aara gaazii summaa'aa loltoota Xaaliyaanitiin dhuka'een gubachuun wareegame. Haati Taaddasaas osuma gadda ulfaataa du'a abbaa warraa

ishii keessa jirtuu, yeroo gabaabaa booda ishiinis du'aan boqotte.

Sanaan booda Taaddasaan haadhaafi abbaa malee qofaatti wanta hafeef barnoota isaa addaan kutuuf dirqame. Yeroo san Taaddasaan umrii ijoollummaa keessa kan tures ta'u, loltoota Xaaliyaanii, of tuulummaan ltiyoophiyaa weeraruun du'a abbaafi haadha isaaf sababa ta'an waraanee haaloo bahuuf ijoollummaan iddoo abbaa isaa bu'ee bosona seene. Yeroo san obboleessi abbaa isaa Balaambaraas Beekaa kan jedhamu Xaaliyaanidhaan lolaa waan tureef, Taaddasaan namoota naannoo isaa amansiisuun fudhatee wasiila isaatti makamee waraana eegale. Haa ta'u malee, lolarratti booji'amee, gara Moqaadishootti geeffamee hidhaan umrii guutuu itti murtaa'ee, iddoo Daniinaa jedhamtutti hidhame. Mana hidhichaa keessattis dhakaa falaxuu dabalatee hojiiwwan daran ulfaataa ta'an hojjechuufi miidhaawwan birootinis osuma dararamaa jiruu, Xaaliyaaniin wanta moo'ameef, mootichi Hayilasillaasee iddoo baqatee turee biyyaatti deebi'e. Moqaadishoonis too'annoo loltoota Ingiliizii jala wanta ooltef, Taaddasaan mana hidhaatii hiikkame.

Oogganaan loltoota Ingiliizii tokko dhaabbataafi dandeettii Taaddasaa hubachuun akka inni loltummaa idileen akka qacaramu waan affeereef, gara Mombaasaa, Keeniyaa deemuun loltummaan leenji'e. Erga leenjii xumuree, kutaalee waraanaa ltoophiyaa adda addaa keessatti tajaajiluun guddina sadarkaa heddu argateera. Bara 1934 gara mana barnootaa waraanaa Holotaa Gannati seenee barnoota saayinsii waraanaa barate. Erga barnoota isaa sadarkaa olaanaan xumuree booda, bara 1937 manuma barumsaa kanatti leenjisa ta'ee ramadamuun tajaajilaa ture.

Yeroo san humna Poolisii cimaa ijaaruun barbaachisaa ta'ee wanta argameef, ajaja Hayilasillaaseetiin gara hoomaa Poolisiitti makamee humna Poolisii darbatamaa jedhamu leenjisee gurmeessuun oogganaa ture. Jeneraal Taaddasaan bara 1956 eegalee hanga Onkoloolessa 1959 mootummaa Hayilasillaaseetiin hidhametti ajajaa olaanaa waraana biyyattii ture.

Taaddasaan bara 1955 muudama Jeneraallummaa kan argate yoo ta'u, cimina hojii isaatiin agarsiiseen badhaasa heddu argateera. Isaan keessa

muraasni:

- Niishaanii Miniliik II
- Niishaanii qondaala Ioltummaa Minilik II
- Niishaanii mormaa
- Niishaanii Hayilasillaasee I
- Niishaanii Tajaajila Waggaa Kudha-shanii.
- Biyya alaatii ammoo, oogganaa biyya Yugoozilaaviyaa kan turan Maarshaal Tiitoorraa Niishaanii badhaafameera.

Jeneraal Taaddasaan dandeettii saayinsii waraanaa olaanaa waan qabuuf, ooggantoota qabsoo bilisummaa biyyoota Afrikaa akka leenjisu H/Sillaaseedhaan dirqamni itti laatamaa ture. Namoota biyya alaa inni leenjise keessaa inni tokko qabsaa'aa bilisummaa beekkamaa kan ta'e Pireezidaantii Aafrikaa Kibbaa duraanii, Neelsan Maandeellaa ture. Neelsaan Maandeellaanis gargaarsa Jeneraal Taaddasaa hin'irraaffanne. Erga yeroo dheeraaf hidhamee hiikamee booda kitaaba waa'ee seenaa jireenyaa isaa kan " Long Walk to Freedom" jedhu keessatti, Jeneraal Taaddasaan bara 1962 nama yeroo duraaf leenjii qabsaa'ummaa isaaf laate ta'uu ibseera. Kanatti aansuun Jeneraal Taaddasaan akkamitti gara qabsoo Oromootti akka makame ilaalla.

Jeneraal Taaddasaan dhalootaan Oromoo haa ta'uu malee, uummanni Itoophiyaa tokkuma kan jedhu ilaalcha biyyaalessummaa cimaa qaba ture. Haaluma kanaan sirna mootummaa yeroo sanii amanamummaan tajaajilaa ture. Amantuma isaa kanarraa kan ka'e, Oromoonni yeroo san cunqursa sirni nafxanyaa uummta Oromoorra geessisaa ture mormuuf sochii taasisaa turan, isaan waliin ta'uun akka socho'u gaafannaan, gaaffii isaanii fudhachuu didee ture. Gaaffii san fudhaachuu dhabuuf sababni inni dhiheessaa ture, "Ani duubatti deebi'ee siyaasa gosaa gaggeessuu hinbarbaadu." kan jedhu ture.

Yeroo san Jeneeraalichi fedhii lammii biyyattii doofummaa keessaa baasuu wanta qabuuf, itti gaafatamummaa birootti dabalataan Pireezidaantii Hoomaa Qubee Biyyaalessaa ta'ee hojjechaa ture. Dhaabbanni kun barnoota biyyattii keessatti babal'isuuf kan dhaabbate ture. Asirrattis

uummata barnootaaf kakaasuun namni hedduun akka baratu gochuun hojji bu'a qabeessa hojjetee ture.

Haa ta'u malee, Jeneraal Taaddasaan ilaalcha Itiyoophiyummaa isaa akka sibiilaa jabaatu san gaaffii keessa galchuun, dhaabbatee of ilaaluun hundee isaatti akka deebi'u wanti isa dammaqse tokko uummamuun hin'oolle. Jeneraalichi sirna mootummaa yeroo saniif amanamaa waan tureef, abbootiin taayitaa sirna nafxanyaa hunduu Jeneraal Taaddasaan akka Amaara ta'etti amanu ture. Guyyaa tokko galgala mana jireenyaa, muummee ministirootaa yeroo sanii kan turan, Akiliiluu Habtawalditti irbaata affeeramanii osuma taphachaa jiranuu, Muummichi ministirootaa, Akiliiluu H/wald Taaddasaadhaan akkas jedheen, *"Taaddasaa! Erga duula barnootaa kana oogganuu eegaltee, barnoota, barnoota jechuu baay'istee jirta. Baradhaa jechuun bayeessa. Haa ta'u malee, eenyu akka barsiisuu qabnu beekuu qabda. Nu'i biyyattii tana kan bulchaa jirru Oromoota, yoo xiqqaate, jaarraa tokkoon duubatti hambisuuni. Yoo haabaratan jettee yaadde, isaan galaanaa nurra dhangala'u."*

Jeneraal Taaddasaan gurra isaa amanuu hindandeenye. Haala inni uummata ija tokkoon ilaalee biyya tokko ijaaruuf ifaajaa jirutti, imaammanni dhoskaa, Oromoo barumsarraa fageessuun doofomsanii bituu jiraachuun isaa akka dammaqu isa taasise. Kan duraan Oromoota waliin akka socho'u kadhatamee dide, kadhatee itti makame. Ergasii sirna gita bittaa nafxanyaarratti hadheeffatee qabsaa'uu eegale.

Jeneraal Taaddasaan erga sochii Oromoonni muraasni mirga uummata Oromoo kabachiisuuf taasisaa turanitti makamee booda, dandeettiifi muuxannoo sanaan dura loltummaafi ooggantummaan horateetti fayyadamuun dammaqinaan wanta qabsaa'eef, sochii taasifamaa ture gara sadarkaa olaanaatti ceesisuu danda'eera. Jeneraal Taaddasaan fonqolcha bara 1953 Jeneraal Mangistuu Niwaayifi Obboleessa isaa Obbo Garmaamee Niwaayiin mootummaa H/Sillaaseerratti aggaamame ture fashaleessuu keessatti gahee olaanaa qaba ture. Garuu bara 1959 jibbiinsa sirnicharraatti horaterra ka'uun matuma isaatiin namoota isa waliin jiran qindeessuun mooticha H/Sillaasee ajjeesuuf yaalii godhee ture. Haa ta'u malee, lootee galtoon/basaastuun isaan fakkaachuun iccitii san

keessatti hirmaate tokko iciticha duurse mootummaaf wanta laateef, yaalichi fashalaa'ee, innis too'annaa jala oolee duuti itti murtaa'e. Boodas mootichi H/Sillaasee murtii du'aa gara hidhaa umrii guutuutti fooyyesseefii Hararitti akka hidhamu taasise.

Sababa kufaatii mootummaa H/Sillaaseetiin hidhaadhaa hiikkame. Mootummaan Dargiis cunqursa uummata Oromoo itti fufsiisuuf waan socho'eef, Jeneraala Taaddasaan mirgi uummatichaa qawween qofa mirkanaa'u danda'a amantii jedhu qabachuun bosona gale. Haa ta'u malee, bosona lixee yeroo gabaabaatti waan qabameef, Bitootessaa 9 bara 1967 ajjeeffame.

C. Dubbisa armaan olii suuta dubbisuun gaaffiiwwan armaan gadii deebisi.

1. Jeneraal Taaddasaan amala akkamii qaba ture?
2. Bara Xaaliyaaniin Itoophiyaa weerartu Taaddasaan nama umrii hagamii ture?
3. Haati Taaddasaa maal taatee duute?
4. Jeneraal Taaddasaan ijoollummaatti barnoota addaan kutee maaliif bosona seene?
5. Hayilasillaaseen maaf baqatee ture?
6. Hojii oogganummaa Jeneraala Taaddasaan hojjeete keessaa inni sadarkaan olaanaa ta'e maal ture?
7. Badhaasoonni adda addaa Jeneraal Taaddasaan badhaafame maal agarsiisa?
8. Abbootiin taayitaa mootummaa H/Sillaasee maaliif Jeneraal Taaddasaa amanaa turan?
9. Bara 1953 maaltu ta'e?

D. Jechoota armaan gadii, kan barreeffamicha keessaa bahaniif, faallaa hiika galumsaa isaanii barreessi.

- | | | |
|------------------|-------------|----------------|
| 1. tasgabbaa'aa | 2. simata | 3. fashaleesse |
| 4. haaloo | 5. dararame | 6. gurmeessuu |
| 7. hin'oolle | 8. ifaajaa | 9. fonqolcha |
| 10. hadheeffatee | | |

E. Jechoota armaan oliitiin himoota mataa keetii barreessi.

**Gilgaala 3:****Shaakala Dubbisuun Boodaa.**

Hubannoo dubbifamichaarraa argatterratti hundaa’uun gaaffiiwwan armaan gadii deebisi. Deebii keessan gareen iirratti mari’achuun dareef gabaasaa.

1. Seenaa Jeneraal Taaddasaarraa maal baratte?
2. Sochii Oromiyaa misoomsuuf taasifamaa jiru keessatti seenaan Jeneraal Taaddasaa Birruu faayidaa maalii qaba?
3. Jeneraal Taaddasaan, abbaan isaafi wasiilli isaa Beekaan Xaaliyaaniidhaan loluuf bosonatti galuun isaanii maal ibsa?
4. Waa’ee jaalala biyyaa ilaalchisee, seenaan Jeneraal Taaddasaa Birruu maal nama barsiisa?

Barannoo 2: Caasluga**Yaadannoo****A. Sirna Tuqaalee**

Sirni tuqaalee mallattoolee barreeffama keessa galuun hiika/ergaa barreeffamaa ifa tasisani. Osoo sirna tuqaaleetti fayyadamuu baannee, walumatti fufnee barreessinee, yaadni tokko eessaa ka’ee eessatti akka xumuramu ykn yaadonni kum akka waliin deemaniifi kkf beekuun rakkisaa ta’a. Barannoo kana keessatti tajaajila tuqaafi buufata xiqqaa baranna.

I. Tuqaa (.)

Bareeffama keessatti tuqaan tajaajiloota armaan gadii qaba.

1. Yaadni (himni) tokko xumuramuu agarsiisuuf.
 - Hirribni naqabe.
 - Kitaaba natti kenni.
2. Kottooffannaa agarsiisuuf.
 - Bilbila = bil.
 - Lakkoofsa = lakk.

3. Gabaajee agaarsiisuuf.

tartiiba lakkoosaa ---T.L.

Yuunivarsiitii Madda Walaabuu----- Y.M.W

4. Herrega keessatti lakkofsa guutuufi haftee adda baasuuf.

20.5

9.12

II. Buufata xiqqaa (;)

Buufanni xiqqaan tajaajiloota armaan gadii qaba.

1. Yaadota guutuu lama gidduu boqonnaan jiraachuu agarsiisuuf.

- Fkn. Barana bokkaan birraa roobe; omishni gaariin ni'argama.
- Gowwaan nibaata; gamni ninyaata.

**Gilgala 4:****Shaakala Sirna Tuqaalee****A. Himoota armaan gadii keessatti iddoo barbaachisutti tuqaafi qoodduu jabaa galchi.**

1. Lammiin ijoollee saddeet qaba
2. Sareen nidutti waraabessi karaa isaati deema
3. Karaa poostaatiin ergaa erguufi fudhachuuf LSP sibaarbaachisa.
4. Barsiisaan yeroo barsiisu barnoota ifa gochuuf fkn laachuu qaba.
5. Caalaan niqota haati manaa isaa nidaldalti
6. KLB Jimmaa barsiisota heddu leenjisee eebbisiise
7. Ushee yoo jedhan harreen gurra dhaabdi

B. Tuqaafi buufata xiqqaatti fayyaadamuun himoota shan barreessii barsiisaa keetti agarsiisi.**B. Maqibsaafi Gosoota Isaa**

Maqibsiin maqaa ykn bamaqaa ibsa. Kana jechuun waa'ee maqaa ykn bamaqaarratti odeeffannoo dabalataa kenna jechuudha. Maqaan ykn bamaqaan kan akkamii, qeeqa, maaliifi wkf akka ta'e ibsa.

Fkn. Oromiyaan badhaatuudha. Ishiin bal'oodhas.

Jechi **badhaatuu** jedhu, **Oromiyaa** ibsa ; inni **bal'oo** jedhu ammoo maqibsa **ishii** jedhu ibsa. Kanafuu jechoonni **badhaatuu** fi **bal'oo** jedhan maqibsoota. Afaan Oromoo keessatti maqibsi maqaa ykn bamaqaa ibsamu sana booda dhufa.

Gosoota Maqibsaa

Maqibsi gosoota armaan gadii qaba.

1. Maqibsoota hangaa

- Fkn. Addunyaa keessatti namoonni **heddu** bishaan qulqulluu hinargatan..
- Daree keessa barattoota **xiqqatu** jira

2. Maqibsoota lakkoofsa agarsiisan

Fkn. Ayyaanaan fardeen **lama** bite.

- Lakkoofsi **lama** jedhu maqaa **fardeen** jedhu ibsa.

3. Maqibsoota abbummaa agarsiisan

Fkn. Manni **keenya** bal'aadha.

- Jaalalli **isaanii** namatti tola.

4. Maqibsoota iyyaafannoo agarsiisan

Fkn. a) Kophee kee kana **meeqan** bitte?

b) Kaayyoon kee kan gara fuulduraa **maali**?

Fkn. (a) keessatti maqibsi **meeqa** jedhu maqaa **kophee** jedhu ibsa. Fkn.(b) keessatti maqibsi **maali** jedhu, maqaa **kaayyoo** jedhu ibsa.

5. Maqibsoota maalummaa agarsiisan

Fkn. Gurbaa **gabaabaan** sun barnootaan cimaadha.

- Warqiin **Wallaggaa** qulqullina olaanaa qaba.

Hub: Maqibsoonni maalummaa agarsiisan maalummaa, bifa, amalaafi kkf ibsu.

**Gilgaala 5:****Shaakala Maqibsaafi Gosoota Isaa**

Himoota armaan gadii keessatti maqibsoota jala sararuun gosa isaanii himi.

1. Qonnaan-bultoanni baayyeen sooroman.
2. Namni gowwaan bona dhadhaa, ganna ammoo ashaboo daldala.
3. Dargaggoonni hedduun bareedina ishii nidingisiifatu.
4. Daldaltichi qarshii dhibba buufate.
5. Toleeraan fayyaa isaa sirriitti eeggata.
6. Ijji Dureettii qorsa fakkaata.
7. Sangaan Harargee faaran gabbata.
8. Intalli diimtuun sun hiriya tiyya.

C. Henna Raawwima Ammeennaa

Raawwimni Ammeennaa akka henna tokkootti tajaajiloota armaan gadii qaba.

1. Gocha duraan eegalee hanga ammaatti itti fufaa jiru ibsuuf.
Fknf: Tolaan waggoota saglan darbe Finfinnee keessa jiraateera.
2. Gocha yeroo darbe keessa raawwatee xumurame, garuu bu'aan isaa amma argamu/mul'atu agarsiisuuf.

Fkf. Jimaan mana ijaarrate.

Koorsaan halbeedhaan harka of mure.

Hub. Hima 1^{ffaa} keessatti manni ijaaramee xumurame. Kanaafuu gochi ijaarsaa amma hinjiru. Kan mul'atu bu'aa gochichaa kan ta'e-**mana**. Hima 2^{ffaa} keessattis gochi harka of muruu raawwatamee darbe. Kan amma mul'atu bu'aa isaa fknf diiga ykn madaa ta'uu mala.

3. Gocha yeroo darbe keessa raawwatame kan yeroon raawwiin isaa hinyaadatanne/hinbeekkamne ibsuuf.

Fkf. Ani Asoossama dheeraa “Godaannisa” jedhu dubbiseera.

Himni armaan olii, yeroo darbe keessa “Godaannisa” dubbisuu koo, garuu kanan yeroon dubbise hinyaddanne ta'uu ibsa. Asirratti bu'aan dubbisa kiyayaa, jechuun beekumsi ergaa assoossamichaa sammuu kiyya keessa jiraachuu ibsa.

**Gilgaala 6:****Shaakala Henna Raawwima Ammeennaa**

- (i) Himoota armaan gadii keessaa kan raawwima ammeennaatiin barreeffaman adda baasi.
1. Hordofaan waggoota kudha-shaniif barsiisaa Fiiziksii ture.
 2. Ani laaqana koo nyaadheera.
 3. Margeen ogummaa Narsiitiin leenjifamteetti.
 4. Hidha Haaromsaa laga Abbaayyaarratti ijaaramaa jiruuf gargaarsi funaan-namaa jira.
 5. Dinqituun kutaa 10 xumurte.
 6. Ayyaanni maatii barattootaa mana barumsaa keenyatti kabajamuuf jira.
 7. Naannoo keenyatti bokkaan cimaan roobera.
- (ii) Henna raawwima ammeennaatti fayyadamuun himoota shan barreessi. Gareen ta'uun himoota keessan walitti agarsiisuun sirrii ta'uu keessan irratti mari'adhaa.

Barannoo 3: Afoola**Yaadannoo****Geerarsa**

Akkumma beekamu uummanni Oromoo jireenya hawaasummaa isaa keessatti ergaa adda addaa dabarsuuf, yaada, fedhii, gadda, gammachuu, jaalaa, quuqqaafi kkf ibsachuuf afoola addaddaatti gargaarama. Afoola keessaa inni tokko geerarsa. Geerarsi kaayyoo adda addaaf geeraramuumala. Isaan keessaa inni tokko goota faarsuuf.

FKn. Geerarsa namni diina ajjeese geeraru

Leenci sardiida miitiree rukunnaan dutti mitii
 Gafarsi loon miitiree dhoofnaan gadooddi mitii
 Arbi daa'ima miitiree rukunnaan boosi mitii
 Boorri koo booradhaaree kan murraan muratu
 Kan tumnaan tumamtu.

**Gilgaala 7:****Shaakala Afoolaa**

Beekumsa keetti fayyadamuun ykn namoota naannoo kee kan geerarsa beekan gaafachuun geerarsa goota faarsuuf geeraramu, yoo xiqqaate sadi, barreessii dareetti dhiheessi. Barreessuu qofa osoo hinta'iin yeedaloo isaa eeguun dareetti geerrari.

Boqonnaa 8: Sirna Nyaataa

Kaayyoo: Barnoota boqonnaa kanaatiin booda:

- dubbisa siif dhihaate dubbisuun dhaamsa isaa himta.
- hiika jechootaa akka galumsaatti himta.
- bamaqaafi gosoota isaa hubachuun barreeffama keessatti sirriitti itti fayyadamta.
- tajaajila hennaa darbeennaa hubachuun himoota keessatti itti fayyadamta.
- tapha ijoolleefi seera taphaa hubachuun taphoota ijoollee naannoo keetti taphatamu beerreessuun dareetti dhiheessita.

Barannoo 1: Dubbisuufi Dubbachuu




Gilgaala 1:

Shaakala Dubbisuun Duraa

Barreeffama armaan gadii osoo hindubbisiin, gaaffiiwwan armaan gadii deebisi.

1. Sirna nyaataa jechuun maal jechuudha?
2. Nyaata fayyaa namaaf mijataa ta'e jechuun maal jechuudha?
3. Yeroo baayyee maal faa nyaatta?
4. Nyaanni ati yeroo heddu nyaattu kun madaallawaadha jettaa? Maaliif?
5. Soorata maal fa'itu dhangaalee (nutireentota) kam kam qabu?
6. Fakkiin armaan gadii maal agarsiisa?



Gilgaala 2:

Shaakala Yeroo Dubbisuu

- A. Barreeffama armaan gadii saffisaan dubbisuun gaaffiiwwan kanneen deebisi. Deebiiwwan keessan gareen irratti mari'adhaatii dareef gabaasaa.
1. Dubbisicha keessatti sirni nyaataa akkamitti ibsame?
 2. Garaagarummaan nyaata uummanni addaddaa nyaatu maaliin murtaa'a?
 4. Nyaatni nu'i nyaannu akkamiin gara qaama keenyaa galuun humna nuuf laata?
 5. Dhangaaleen soorataa gosa meeqa?
- B. Akkaataa odeeffannoo dubbisicha keessatti laatameen, himoota armaan gadii Soba ykn Dhugaa jechuun deebisi. Yoo Soba jette, himichi akka dhugaa ta'utti sirreessii barreessi.
1. Gosti nyaataa iddoowwan adda addaatti nyaataman argamuufi dhaabamuu isaanitiin murtaa'u.
 2. Nyaatni fayyaa namaaf mijataa ta'aniifi madaallawaa ta'an dhibee nurraa ittisuu bira darbanii yoo dhibannellee nu fayyisuu danda'u.
 3. Sooranni nu'i nyaannu erga hanga dhumaatti bullaa'ee booda, wantoonni qaama keenyaaf barbaachisan xuuxxamanii dhiigatti makamuun humna nuuf laatu.
 4. Dhangaaleen hundinuu baay'inuma walqixa ta'een qaama keenyaaf barbaachisu.

5. Viitaaminoonnifi miniraalonni qaama keenyaaf humna hinlaatan.
6. Hanqina nyaataa jechuun yeroo hunda nyaata xiqqoo nyaachuu jechuudha.

Sirnaa Nyaataa

Sirna nyaataa jechuun seelota lubbu-qabeeyyiif wanta jireenyaaf isaan barbaachisan bifa soorataatiin laachufii jechuudha. Sooranni lubbu-qabeeyyii ammoo wanta isaan nyaatani. Keessumattuu wanti ilmi namaa nyaatu barmootaafi aadaan murtaa'a. Wanti hawaasa /adaa tokko keessatti dhangaa mishaa ta'ee nyaatamu, aadaa biraa keessatti kan nyaachuuf hinyaaddamne ta'uu mala. Nyaanni fayyaa namaaf mijataa ta'aniifi madaalawaan rakkoowwan fayyaa addaddaarraa nama baraara; kan dhibames dhibee isaa fayyisuu danda'a. Gama biraatiin hanqinni nyaata madaalawaa dhibeehanqina dhangalee nyaatatiin dhufan kan akka- kuukkii garaachaa (Kiwaashirkoor); Iskaarvii(dhibee hanqina viitaamiin Ctiin dhufu), furdina too'annoon alaa, dhibee onnee, dhibee shukkaaraafi kkf nama saaxila.

Qaamni namaa koompaawundoota keemikaalaa kan akka bishaanii, kaarboohayidireetii (Shukkaara, Istaarchifi halgee(fiber)), Amiinoo a siidootaa pirootiiniirraa argaman, Faatii Asiidootaa kan coomaafi Zayitiirraa argaman, Niyuukleek Asidootaa (DNA fi RND) of keessaa qaba. Koompaawundoonni kun ammoo gama isaaniitiin ilamantoota akka, Kaarboonii, Haayidiroojiinii, Ooksijinii, Naayitroojiinii, Foosfarasii, Kaalshiyeemii, Sibiila, Ziinkii, Maaginiiziyeemii, Maangaaniziifi kkf of keessaa qabu. Koompaawundoonni keemikaalaafi ilamantoonni kun hundinuu bifaafi qindoomina adda addaatiin qaama biqiltootaafi beeyilladoota ilmi namaa sooratu keessatti argamu.

Nyaanni nu'i nyaannu sirna bullaa'insaa qaama keenyaa keessa darbuun hanga dhumaatti keemikaala bulla'insaatiin erga bullaa'ee booda, ilamantoonnifi koompaawundoonni isaan qaban xuuxxamuun karaa ujummoolee dhiigaan qaama seenuun seelotaaf soorata ta'u.

Akka waliigalaatti nyaanni bilcheeffamee hinturiin kan gosa addaddaafi kan warshaa keessatti hin'oomishamiin, nyaata gosa tokkoo kan irra deddeebi'amee nyaatamuufi kan warshaa keessatti oomishame caalaa fayyaa namaaf gaariidha. Keessumattuu kuduraafi muduraa adda addaa soorachuun bullaa'insa nyaataafi xuuxxama koompaawundootaafi ilamantootaa mijeessuun, qaamni keenya humna gahaa akka nyaatarraa argatu taasisa. Dabalataanis guddinaafi fayyummaa seelotaa ni'eega; fedhii nyaataa nisirreessa. Shukkaara dhiiga keenya keessaa nitoo'ata.

Sooranni, dhangaalee (niyuutireentoota) gosa ja'a qaba. Isaanis, kaarboohayidireetii, faatii, pirootiinii, viitaaminii, miniraalotaafi bishaani. Gosti dhangaalee ja'an kun dhangaalee gurguddoo (kan hedduminaan barbaaddaman)fi dhaangaalee xixiqqaa (kan xiqqeenyaan barbaaddaman) jedhamanii lamatti qooddamu. Isaan guguddoon kaarboohayidireetii, faatii, Pirootiiniifi bishaani. Isaan xixiqqaan ammoo, miniraalotaafi viitaaminoota. Dhangalee guguddoon, bishaan malee, qaama keenyaaf humna laatu. Fakkeenyaaf, yoo sooranni nu'i nyaanne haala gaariin bullaa'ee guutumaa guututti xuuxxame, Kaarboohayidireetiifi Pirootiiniin giraamni tokko humna kiiloo kaalorii 4 yoo maddisiisan, faatiin ammoo giraamni tokko kiiloo kaalorii 9 maddisiisa.

Sooratoonni tokko tokko dhangalee hunda ykn irra jireessa yoo qabaatan, kaan ammoo muraasa qofa qabu. Dhibeen addaddaa qaama keenya keessatti kan uummaman hanqina dhangaalee barbaaddamanii ykn heddumina goosa dhangaa tokkootini. Fakkeenyaaf, ashaboofi bishaan fayyaa qaama keenyaaf daran barbaachisaa ta'anillee, hanga barbaaddamanii ol baayyinaan soorannaan nama dhukkubsuu ykn nama ajjeessuullee danda'u. Kanaafuu fayyaa qaama keenyaa eeggachuuf gosa dhangaalee hundarraa hanga fayyummaa qaama keenyaaf gahaa ta'an argachuu qabna. Kana ta'uu baannaan rakkina fayyaa sababa hanqina nyaataatiin dhufutu nuqunnama.

Hanqina nyaataa jechuun xiqqeenya, heddumina ykn madaallii dhabeenya nyaataajechuudha. Xiqqeenya nyaataajechuun yeroo dheeraaf nyaataxiqqaa

humna qaama keenya keessaa bahuun wal hinmadaalle nyaachuudha. Haalli kun ammoo jabina/humna nama dhabsiisuun fayyaa namaas miidha. Nyaata hedduuminaan nyaachuu jechuun ammoo humna qaama keenyaaf barbaachisuu ol baayyee nyaachuu jechuudha. Kuni ammoo rakkoolee fayyaa kan akka furdinaafi ulfina qaamaa daran dabaluu, dabbasaa qaama namaarraa luqqisuu, caccabiinsa qeensaa, dhibee Shukkaaraa, dhiibbaa dhiigaa, kaanseriifi kkf fida. Nyaata madaallawaa hintaane jechuun dhangaa tokko ykn muraasa qofa hanga barbaachisuu ol argachuun kaan ammoo hanga barbaachisan argachuu dhabuu jechuudha. Kuni ammoo rakkoo xiqqeenyaanis ta'ee, hedduuminaan dhufaniif sababa ta'a.

Qu'annoon tokko tokko akka mul'isanitti barattoonni yeroo dheeraaf nyaata fayyaa namaaf mijataa ta'aniifi madaallawaa ta'e argatan dandeettiin sammuufi waa yaadachuu isaanii wanta dabaluu barnoota isaanitiin nicimu. Nyaanni madaallaawwan barattootaaf qofa osoo hinta'iin nama kamiifuu, faayidaa guddaa qaba. Kanaafuu, yeroo hunda nyaata gosa tokko qofa baayyinaan nyaachuu osoo hinta'iin, nyaata gosa addaddaa osoo hinxiqqeessiin; osoo hinbaayyisiin hanga barbaachisu argachuu qabna. Kana gochuuuf ammoo, barreeffama addaddaa waa'ee sirna nyaataa ibsan dubbisuu ykn namoota dhimma kanarratti beekumsa qaban gaafachuu barbaachisa.

C. Barreeffamicha sakatta'aa dubbisuun gaaffiiwwan armaan gadii deebisi. Sanaan booda gareen irratti mari'achuun, dareef gabaasaa.

1. Dhibeewwan haqina dhangaalee soorataatin nama qabuu danda'an lama barreessi.
2. Ilamantoota qaama namaa keessa jiran keessaa sadi barreessi.
3. Dhangaaleen soorataa gosa lamatti qoodamu. Kam fa'i?
4. Faatii giraama tokko keessaa humna hagamtu argama?
5. Miidhaa hanqinni dhangaalee soorataa qaama namaarra qaqqabsiisuu lama barreessi.

D. Jechoota armaan gadii, kan dubbisa armaan olitti dubbiste keessaa bahan, hiika isaanii galumsaa barreessi. Sanaan booda, deebiiwwan keessan gareen irratti mari'achuun hiika walfakkaatu akka laattan ilaalaa.

- | | | | |
|---------------|----------------|-------------|----------------|
| 1. murtaa'a | 2. baraara | 3. mishaa | 4. saaxila |
| 5. qindoomina | 6. bullaa'insa | 7. xuuxxama | 8. madaalawaa. |

E. Jechoota 'D' jala jiran keessaa filachuun iddoowwan duwwaa himoota armaan gadii guuti. Bakka barbaachisetti bifa/akaakuu jechootaa geeddaruu dandeessa.

1. Lubbuu namoota beelaaf saaxilamanii _____ fi, gargaarsi nyaataa godhamuufi qaba.
2. Namni tokko dandeettii qaamaafi sammuu _____ yoo qabaate gahumsa guutuu qaba jechuun nidanda'ama.
3. Yeroo barreessinu, yaadni keenya _____ ifa ta'e qabaachuu isaa hubachuu qabna.
4. Guddinni nama tokkoo hojii isaatiin _____.
5. Baargamoo lafa bishaan qaburra yoo dhaabne, bishaanicha _____ lafa gogsa.
6. Yeroo midhaan daakan dura hororaniiti booda _____.
7. Taliilee: Gara mana kitaabaa deemnee qormaata boruuf haa dubbisnu. Jiituu: Yaada _____ dha. Haa deemnu.



Gilgala 3:

Shaakala Dubbisuun Boodaa

Gaaffiiwwan armaan gadii hubannoo barreeffamicharraa argatteefi beekumsa kee waliigalaarratti hundaa'uun deebisi. Erga dhuunfaan deebistanii booda, gareen irratti mari'achuun dareef gabaasaa.

1. Sirna nyaataa barreeffamicha keessatti dubbisteefi aadaa nyaataa maatii/naannoo keetii yoo walmaddii qabdee madaaltu, hagam walsima?
2. Yeroo baayyee sababni nyaata fayyaa namaaf mijataa ta'aniifi madaalawaa nyaachuu dhabuu dhaba moo wallalaa jetta? Maaliif?
3. Nyaanni fayyaa namaaf mijataa ta'aniifi madaalawaan baayyinaan baadiyyaa moo magaalaatti argama jettee amanta? Maaliif?

4. Naannawa keetti garaagarummaa namoota nyaata gahaa argataniifi hinarganne gidduu jiru hubatteertaa? Yoo beekte, dareetti himi.
5. Sirna nyaataa maatii keefi uummata naannoo keetii fooyyessuuf maaltu sirraa eeggama?

Barannoo 2: Caasluga

Yaadannoo

Bamaqaafi Henna Darbeenna

- I. Bamaqaa jechuun jecha iddoo maqaa bu'uun tajaajilu jechuudha. Barreeffama keessatti maqaa tokko irra deddeebi'uun yoo fayyadamne nama nuffisiisuu danda'a. Nuffii akkasii hambisuuf maqaa yeroo tokko yoo caqasne sanaan booda bamaqaatti fayyadamuu dandeenya.
- Fkn. Intalli magaalli sun obboleettii tiyya. Ishiin barattuu kutaa kurnnaffaati. Jechi **ishiin** jedhu, bamaqaa yoo ta'u gaalee maqaa intalli magaalli jedhu bakka bu'a.



Gilgaala 4:

Shaakala Bamaqaa

Himoota armaan gadii keessatti bamaqaalee jala sarari.

1. Tulluufi Hundeen obbola'a. Isaan daran waljaalatu.
 2. Hordofaan nama bayeessa. Inni nama rakkate gargaaruuf duubatti hinjedhu.
 3. Aniifi Kenneen kaleessa walagarre. Nu'i hiriyoota yeroo dheeraati.
 4. Aannaneen Siifan daran jaalatti. Isa malee ooltee buluu hindanddeessu.
 5. Asteer Gannoo dubartii cimtuudha. Ishiin kitaaba Afaan Oromoo heddu barreessite.
- II. Darbeennaan ykn hennaan darbe tajaajiloota armaan gadii qaba.
 1. Gocha yeroo darbe keessa raawwate ibsuuf.
 - Fkn. 1. Ijoolleen rafan.
 2. Jaalanneen gabaa baate.
 2. Gocha yeroo darbe keessa gocha biraa dura raawwate ibsuuf.
 - Fkn. 1. Yeroon ani mana barumsaa gahu, barnoonni eegalamee ture.
 2. Yeroo isaan dhufan, ishiin deemtee turte.
 3. Gocha yeroo darbe keessa raawwatamaa ture ibsuuf.
 - Fknf: 1. Kaleessa galgala kitaaba Afaan Oromoo dubbisaan ture.
 2. Har'a ganama waa'ee sirna Gadaa mari'achaa turre.

**Gilgaala 5:****Shaakala Henna Darbeenna**

Himoonni armaan gadii henna darbeennatiin barreeffamani. Hima kamtu tajaajila kam akka ibsu adda baasi.

1. Tolaan bishaan waraabe.
2. Erga bokkaan caamee, gara magaalaa deemne.
3. Abbaan Garbii ro'oota shan bite.
4. Imaanaan kaleessa ganama fiigaa ture.
5. Yeroo Obboleessi koo naaf bilbilu, ani rafeen ture.

Barannoo 3: Afoola**Tapha Ijoollee**

Afoolawwan uummata Oromoo biratti bal'inaan beekkaman keessaa inni tokko tapha ijoolleeti. Ijoolleen hiri'oota ta'an yemmuu walitti dhufan taphoota addaddaa taphachuun yeroo isaanii dabarsu. Taphni ijoolleef faayidaa guddaa qaba. Jireenya hawaasummaa nibarsiisa, guddina qaamaafi sammuu isaanii nicimsa. Taphoonni akkuma argametti taphatamu osoo hinta'iin seerota mataa isaanii qabu. Hirmaattoonni hunduu seerota san eeganii taphachuu qabu jechuudha.

Fkn. Seera tapha hiibboo

Tapha hiibboo nama lamaafi sanaa oltu taphata. Namni hiibboo gaafatu 'hiibboo' yemmuu jedhu, kan hiibboo deebisu ammoo 'hibbakka/hibib' jechuun jalaa qaba.

**Gilgaala 6:****Shaakala Tapha Ijoollee**

Taphoota ijoollee naannawa keetti taphataman keessaa lama filachuun seera isaanii eeguun barreessi. Taphoonni kun kan ofii taphachaa guddatte ta'uu malu. Yoo ta'uu baatanis namoota tapha ijoollee sirriitti beekan gaafattee barreessuu dandeessa. Taphoota lamaan barreessite keessaa isa tokko hiri'oota kee waliin daree keessatti taphachuun agarsiisi.

Boqonnaa 9: Miidhaa Ilbiisonni Qaama Beeyilladaarratti Fidan

Kaayyoo: Barnoota boqonnaa kanaatiin booda:

- dubbisa “Miidhaa Ilbiisonni Qaama Beeyilladaarratti Fidan” jedhu dubbisuun hubannoo cimsatta.
- dandeettii dhaggeeffannafi dubbisaa fooyyeffatta.
- hiika galumsaa jechootaafi faallaa jechootaa laatta.
- maalummaa, akaakuufi tajaajila gochimaa hubachuun himoota kee keessatti itti fayyadamta.
- hennaa keessaa tarsiiqaatti sirriitti fayyadamuu shaakalta.
- sheekkoofi gosoota sheekkoo keessaa durdurii adda baastee hubatta.

Barannoo 1: Dhaggeeffachuufi Dubbachuu



Gilgaala 1:

Shaakala Dhaggeeffachuun Duraa

A. Gaaffiiwwan armaan gadii barreeffama barsiisaan keessan dubbisan dhaggeeffachuun dura gareen irratti mari'achuun deebisaa.

1. Ilmi namaa beeyilladarraa faayidaa maalii argata?
2. Wantoota beeyilladaarratti miidhaa geessisan beekta?
3. Miidhaan ilbiisonni qaama beeyilladaarratti geessisan maal fa'i? Miidhaan isaanii hagam cimaadha?

B. Jechoota armaan gadii dhaggeeffachuu keessatti gufuu akka sitti hintaanef hiika isaanii tilmaami.

1. silmii

2. kalloo

3. daayoo

4. injijjii

**Gilgaala 2:****Shaakala Yeroo Dhaggeeffachuu**

Barsiisaan keessan barreeffama “Silmi” jedhu siif dubbisa. Ati ammoo bakka duwwaa siif kenname dhaggeeffachaa guutaa.

1. _____ beeyilada dayoo godhatanii jiraatan keessaa silmiin isa tokko.
2. Miidhaa silmiin geessisu sadarkaa guddina qaamaafi horsiisa beeyilladaa hirrisuura darbee hanga _____ isaanii balleessuutti deemuu danda’a.
3. Akka fakkeeniyatti silmiin tokko injiijjii gara silmiitti guddatan _____ hanga _____ dhalti.
4. Walumaa galatti, maatiin silmi tokko umrii isaanii keessatti dhiiga _____ xuuxuun fixuu nidanda’u.
5. Rakkoo silmiin beeyilladarratti geessisu kana salphisuuf tooftaa adda addaa fayyadamuun dirqama ta’a. Kanneen keessaa, _____, _____ fi _____.

**Gilgaala 3:****Shaakala Dhaggeeffachuun Boodaa**

Gaaffiiwwan armaan gadii akkaataa gaafatamteen deebii afaaniin kenni.

1. Silmiin qaama beeyilladarratti miidhaa akkamii geessisa?
2. Silmiin maaliif ilbisoota qaama beeyilladaatti maxxanuun jiraatan keessatti ramadama?
3. ‘Miidhaan silmi inni duraa, haala hormaataafi jireenya isaarraa kan burqu’ jechuun maal jechuudha?
4. Akkamiin silmiin beeyilada kan dhukkuba sombaa, onneefi tiruuf saaxilu?
5. Silmi akkamiin to’achuun akka danda’amu ibsi.

Barannoo 2: Hiika Jechootaa



Gilgaala 4:

Shaakala Hiika Jechootaa

Jechoota roga “A” jala jiran hiika isaanii roga “B” jala jiraniin walitti firoomsi. Jechoonni kun barreeffama barsiisaan kee shaakala dhaggeeffachuuf siif dhiyeesse keessaa kan ba’ani.

A

1. tooftaa
2. dayoo
3. maxxantuu
4. dhiibbaa
5. hir’isuu
6. dhibee
7. fayyadamuu
8. fidu
9. fooyyessuu
10. burqaa

B

- a. dhukkuba
- b. salphisuu
- c. qaqqabsiisu
- d. gargaaramuu
- e. mala
- f. hirkattuu
- g. bakka jireenyaa
- h. madda
- i. rakkina
- j. xiqqeessuu



Gilgaala 5:

Shaakala Faallaa Jechootaa

A. Jechoota kanaan gadiif hiika faallaa filadhu.

1. harkise

A. dhiise

B. bute

C. fuudhe

D. qabate

2. mamuu

A. shakkuu

B. maallaluu

C. abdachuu

D. yaada

3. bona

A. birraa

B. ganna

C. rooba

D. aduu

4. deega

A. quufa

B. badhaadha

C. horata

D. nyaata

5. summii

A. hadhaa

B. ajjeesaa

C. qorsa

D. mi’aa

B. Jechoota kanaan gaditti kennamaniif hiikaafi faallaa isaanii barreessi

Hiika	Faallaa
1. diida _____	_____
2. moofaa _____	_____
3. firummaa _____	_____
4. raatuu _____	_____
5. haqa _____	_____




Barannoo 3: Dubbisuufi Dubbachuu




Gilgaala 6:

Shaakala Dubbisuun Duraa

- A. Faayidaa beeyilladoonni kanaan gadii hawaasa keessan keessatti qaban irratti mariyadhaa. Faayidaa isaan hawaasa keessan keessatti qabanirratti hundaa'uunis sadarkaa kennaafii.





B. Dubbisa armaan gaditti isiniif dhiyaate dubbisuun dura gaaffiiwwan dhiyaatan gareen irratti mari'achuun dareef afaaniin gabaasaa.

1. Beeyillada qabduu? Faayidaa isaanirraa argattan guddisuuf maal fa'i raawwattu?
2. Miidhaan ilbiisonni beeyillada maatii keessaniirratti geessisaa jiran maal fa'i?
3. Ummani naannoo keessanii faayidaa barbaachisaa ta'e, beeyiladarraa argachaa jira jettanii yaaddu? Yoo hinjiraanne, maaliif? Miidhaan ilbiisonni uummata naannoo keessaniirratti qaqqabsiisaa jiran hangam ballaadha?

C. Jechoota armaan gadii osoo dubbisuu hineegaliin dura hiika isaanii tilmaami.

1. ilbiisa
2. beeyilada
3. miidhaa



Gilgaala 7:

Shaakala Yeroo Dubbisuu

A. Dubbisa armaan gadii ariitiin/saffisaan dubbisuun gaaffiiwwan armaan gadii deebisi.

1. Namni kallattii kamiin fedhii isaa beeyiladarraa guuttata?
2. Ilbiisota beeyiladarratti dhiibbaa geessisan sadii tarreessi.
3. Namni beeyillada 'gammachuu sammuusaafis' nihorsiisaa jechuun maal jechuudha?
4. Rakkoowwan ilbiisonni beeyiladarratti geessisan akkamitti salphisuun danda'ama?
5. Ilbiisonni irra jireessa dhiiga beeyiladaa xuuxuun jiraatu. Rakkooleen isaan dhiiga xuuxuun fidan maal fa'i?

Miidhaa Ilbiisoonni Qaama Beeyiladaarratti Fidan

Jireenya ilmaan namaa keessatti beeyilladooni iddoo guddaa qabu. Kanarraa kan ka'e, namni fedhii isaa adda addaa galmaan ga'achuuf beeyilada gosa adda addaa horsiisaa wajjiniin jiraata. Namni beeyilladoota nyaataaf, aannaniif, geejjibaaf, warreen kaan ammoo gammachuu sammuuuf horsiisaa seenaa dheeraa beeyilada wajjiin akka dabarse nibeekama. Ammas dabarsaa jira.

Haata'u malee, bu'aan namni beeyiladarraa argatu kallattii adda addaan osoo hinmiidhamiin hinafne. Burqaalee miidhaa beeyiladarratti fidan keessaa tokko ilbiisota qaama beeyiladaa dayoo godhatanii jiraatanu. Dhiibbaan ilbiisota adda addaa kan akka silmii, waraanaafi bookee qaama beeyiladarratti fidan baayyee cimaadha. Ilbiisoonni kun, nagaafi jireenya beeyiladaa miidhuurra darbanii, bu'aa beeyiladni naamaaf kennurratti dhiibbaa guddaa geessisuu danda'u.

Haalli jireenya ilbiisotaa irra jireessa dhiiga beeyilladaa xuuxuun waan ta'eef, dhukkuba adda addaa beeyiladarraa gara beeyiladaattii yookaan beeyiladarraa gara namaatti daddabarsuu danda'u. Dhukkubini beeyiladaas kallattiin yookaan alkkallattiin fayyaafi jireenya namaarrattis dhiibbaa cimaa niqaqqabsiisa. Fakkeenyaaf, beeyilladoonni fooniif horsiifamanu dhiibbaa ilbiisotarraa kan ka'e, bu'aan jaraa baayyee xiqqaachuu danda'a.

Dhiibbaawwan ilbiisoonni beeyiladarratti fidan karaa adda addaatiin salphisuun nidanda'ama. Inni jalqabaa, qulqullina beeyiladaa eegudha. Bakka bultii isaanii yeroo yeroon qulqulleessuufi qoricha farra ilbiisotaa biifuun barbaachisaadha. Kana malees, yeroo yeroon beeyiladoota mana yaalaa beeyiladaa geessuun ogeesa beeyiladaa ilaalchisiisuun barbaachisaadha. Dhukkubni tokko tokko beeyiladarraa gara beeyiladaatti daddarbuu waan danda'uuf warreen dhukkubaan miidhaman adda baasuun atattamaan ogeessa beeyiladaa ilaalchisuun dhukkubicha to'achuuf nama gargaara.

B. Gaaffiiwwan armaan gadii dubbisicha suuta dubbisuun deebii kee bar-

reeffamaan kenni.

1. Walitti dhufeenyi namni beeyilada wajjiin qabu maal fakkaata? Walitti dhufeenyi kun hagam ilbiisotaan midhameera jetta?
2. Keeyyata 1^{ffaa} keessatti gaaleen ‘warreen kaan’ jedhu maal agarsiisa?
3. Keeyyata 2^{ffaa} keessatti gaaleen ‘nagaafi jireenya’ jedhu maal agarsiisa?
4. Ergaan barreeffama kanaa maali?



Gilgaala 8:

Shaakala Dubbisuun Boodaa

Gaaffiiwwan armaan gadii hubannoo dubbisarraa argatteefi muuxannoo kee waliitti fiduun deebisi.

1. Akka hubannoo keetiitti miidhaa ilbiisoonni qaama beeyiladarraan ga’an akkam godhanii salphisuun danda’ama jetta?
2. Uummanni naannoo keetii miidhaa ilbiisoonni qaama beeyiladarraan ga’aanu akka rakkoo cimaatti waan fudhate sitti fakkaataa?
3. Mataduree “Beeyilada Kunuunsuu” jedhurratti keeyyata tokko barreessuun daree keetiif dubbisi.

Barannoo 4: Gochimaa



Gilgaala 9:

Shaakala Gochimaa

A. Himoota armaan gadii keessaa gochima addaan baasii barreessi.

- | | |
|---|--------------------------------|
| 1. Mucaan kun baayyee daddafee barreessa. | 2. Tolasaatti bokkaan roobe. |
| 3. Nuti deemaa jirra. | 4. Caalaan kaleessa deeme. |
| 5. Maatii keessan yeroo hunda gargaaraa. | 6. Inni kubbaa taphachaa jira. |
| 7. Kaleessa maaliif hafte? | 8. Eessa deemaa jirta? |
| 9. Jabaannee haabarannu. | 10. Bor wajjiniin deemna. |

Yaadannoo

Gochimni hojii hojjetame tokko yookaan gocha raawwatame tokko kan agarsiisu. Gochimni mathima qeenxee waliin galuufi mathima danuu waliin galu tokko miti. Gochimni mathima danuu waliin galu dhamjecha ‘-an’ yookaan ‘-ne’ maxxanfachuun walta’iinsa mathimaafi gochima agarsiisa.

Matima qeenxeefi gochima isaa:

Fkn: Ani **dhufe**.

Isheen **dhufte**.

Inni **dhufe**.

Matima danuufi gochima isaa:

Fkn: Nuti **dhufne**.

Isin **dhuftan**.

Isaan **dhufan**.

Hundeen gochima fakkeenya armaan olitti kennamanii ‘dhuf’ kana jedhu.

Dhamjecha ‘-e’ ennaa darbe agarsiisa.

Dhamjecha ‘-t’ ramaddii lammaffaa agarsiisa. Kana malees, ramaddii 3ffaa saala dubaraa agarsiisa.

Dhamjecha ‘-an’ danooma ramaddii lammaffaafi sadaffaa yoo agarsiisu, dhamjecha ‘-ne’ ammoo danooma ramaddii tokkoffaa agarsiisa.



Gilgaala 10:

Shaakala Gochimaa

Gochima hundee kanaan gadiirratti mathima qeenxeefi mathima danuu fayyadamuun hima ijaari.

- | | | |
|-----------|----------|--------|
| 1. deem | 2. nyaat | 3. bit |
| 4. ajjees | 5. reeb | |

Barannoo 5: Henna Keessa Tarsiiqaa



Gilgaala 11:

Shaakala Henna Keessa Tarsiiqaa

A. Keeyyata kanaan gadii keessaa jechoota henna keessa tarsiiqaa agarsiisan addaan baasii barreessi.

Guyyaan kaleessaa baayyee gaarii ture. Tolaa wajjin barnoota Afaan Oromoo sa'aa booda qayyaabachaa oolle. Waa'ee henna Afaan Oromoo nu'ii maryachaa jiruu, Caaltuun dhuftee nutti makamte. Akkuma Caaltuun dhufteen, bokkaan roobuu eegale. Nus gara mana mana keenyaatti fiigne. Anis halkan guutuu waan irratti mari'achaa oolle yaadaan bule.

Hennan Tarsiiqaa gocha yeroo darbe keessa raawwatamaa ture tokko agarsiisa.

Fkn Ani taphachaan ture.

Inni fiigaa ture.

Isaan dhufaa turan.

Nuti deemaa turre.

Isin galaa turtan.

B. Himoota henna keessa tarsiiqaa agarsiisan shan barreessuun daree keetiif dubbisi.

C. Garaagarummaa himoota armaan gadiirratti gareen mari'adhaa.

1. A. Inni barreessaa ture.

B. Barreessaa ture inni.

C. Ture inni barreessaa.

2. A. Ishiin nama hinjaallattu.

B. Hinjaallattu ishiin nama.

C. Nama hinjaallattu ishiin.

3. A. Waliin taphachaa turan.

B. Turan waliin taphachaa.

C. Taphachaa turan waliin.

4. A. Guyyaa guutuu boo'aa oolte.

B. Oolte guyyaa guutuu boo'aa.

C. Boo'aa oolte guyyaa guutuu.

5. A. Halkan guutuu qo'achaa

bule.

B. Bule halkan guutuu

qo'achaa.

C. Qo'achaa bule alkan guutuu.



Barannoo 6: Durdurii



Gilgaala 12:

Shaakala Durdurii

A. Fakkiilee armaan gadiirratti gareen mari'adhaa. Harreefi sareen waa'ee maalii dubbachaa jiru jettanii yaaddu? Warabessaafi sareen hoo?



B. Durdurii kanaan gadii eega dubbistee booda yaada isaa hiriyaa keetti himi.

Harreefi Saree

Durdur harreefi sareen biyya tokko keessa waliin jiraataa turan. Otuma waliin jiraatanii gaaf tokko biyyaa bahaanii baduuf ka'an. Amma oduma deeman, oduma deeman aduun isaanitti dhiite. Naannoo aduun isaanitti dhiite kana marga akka gaariitti laliisee margeetu ture. Isaanis boqochuuf gara marga lalisaa sanatti goran.

Harreen margicha ciraachuutti gad-teesse. Sareenis cinaa harree marga laliisaa kanarra ciifte. Harreen marga ishii ciirattee, ciirattee garmalee quufnaan, "Yaa saree ana margi garaa na guutee garaa na afuufee tokkicha alaakee afuura baafadhuu?" jetteen. Sareenis, "Lakkii yaa harree! Akkuma ta'etti danda'iitii obsi malee, yoo ati alaaktu sagalee kee dhagayeet waraabessi nutti dhufa," jetteen. Haa ta'u malee cinqii ishii kana harreen obsuu hindandeenye.

Kanaafuu, amma yeroo lammataaf harreen, "afuura baafachuun qaba," jetteetu sareetti wixxifte. "Egaa jedhiitii sagalee gad qabadhuutii afuura baafadhu," jetteen sareen. Harreen garuu, akka ofii barbaaddetti tokkicha alaaktee afuura baafatte. "Ammas dabaluu?" jetteen harreen sareedhaan. "Egaa ani amman beeku sigorseeraa, kana caalaa ani keessaa hiqabu. Garuu, ammas akkuma ta'etti obsiin siin jedha!" jetteen sareen. Haa ta'u malee, ammas harreen gorsa saree hindhageenye. "Wanti dhufu haa dhufu malee ani bokookee hindu'u," jetteet harreen alaakatti kaate.

Akkuma sareen sodaatte, battaluma sana waraabeessi sagalee harree dhagayuuudhaan gulufee dhufee isaan bira gahuun harree jala seenee

garaa jigse. Xiqqoo tureemmoo yoo asiif achii laalu, cinaa harree sareen nijirti. “Atoo maal asii goota?” jedhee waraabeessi saree gaafate. Sareenis, “Yaa gooftaa koo! Harree faana duuleetan biyyaa bahee as jira,” jetteen. Waraabessis sareedhaan, “Egaa akkas goota,” jedheen. Sareen dafteet, “Tole gooftaa koo!” jetteen . “Harree kana qaliitii foon bifa bifaan baasi!Onnee harree anaaf ol kaayi!Foon hafe hunduu kanuma keeti,” jedheet waraabessi saree ajajee, gara jiruu saatti deeme. Akkanatti lubbuu ishii bira waraabeessi darbuun baayyee waan ishii gammachiiseef, sareen rakkoo malee hojii ajajamete onnee guutuun jalqabdee xumurte. Sareenis erga hojii ishii xumurtee booda, onnee ol kaayi jedhamte sana ofiif nyaatte.

Waraabeessis iddoo dhimmasaa gahaatee gara sareetti deebi’e. Innis, “Saree, kannan siin jedhe sana baafttee?” jedheen. “Maaloo yaa gooftaa koo! Waaqayyo isinitti haa agarsiisu!Foon isin jettan san anillee baaseera jechuun foon hundumaa bifaafi gosa gosaan baasera. Garuu, kan isin ‘anaafi ol kaayi jettan sana harreen of keessaa hinqabdu. Otoo onnee qabaattee harreen maaliif yeroon ani gorsu sana gorsa koo diddiyyuu?” jette sareen waraabeessaan jedhama.

(Madda: Afoola Oromoo, Durdurii, Jildii-V)



Gilgaala 13:

Shaakala Sheekkoo

Maatii kee gaafachuun durdurii tokko barreessi. Durdurii barreessites daree keetiif dubbisuun irratti mariyadha.

Boqonnaa 10: Dhiibbaa Eedsiin Misoomarratti Fidu

Kaayyoo: Barnoota boqonnaa kanaatiin booda:

- hubannoo dhiibbaa eedsiin misoomarratti fidu dubbisuun cimsatta.
- hiika jechootaa laatta.
- gochibsaafi gosoota isaa hubatta.
- maalummaafi tajaajila durduubee(firomsee) hubatta.
- ragaa giraafiidhan dhiyaate gara barreeffamaatti jijjiiruu dandeessa.
- waa'ee HIV/AIDSiiratti falmii gageessuu dandeessa.
- raawwiima darbeennaa himaan barreessita.


Barannoo 1: Dubbisuufi Dubbachuu



Gilgaala 1:

Shaakala Dubbisuun Duraa

'A. Fakkiiwwan armaan gadii bu'uureeffachuun dhiibbaa HIV/AIDSiin geessisuu danda'u irratti gareen mari'adhaa.



B. Dubbisa armaan gaditti isiniif dhiyaate dubbisuun dura, gaaffiiwwan dhiyaatan irratti gareen mari'achuun dareedhaaf barreeffamaan gabaasaa.

1. HIV/AIDS jechuun maal jechuudha?
2. Garaagarummaan HIVfi AIDSii maali?
3. HIV/AIDSii dhukkuba biraarraa maaltu adda isa baasa?
4. HIV/AIDSiin akkamitti guddina biyya tokkoo miidha?
5. Miidhaan HIV/AIDSiin hawaasa naannoo keessanirraa geessisaa jiru maaf fakkaata?

C. Jechoota armaan gaditti dhiyaatan barreeffama keessaatti argatta. Barreeffamicha dubbisuu osoo hineegaliin, hiika isaa tilmaami.

1. gudeeddii
2. dhibee
3. gadadoo
4. lammii



Gilgaala 2:

Shaakala Yeroo Dubbisuu

A. Dubbisa armaan gadii dubbisuun gaaffiiwwan kanneen barreeffamaan dubbisi.

1. HIV/AIDSiin akkamiin namaarraa namaatti daddarba?
2. Gudeeddii to'annaa maleen raawwatamu jechuun maal jechuudha?
3. Namni vaayirasii Eedisiin faalame hanga waggaa saddeetifi sanaa oliif mallattoo tokkollee osoo hinqabaatiin fayyaa fakkaatee maaliif jiraata?
4. Namoonni umriin isaanii waggaa 15 hanga 49 ta'an keessaa baayyeen isaanii maaliif HIV/AIDSii saaxilaman?
5. HIV/AIDSii akkamiin ofirraa ittisuun danda'ama?
6. Dhibeen HIV/AIDSii akkamiin gufuu misooma ta'a?

Dhiibbaa Eedsiin Misoomarratti Fidu

Dhibeewwan ilmaan namaarratti dhiibbaa cimaa fidaa jiran keessaa HIV/AIDSiin isa tokko. Dhibeen HIV/AIDSii saala, amantaa, bakka, bifaafi beekumsa osoo hinfilatiin ilmaan namaa du'aaf saaxilaa jira. Kana malees, dhibeen kun gufuu misoomaa ta'uun addunyaa kana baayyee miidhaa jira.

Qorannaan HIV/AIDSiirratti hanga yonaatti geggeeffame akka ibsutti, dhibeen kun karaa adda addaan darba. Isaanis, gudeeddii saal-qunnamtii to'annaa malee raawwatamu, dhiiga haadha dhukkuba kana qabdurraa daa'imatti darbu, dhiiga nama dhukkuba kana qabu fudhachuufi sibiila qaraqaban adda addaa kan namni dhukkuba kana qabu ittiin fayyadametti fayyadamuudha.

Karaalee dhibeen Eedsii ittiin daddarbu keessaa inni tokko gudeeddii to'annaa malee raawwatamu ta'uun olitti ibsameera. Kana jechuun, dhiirri tokko dubartoota adda addaa waliin yookaan dubartiin tokko dhiira adda addaa waliin yoo quunnamtii saalaa raawwate/raawwate, namoota kanneen keessaa kan dhibee kanaan qabame yoo jiraate kaawwan waliin gahuuf salphaa ta'a jechuudha. Karaan kun hunda caalaa too'annaf rakkisaa ta'ee argameera. Kunis kan ta'uu danda'e sababa lamarraa ka'eeti.

Inni tokko, namni vaayirasii Eedsiitiin faalame hanga waggaa saddeetiifi isaa olitti osoo hinbeekamin qaama keessa waan turuuf, namni vaayirasii Eedsii qabu kun mallattoo tokkollee osoo hinqabaatin fayyaa fakkaatee vaayirasii daddabarsuu isaati. Inni lammataa, sababoota amala hojiifi umritiin kan ka'e, qunnamtiin saalaa namoota gidduutti raawwatama. Akka ragaan qorannoowwan adda adda ibsutti, namoonni umrii waggaa 15 hanga 49 jiran keessaa baayyen isaanii balaa dhibee kanaaf salphaatti saaxilamu. Sababni isaas namoonni umrii olii keessa jiran, qunnamtii saalaa gochuuf kaka'uumsa cimaaf gahumsa waan qabanuufi.

Walumaagalatti, dhibeen kun lammii beekumsaafi dandeettii qabu waan harka caalaatti galaafachaa jiruuf, misoomaafi guddina biyya tokkoo baayyee miidha. Umriin kun, keessattuu, dargaggeeyyiifi shamarran,

akkasumas ga'eessota hojjetanii hindadhabin waan qabatuuf, jarri kunniin hojii misoomaarratti hinbobbaane jechuun, guddinni biyyaa harkifate jechuudha. Mammaaksis "Lubbuun abbaan hineegne lama hinbultu," jedha mitiiree? Kanaafuu, dhibee Eedsiirraa of eegnee hawaasnis akka of eegun gochaa, dhiibbaa dhukkubni kun misoomaarratti qabu haaxiqqeessinu.

B. Dubbisa armaan oliirra deebi'uun erga dubbistee booda, gaaffiiwwan armaan gadditti dhiyaatan 'dhugaa' yokaan 'soba' jechuun deebisi.

1. Dhibeen HIV/AIDSii saala, amantaa, bakka, bifaafi beekumsa nifilata.
2. Miidhaan dhibeen HIV/AIDSii misooma addunyaarratti geessisaa jiru baayyee waan nama sodaachisuu miti.
3. Gudeeddiin to'annaa malee raawwatamu HIV/AIDSii daddabarsuu keessatti karaa isa guddaafi to'achuuf isa baayyee rakkisaadha.
4. Mallattoo dhukkuba HIV/AIDSii osoo hinmullisiin namni tokko waggoota dheeraaf jiraachuu danda'a.
5. Namoonni umrii waggaa 15 hanga 49 jiran keessaa baayyeen isaanii balaa dhibee kanaaf salphaatti hinsaaxilaman.

C. Jechoota himoota kanaa gadii keessatti jala sararamani akka galumsa isaanii hiika isaanii barreessi.


1. Dhibeewwan ilmaan namarratti dhiibbaa cimaa fidaa jiranu keessaa HIV/AIDSiin isa tokko.
2. Dhibee HIV/AIDSiin saala, amantaa, bakka, bifaafi beekumsa osoo hinfilatiin ilmaan namaa du'aaf saaxilaa jira.
3. Akka ragaan qorannoo ibsutti, namoonni umrii waggaa 15 hanga 49 jiran keessaa baayyeen isaanii balaa dhibee kanaaf salphaatti saaxilamu.
4. Umriin kun, keessattuu, dargaggeeyyiifi shamarran, akkasumas ga'eessota hojjetanii hindadhabin waan qabatuuf, jarri kun hojii misoomaarratti hinbobbaane jechuun, guddinni biyyaa harkifate jechuudha.
5. Kanaafuu, dhibee Eedsiirraa of eegnee hawaasnis akka of eegu gochaa, dhiibbaa dhukkubni kun misoomaarratti qabu haaxiqqeessinu.

**Gilgaala 3:****Shaakala Dubbisuun Boodaa**


- A. Yaada dubbisa armaan olitti dubbiste cuunfuun keeyyata tokko barreessi. Keeyyata kees dareetti dubbisi.
- B. Mana yaalaa naannoo keetti argamu deemuun ragaa namoota dhibee HIV/AIDSiin miidhamaa jiranii yookaan miidhaman sassaabuun barreeffama mataduree “Miidhaa HIV/AIDSiin Misooma Naannoo Keenyarratti Geessisaa Jiru” jedhurratti qopheessi. Barreeffama kees barattoota daree keetiif dubbisi.

Barannoo 2: Barreessuu**Gilgaala 4:****Shaakala Ragaa Giraafiin Dhiyaate Barreeffamatti Jijjiiruu**

- A. Ragaalee waa’ee HIV/AIDSii biyya keenya kan bara 2001(1993) giraafii armaan gadiin dhiyaateera. Giraafiiwwan dhiyaatanirratti hundaa’uun gaaffiiwwan armaan gadii deebisi.

Giraafii A. Faca’iinsa HIV Dubartoota Ulfaa Gidduutti

Giraafii B. Baay'na Namoota HIVn Faalaman Umriifi Saalaan



Ragaa: Minsteera Eegumsa Fayyaa Itoophiyaa Onk.2002(1994)Maxxanfame

1. Dubartoota ulfaa umrii kam gidduu jirantu harka caalmaan faca'iinsa HIV/AIDSiin miidhaman?
2. Dubartoota ulfaa umrii kam gidduu jiranitu kan faca'iinsa HIV/AIDSiin xiqqaa miidhaman?
3. Dubartoota ulfaa dhibbeentaa 50 faca'iinsa HIV/AIDSiin miidhaman umrii kamii hanga kamii keessatti argamu?
4. Akka giraafii 'B'tti dhiira moo dubartiidha caalaa kan dhibee HIV/AIDSiin qabame?
5. Akka giraafii 'B'tti, dhiiraafi dubartii umriin isaanii waggaa 25 hanga 29 ta'an dhibee HIV/AIDSiin miidhamaa jiran dhibbeentaa meeqa? Dhibbeentaa jaraa adda adda baasii barreessi. Saala isa kamitu caalaa miidhamaa jira? Maalif jettee yaadda?

- B. Ragaalee giraafii waa'ee HIV/AIDSii kanaa olitti dhiyaatan bu'uureffachuun himoota shan barreessi.
- C. Hubannoo giraafii 'A'fi 'B' rraa argatterratti hundaa'uun keeyyata lama barreessi. Keyyata tokko giraafii 'A'f, keyyaata biroommoo 'B'f godhi.

Barannoo 3: Dubbachuu



Gilgaala 5:

Shaakala Dubbachuu

Qabxiwwan waa'ee HIV/AIDSii kanaan gaditti dhiyaatan keessaa tokko fila-chuun gareen irratti falmii geggeessaa.

1. HIV/AIDSiin dhiira caalaa dubartii miidhaa jira.
2. Namoota dhibee HIV/AIDSiin qabaman uummata keessaa addaan baasanii kophaatti kunuunsuun dhibee kana ittisuuf iddoo guddaa qaba.
3. HIV/AIDSiin misooma biyyoota guddatan caalaa misooma biyyoota guddachaa jiranirratti miidhaa guddaa geessisaa jira.

Barannoo 4: Firoomsee (Durduubee)



Gilgaala 6:

Shaakala Firoomsee

A. Himoota kanaan gadii keessaa firoomsee addaan baasii barreessi.

- Fkn: 1. Tolaan anaafi isa gidduu taa'e.
2. Mucaan keessan akka na bira hindhufne maaliif dhorkitan?
 3. Caaltuuf kitaaba ergisuun barbaade.

Himoota armaan olii kessatti, 'giddu', 'bira' fi '-fn' firoomse jedhamu.

Haaluma kanaan, firoomsitoota himoota kanaan gadii keessatti argaman addaan baasii barreessi.

1. Barsiisaan waa'ee maatii keenyaa nugaafate.
2. Qalama kee teessoo jala barbaadi.
3. Jaldeessi tulluu gubbaa taa'uu jaallata.
4. Qarshichi saanduqa keessa jira.

5. Ana malee namni beeku hinjiru hinjedhiin.
6. Isiniif maal gochuutu nurraa eegama?
7. Mucaa kootiif wayaan bituu barbaade.
8. Inni obboleessa isaa wajjiin deemuu jaallata.

B. Firoomsitoota kanaa gaditti dhiyaatan keessaa filachuun keeyyanni ken-name hiika ga'aa akka qabaatu godhi.

waa'ee	wajjiin	iddoo
-f	malee	irraa
-itti	dura	gara

Barnoonni jireenya ilmaan namaa keessatti 1 guddaa qaba. Barnoota 2 guddina biyya tokkoo galmaan ga'uun baayyee rakkisaadha. Barumsa 3 ilmaan namaa, akkam godhee rakkoo isaa 4 furmaata akka argatu hubata. 5 barnootaa yeroo yaadnu yeroo heddu barattoonni sammuu keenyatti dhufu. Barattoonni qaama uummataa keessaa warreen barnoota idilee irratti bobba'ani jiran. Barattoonni garee uummata biroo 6 ta'uun guddina barnoota biyya isaanii cimsuu keessatti iddoo guddaa qabu.

Yaadannoo

Firomseen jecha maqaa yookiin ba-maqaa dura ykn booda galuun tajaajila adda addaa kenna. Seerluga keessatti, firomseen koorniyaaf, baayyinaafi ramaddiin bifa isaanii kan hinjijjiirre ta'anii argamu.

Fkn.	irra	dura	waa'ee	keessa	wajjin
	gidduu	jala	gara	malee	iddoo
	cinaa	gubbaa	bira		

Fkn.Firoomseen muraasni isaanii ofdanda'ani hiika kan qaban yeroo ta'an, irra caalaan ammoo ofdanda'anii hiika waan hinqabaanneef maxxantoota ta'anii galu.

Kanneen of danda'an

booda

akka

waa'ee

erga

duuba

Kanneen maxxananii galan

-ni

-dhaan

-tiin

-tti

-irra/irraa

-f

-iif

-tiif

-dhaaf

Barannoo 5: Gochibsaafi Gosoota Isaa

Gochibsi hima keessatti gocha ibsuuf tajaajila. Haaluma kanaan, gosoota gochibsa hedduutu argamu. Kanneen keessa: gochibsa akkaataa, gochibsa yeroo, gochibsa bakka, gochibsa irra deddeebii, gochibsa gaaffii, gochibsa sadarkaafi gochibsa firoomsituu gosoota gochibsa warreen gurguddoo ta'uun nicaqasamu.

- Fkn.**
1. Caalaan **saffisaan** deema.
 2. Isheen **amma** dufte.
 3. Kitaaba kee **achi** ka'i.
 4. **Guyya guyyaan** qo'achuutu isin irraa eegama.
 5. Caaltuun **tokkooffaa** ta'uun fiigicha xumurte.
 6. Barattoonni walgaa'ii gandaarratti **baayyinaa** argamani.
 7. Ani **maaliif** akkan waamame naaf hingalle?

Jechoonni ‘saffisaan’, ‘amma’, ‘achi’, ‘guyya guyyaan’, ‘tokkoffaan’, ‘baayyinaa’fi ‘maaliif’ gochibsa ta’uun himmota galan keessatti bakka qabatanii jiru. Faayidaan jaraa akkuma gosa jaraa gara gara. Fakkeenyaaf hima isa jalaqaa keessatti gochibsi ‘saffiisaan’ jedhu, Caalaan haala kamiin akka adeeme agarsiisa. Kanaafu gochibsi kun ‘akkaataa’ jalatti ramadama.



Gilgala 7:

Shaakala Gochibsa

- A. Fakkeenya armaan olitti kennameerratti hundaa’uun, gochibsaa himoota kanaan gadii keessatti aragamanu addaan baasuun dabtara keerratti barreesi. Gochibsa kam akka ta’es agarsiisi.
1. Abdiin carraa argate gammachuun fudhate.
 2. Inni hojii suutaan hojjechuu filata.
 3. Dabtara keessan bakka kana ka’aadha deemaa.
 4. Barsiisaan keenya bor walga’ii nuwaamaniiru.
 5. Isheen gargaarsa hiryootan mana ijaarratte.
 6. Abbaan isaa darbanii darbanii mana barumsaa keenya dhufu.
 7. Battallee Afaan Oromoo yoom akka qabnu barsiisaan keenya nutti hinhimne.
 8. Obbo Caalaan lafa ballinaa qotan.
- B. Keeyyata kanaan gaditti dhiyaate keessaa gochibsa addan baasuun barreesi. Itti aansuun gareen irratti mari’aadhaa.
- Tolaan barataa kutaa sagaliiti. Barnoota isaatiin cimaa, amala isaatiin ammoo gaarii waan ta’eef, barattootaafi barsiisota biratti baayyee jaallatamaadha.

Hojii manaa barsiisaan isaa kennaniif atattamaan hojjeta. Osoo hinhojjetiin mana barumsaa deemee hinbeeku. Gorsaafi qajeelfama barsiistonni isaa kennaniif gamachuufi kabajaan fudhata. Kun ammoo, guyyaa guyyaan jijjiirama barnoota isaarratti akka mullisuuf gargaareeran.

C. Mataduree barbaadde filachuun keeyyata mataa keetii tokko qopheessi. Keeyyatta barreessite keessatti ibsoota gochimaa argamanu jala sarari.

D. Gochibsoota kanaan gadiirratti himoota mataa keetii ijaari.

- | | |
|----------------|-------------------|
| 1. dafee dafee | 6. yoom |
| 2. baayyee | 7. suuta |
| 3. eessa | 8. har'a |
| 4. garmalee | 9. gara-laafinaan |
| 5. sirriitti | 10. jarjaraan |

Barannoo 6: Raawwima Darbeennaa

Raawwiima darbeennaa gochawwan hennaa darbee keessatti raawwataman keessaa gocha isa dursee raawwatame kan ibsuudha.

Fkn. Yeroon ani mana ga'uu, **harmeen koo mana cuftee deemteetti.**

Himi kun gochawwan darban lama ofkessaatti qaba. Inni jalqabaa 'ani mana ga'uu koo' kan ibsu yoo ta'u, inni lammaffaa immo 'harmeen koo mana cuftee deemuushee' kana agarsiisu. Gochawwan kana lamaan keessa kana dura rawwatame 'armeen koo mana cuftee deemteetti' isa jedhu.



Gilgaala 8:

Shaaka Raawwima Darbeennaa

A. Himoota armaan gadii keessaa gocha raawwiima darbeennaa kan agarsiisu addaan baasii barreessi.

1. Yeroo mana geenyu, jarri deemanii turan.
2. Yeroo mana geenyu, inni hojii isaa xumureera.
3. Hojjettoonni waajjira cufanii deemaniiru yeroo nuti achi geenyu.
4. Yeroo isheen dhufte, nuti laaqana keenya nyaannee harka keenya dhiqanneerra.
5. Nuti barreessinee xumurreerra yeroo inni barreessuu eegaluu.

B. Gochawwan cimidii cimdiin kanaan gaditti kennaman fayyadamuun himoota raawwiima darbeenna barreessi.

- | | |
|---------------------|-----------------------|
| 1. dhufe-----deemne | 2. maxxanse-----baane |
| 3. geessu-----bahan | 4. geessu-----ciisne |
| 5. roobe-----geenye | |

C. Hima raawwiima darbeenna kan agarsiisanu kan mataa keetii shan barreessi.

Boqonnaa 11: Ispoortii Aadaa

Kaayyoo: Barnoota boqonnaa kanaatiin booda:

- dubbisa 'Ispoortii Aadaa' jedhu jalatti dhiyaate dubbisuun yaada isaa hubatta.
- jechootaafi gaaleewwaniif hiika galumsaa laatta.
- walsimannaa mathimaa, anthimaafi gochimaa hima keessatti hubatta.
- hima keessatti sababaafi bu'aa addaan baasuu dandeessa.
- hennaa keessa muraannaa hima keessa galchuun barreessita.


Barannoo 1: Dubbisuufi Dubbachuu



Gilgaala 1:

Shaakala Dubbisuun Duraa

A. Fakkiiwwan kanaan gadiirratti gareen mari'adhaa.





B. Dubbisa armaan gaditti isiniif dhiyaate dubbisuun dura gaaffiiwwan dhiyaatan gareen irratti mari'achuun dareedhaaf afaaniin gabaasaa.

1. Ispoortii aadaa Oromoo keessaa kam faa beektu?
2. Ispoortii aadaa Oromoo naannoo keessanitti taphataman kam fa'i beektu? Enyu fa'itu taphata? Ijoollee, dargaggoo, jaarsoolii...?Akkamiin akka taphatamanis ibsaa.
3. Garaagarummaa ispoortii aadaafi ispoortii ammayyaa maal beektu?

C. Jechoota armaan gaditti dhiyaatan dubbisa keessaatti argatta. Dubbisicha dubbisuu osoo hineegaliin dura hiika isaanii tilmaami.

1. qarooma
2. aadaa
3. finqilaachoo
4. kollee
5. mudatan



Gilgaala 2:

Shaakala Yeroo Dubbisuu

- A. Dubbisa armaan gadii ariitidhaan/saffisaan dubbisuudhaan gaaffiwwan armaan gadii deebisi.
- Ispoortiin aadaa ijoolleef faayidaa maalii qaba?
 - Gosoota ispoortii aadaa Oromoo ta'an keessaa muraasa barreessi.

A. _____	D. _____
B. _____	E. _____
C. _____	F. _____
 - Gaheen maanguddoonni guddina ispoortii aadaa Oromoo keessatti qaban maal fakkaata?
 - Ispoortiin aadaa Oromoo keessatti maaliif iddoo guddaa qaba jedhama?
 - Ispoortiin aadaa akkamitti ijoolleen rakkoolee jireenya isaanii keessatti isaan mudatan akka salphaatti hiikan akka gargaaru ibsi.

Ispoortii Aadaa

Aadaa uummata Oromoo keessaa ispoortiin isa tokko. Uummanni Oromoo haala addaddaa keessatti kan taphatu ispoortii aadaa ta'an hedduu qaba. Akka haaraatti gurmaayee, sadarkaadhaan cimee, hanga shaampiyooniiti hindeemin malee, aadaa Oromoo keessatti tapha jedhamee kan waamamu baayyeedha.

Ispoortii aadaa keessatti kan lakkaa'aman kan akka takkooyyee, fiigichoo, geengoo dha'uu, fiqilaachoo, mucucoo, darbachoofi wkf hedduutu jiru. Taphoonni kun kan ijoollee, kan dargaggootaan, warreen biroo ammo jarsooliin taphatamu. Akkuma ijoolleen guddachaa deemaniin taphni isaaniis geeddaramaa deema. Kollee, waldhaansoo, walharkisoo, daakkaa, farda gulfsiisuu, dhagaa qeeruu, ol kaasuu, saddeeqa taphachuufi kan kana fakkaataniin wal dorgomsiiisuun dandeettiin ijoollee qaramaa deema.

Ispoortiin aadaa, ijoolleen jabina qaamaa, sammuu, obsa, abdiifi hamilee akka qabaatan gochuu keessatti iddoo guddaa qaba. Kun ammoo ijoolleen jabina qamaafi sammuu argachuun rakkoolee jireenya keessatti isaan mudatan akka salphaatti akka moo'an gargaaran. Kana malees, ispoortiin aadaa, Oromoon waggootii hedduuf biyya, aadaafi maalummaa isaa eeggatee akka turu dandeessiseera.

Gaheen maanguddoonni tapha aadaa kana keessatti qabanis baayyee guddaadha. Maanguddoonni, tapha ijoollee kan akka waldhaansoo, fiigichoo, kolleefi wwf doo'atanii, isa moo'ateen "jagna qomcee" jedhanii yoo faarsan, isa moo'atameen ammoo "Atimmoo yeroo biraatti qophaayi, nimoo'ata," jedhanii jajjabeessu. Haaluma kanaan isaanis jabaatanii shaakaluun dandeettii tapha isaanii nifooyyeffatu.

Walumaagalatti, ispoortiin aadaa uummata Oromoo biratti iddoo guddaa qaba. Kanaafuu, cimina qaamaa, bilchina sammuu fi walitti dhufeenya hawaasummaa dargaggeeyyii cimsuuf ispoortiin aadaa guddachuu qabu. Mee hagam ispoortii aadaa Oromoo akka beeknuufi akka taphannu of haagaafannu?

B. Dubbisa armaan olitti dhiyaate irra deebi'uun dubbisuudhaan jechootaafi gaaleewwan armaan gadii walitti firoomsi.

- | A | B |
|------------------|------------------------|
| 1. gurmaaye | a. jijjiiramaa |
| 2. baayyeedha | b. jabeessan |
| 3. warreen biroo | c. mijaayee, qindaa'ee |
| 4. geeddaramaa | d. kaan, kanbiraa |
| 5. faarsan | e. hedduudha |

- C. Gabatee armaan gadii dabtara keerratii garagalchuun, yaada ijoo keeyyata barreeffa kanaan oliitti dubbiste fuuldura lakkofsa keeyyatichaa duratti barreessi.

Lakk. Keeyyataa	Yaada Ijoo
1. Keeyyata 1 ^{ffaa}	
2. Keeyyata 2 ^{ffaa}	
3. Keeyyata 3 ^{ffaa}	
4. Keeyyata 4 ^{ffaa}	
5. Keeyyata 5 ^{ffaa}	



Gilgaala 3:

Shaakala Dubbisuun Boodaa

- A. Yaada dubbisa armaan oliitti dubbisterratti hunda'uun keeyyata mataa keetii tokko barreessi.
- B. Tapha aadaa naannoo keetti taphatamu tokko, maatii kee yookaan maanguddoo naannoo keetii gaafachuun barreeffama tokko qopheessi. Barreeffamni kees, taphichi eenyuun akka taphatamu, yoom akka taphatamu, akkamiin akka taphatamu, maaliif akka taphatamuufi faayidaa akkamii jireenya namaa keessatti akka qabu of keessatti haammatu.

Barannoo 2: Caasluga



Gilgaala 4:

Shaakala Walsimannaa Mathimaa, Anthimaafi Gochimaa

- A. Himoota kanaan gadii irra deebi'uun ergaa sirrii akka kennan godhii barresssi.
1. taphachuu inni jaallata kubbaa.
 2. obboleessa ishiin ishii gargaarti baayyee.
 3. jira xalayaa ani barreessaan.
 4. dhangalaaste bishaan teessoo irratti mucaan.
 5. Barattoonni quluqulleessan isaanii naannoo.

B. Himoota kanaan gadii keessatti mathimni, anthimniifi gochimni wal hinsimne. Walsimsiisuun irra deebi’ii barreessi.

- | | |
|---------------------------------------|-----------------------------|
| 1. Mucaan biddeena nyaachuu jalqaban. | 2. Jarri mana ijaaree jara. |
| 3. Harmeen koo kitaaba naaf bite. | 4. Bokkaan roobaa jiru. |
| 5. Hoolaan marga dheeda. | |

C. Jechoota kanaa gadiitti dhiyaatan irratti himoota mataa keetii barreessi.

- | | | |
|----------|------------|----------------|
| 1. fide | 2. kenne | 3. liqeeffatte |
| 4. deeme | 5. ajjeese | |

Yaadannoo

Mathimni kan gocha himicha raawwatu ykn waa’een isaa himamu. Yeroo hedduu mathimni jalqaba himaarratti argama.

Fkn: **Tolaan** bishaan waraabe.

Ishiin biddeen tolchaa jirti.

Jechoonni jalaqabarratti galan, “Tolaan” fi “Ishiin” mathima jedhamu. “Eenyutu maal godhe?” isa jedhu himoota keessatti deebisu.

Anthimni hima keessatti mathimni gocha raawwate maal irratti akka raawwate agarsiisa.

Fakkeenya kanaan olii keessatti “bishaan”fi “biddeen” anthima jedhamu. Sababni isaa gochawwan rawwataman kan isaanratti raawwataman waan ta’eef.

Haaluma kanaan, jechoonni “waraabe”fi “tolchaa jiirti” himoota akka fakkeeniyatti kanaan olitti dhiyaatan keessatti argaman gochawwan jedhamani waamamu. Gochi hima tokko keessatti mathimni maal akka raawwate, maal akka fakkaatu, maal akka yaadeefi kkf bakka bu’uun tajaajila.



Gilgaala 5: Shaakala Henna Keessa Murannaa

A. Waan fuulduratti hojjechuuf karoofatte shan barreessi.

- Fkn: 1. Ani dabtara haaraa bitachuuf.
2. Ani xalayaa hiri'yya koo biyya alaa jiruuf barreessuuf.

B. Odeeffannoo gabatee kanaan gadii keessatti dhiyaate irratti hundaa'uun Tolaan torbee dhufu keessa maal hojjechuuf akka karoofateefi akka hinkaroofanne barreessi.

Tolaa	Sanbata Xiqqaa	Dilbata
	fira gaafachuu	Rifeensa sirreeffachuu
	Horii tiksuu	Kophee qulqulleeffachuu
	Hojii manaa hojjechuu	Magaalaa deemuu

C. Cimdii cimdiin ta'uun waan torbee dhufu, ji'a dhufuufi waggaa dhufu hojjechuuf karoofattan walgaafadhaa. Gabatee kanaan gadii dabtara keessan irratti erga garagalchitanii booda, hiriyaan keessan maal hojjechuuf akka karoofate gaafachuun keessatti barressaa.

Maqaa Hiriyya keetii	Waan hojjechuuf karoofatte/ karoofate		
	Torbee dhufu	Ji'a dhufu	Waggaa dhufu

Yaadannoo

Hennaa keessa murannaan gocha fuulduratti raawwatamuuf murtaa'e tokko agarsiisa.

Fkn: Inni deemuufi.

Ishiin galuufi.

Jarri dhufuufi.

Himoota armaan olii keessatti gochawwan “deem-”, “gal-” fi “dhuf-” jedhan irratti dhamjechi “-uf” jedhu maxxannuun gochawwan fulduratti raawwatamuuf murtaa'an agarsiisa.



Gilgaala 6:

Shaakala Sababaafi Bu'aa

Himoota kanaan gaditti dhiyaatan keessaa qaama sababaafi bu'aa agarsiisan addaan baasii barreessi.

1. Waan yeroon itti darbeef laaqana isaa osoo hinnyaatiin mana barumsaa deeme.
2. Waan baayyee qo'ateef qabxii gaarii argate.
3. Qulqullina isaa waan eeggatuuf yeroo mara hindhukkubsatu.
4. Amala gaarii waan qabduuf namoonni heddu nijaallatuun.
5. Hojii manaa hojjetanii waan hindhufneef yeroo hunda barsiisaa isaanii wajjin wallolu.

Boqonnaa 12: Fardaan Gulufuu

Kaayyoo: Barnoota boqonnaa kanaatiin booda:

- aadaa Oromoo keessatti fardaan gulufuun bakka guddaa qabaachuu isaa dubbisa dubbisuun hubatta.
- jechoota bakka duwwaatti galchuun himaan walsimsiisuu dandeessa.
- jechoota hiika tokkoo ol qaban hubatta.
- hima ijoo keeyyata keessaa baasuun hubatta.
- gumee qopheessuun keeyyata barreessuu dandeessa.
- sirna tuqaalee keeyyata keessatti sirriitti fayyadamuu dandeessa.
- muraannaala hima keessa galchuun itti fayyadamuu dandeessa.

Barannoo 1: Dubbisuufi Dubbaachuu



Gilgaala 1:

Shaakala Dubbisuun Duraa

A. Dubbisa armaan gaditti isiniif dhiyaate dubbisuun dura, gaaffiiwwan dhiyaatan gareen irratti mari'achuun dareef afaaniin gabaasaa.

1. Farda gulufsiistee beektaa? Yoo beekte jalqabaaf yoom akka gulufsiiste niyaadattaa? Yeroo jalqabaaf yemmuu gulufsiitu maaltu sitti dhaga'ame?
2. Namoonni maaliif farda gulufsiisu jettee yaadda? Aadaa Oromoo keessatti farda gulufsiisun bakki inni qabu hangami? Maaliif jettee yaadda?
3. Naannoo keessanitti aadaan farda gulufsiisuu jiraa? Yoo jiraate, haala akka-mii keessatti kan namoonni farda gulufsiisan?

B. Jechoota armaan gaditti dhiyaatan barreeffama keessaatti niargatta. Barreeffamicha dubbisuu osoo hineegaliin dura hiika isaanii tilmaami.

1. bobba'uu.
2. faarsuu
3. limixii
4. miira




Gilgaala 2:

Shaakala Yeroo Dubbisuu

A. Dubbisa armaan gadii ariitiin dubbisuun gaaffiiwwan dhiyaatan deebisi.

1. Dargaggoonni Oromoo erga raaba seenanii booda dirqama akkamii ba'aa turan?
2. Loltuu Oromoo tokkoofi farda isaa gidduu jaalalliifi hariiroon isaan qaban maal fakkaata ture?
3. Dargaggoota yeroo leenjii isaanii si'aayinaan caalmaa qaban keessaa filatamanii leenjii addaa akkamiitu laatamaafii ture?
4. Faayidaan fardaan gulufuu maal fa'i?
5. Yeroo lolaa biyya eeguuf dubartoonni Oromoo fardaan gulufuu keessatti iddoon isaan qaban maal fakkaata?



Fardaan Gulufuu

Aadaa Oromoo keessaa inni tokko fardaan gulufuudha. Abaabileefi akaakileen keenya biyya isaanii Oromiyaa hanga jaarraa darbeetti diinarraa ittisanii kan tursuu danda’an ogummaa fardaan loluutiin akka ta’e galmeen seenaa ni ibsa.

Haalliifi adeemsi dargaggoonni Oromoo fardaan loluu keessatti qaban guluffiin fardaa iddoo guddaa qaba. Dargaggoon Oromoo erga raaba seenanii booda osoo lola irratti hinbobba’iin barumsaafi leenjii isaaniirratti muuxannoo akka horataniif naannoo isaanii irraa fagaatanii loon eeguudhaaf dirqama ji’a ja’a caaluuf bobba’u. Yeroo sanatti bineensa adamsuun leenjii keessatti barumsa argatan hojiirra oolchuu jalqabu. Kunis jabinaafi obsa hedduu barbaada ture. Leenjichis guyyaafi halkan osoo hinjedhiin si’aan dirqama itti laatame fiixaan baafachuu gaafata. Laga cehuu, gaara bahuu, bosona limixii keessa kutuufi yeroo dheeraaf qabsoon leenca, gafarsaafi qeerransa wajjiin qabaa dabarsuun waliijalatti “fora bahuu” jedhama. Dargaggeessi Oromoo “fora bahu” obsa ficcisiisaa sana keessa bahee gaachana ummata Oromoo ta’a ture. Erga sadarkaa kana darbee booda, barumsi itti fufu leenjii buttummaafi farda gulufsiisuuti.

Dargaggoota yeroo leenjiin isaanii si’aayinaan caalmaa kan qaban keessaa filatamanii leenjiin addaa laatamaaf. Isaan akkasiis “buttuu” jedhamu. Buttuun yeroo barbaachisetti fardaan yeroo kaan ammoo, lafoo ta’anii loluu akka danda’anitti addaan leenjifamu. Si’aayina qaamaatiinis dorgomaa akka hinqabaanneetti jabaatu. Buttuu qofaaf osoo hintaane, farda buttuufis leenjiin akka gaariitti laatamaaf.

Loltuu Oromoo tokkoofi farda isaa gidduu jaalalliifi hariiroon ture haala hiriyaa yookiin dhibantaati. Namni fardi lolarratti jalaa du’e akka waan obbolessi yookiin firri jabaan jalaa du’eetti gaddanii namicha jajjabeessu; loon gurguranii farda bitanii bakka buusuuf.

Lola biyya ofii eeguu keessatti dhiira qofa osoo hintaane, dubartoonni Oromoos qooda guddaa qabu turan. Yeroo lolaa qe'ee isaanii eeguun gamatti, dirree lolaatti hanga fardaan loluutti gahaniiru. Galaa qopheessanii, dirree lolaatti dhiira faana bu'aanii weedduudhaan jajjabeessuun waan haadhooliin keenya keessa darbani. Jagnoota faarsuufi dabeessa salphisuun qooda dubartoonni Oromoo biyya isaanii eeguu keessaa qaban ture. Goota du'es faarsanii yaadannoon isaa akka miira loltootaa kakaasuuf hamileen isaanii akka jabaatu taasisaa turan.

Dabalataanis, fardaan gulufuun jabeenya qaamaa cimsuuf fayyada. Kanaafuu, ijoollummaa irraa qabani shaakaluun, ofiifis cimina qaamaa akkasumas dorgomanii maaqaafi galii argachuu nama dandeessisa. Kanaa olis, fardaan guluufun aadaa Oromoo keessaa isa guddaa tokko waan ta'eef aadaan kun akka jabaatee itti fufuuf bu'aa guddaa buusuu qabna.

B. Dubbisa armaan olitti dubbiste irratti hundaa'uun himoota armaan gadii 'dhugaa' yookaan 'soba' jedhii deebisi.

1. Dubartoonni Oromoo hanga fardaan loluutti ga'aanii turan.
2. Dargaggoonni Oromoo erga raaba seenanii booda osoo lola irratti hinbobba'in barumsaafi leenjii isaaniirratti muuxannoo akka horataniif naannoo isaanii irraa fagaatanii loon eeguudhaaf dirqama ji'a sagalii caaluuf bobba'u.
3. Walitti dhufeenyi loltuu Oromoo tokkoofi farda isaa gidduu jaalalliifi hariiroon ture haala hiriyya yookiin dhibantaati.
4. Dargaggeessi Oromoo "fora bahuu" obsa ficcisiisaa keessa osoo hinbahiin dura sadarkaa leenjii buttummaafi farda gulufsiisuuti darbu turani.
5. Farda gulufsiisuun aadaa Oromoo keessatti bakka guddaa dhabaa dhufeera.

C. Jechoota kanaa gaditti kennaman bakka duwwaatti galchuun himaan walsimsiisi.

limixii gamatti miira raaba ficcisiisaa

1. Dargaggoon Oromoo erga _____ seenanii booda osoo lola irratti hinbobba'in baruumsaafi leenjii isaaniirratti muuxannoo akka horataniif naannoo isaanii irraa fagaatanii loon eeguudhaaf dirqama ji'a ja'a caaluuf bobba'u.
2. Dargaggeessi Oromoo "fora bahu" obsa _____ keessa bahee gaachana ummata Oromoo ta'a ture.
3. Yeroo lolaa qe'ee isaanii eeguun _____, dubartoonni Oromoo dirree lolaatti hanga fardaan loluutti gahaniiru.
4. Sodaa tokko malee dukkana _____ keessa deemu turan.
5. Dubartoonni sirbaan dhiira faarsanii _____ isaanii kakaasu.

D. Jechoonni kanaan gadii hiika tokkoo ol qabu. Hiika isaanii xiyyeeffachuun himoota irratti ijaari.

- | | | |
|-----------|---------|-----------|
| 1. boqote | 2. lafa | 3. dhahuu |
| 4. harree | 5. qore | |



Gilgaala 3:

Shaakala Dubbisuun Boodaa

- A. Yaada dubbisa armaan olitti dubbiste irratti hundaa'uun aadaa Oromoo keessatti fardi iddoo guddaa qabaachuu isaa namoota adda addaa gaafachuun barreeffama tokko barreessi. Barreeffama kees dareef dubbisi.
- B. Dubbisa armaan olitti dhiyaate bu'uura godhachuun, ispoortii aadaa naannoo keetti argamu tokko irratti barreeffama qopheessi. Barreeffamni kees seenaafi aadaa Oromoo keessatti bakki ispoortichi qabu akka agarsiisu haata'u.

Barannoo 2: Barreessuu



Gilgaala 4:

Shaakala Keeyyata Barreessuu

A. Hima ijoo keeyyata kanaan gaditti dhiyaate keessaa baasuun barreessi.

Keeyyata 1

Beektonni adda addaa afoolaaf hiika garaa garaa kennu. Hiikaawwan muraasni afoola kallattlii ogbarruutiin yoo ibsan, warreen biroo ammoo afoola karaa falaasamaafi ilaalcha hawaasa tokkootiin agarsiisu. Akka waliigalaatti hiikni afoola beektota heddu biratti fudhatama qaba jedhamee yaadama hiikni isaa dhimmoota heddu of keessaatti hammatee argama. Hikichis akkaas jedha: Afoolli gosa ogbarruu ta'ee, kan sabni tokko eenyummaa, amantii, haala jiruufi jireenyaa isaa, heeraafi seera isaa, falaasamaaafi hooda isaa, walumaagalatti, ilaalcha addunyaa kanaaf qabu afaaniin dhaloota dhufuuf dabarsuudha.

Hima ijoo: _____

Keeyyata 2

Namoonni hedduun bosonni muka qoraaniifi manneen ijaaruuf qofa nama gargaara jedhanii yaadu. Bosonni garuu naannoon tokko akka caamaan hinhubamne gargaara. Bishaan lafa keessa jirus daddafee akka hingogne gaaddisa ta'uun, haala qilleensa naannoo mijeessuu keessatti iddoo guddaa qaba. Naannoo bosonni hinargamnetti yeroo baayyee bokkaan hinroobu. Bosonni naannoo uummaata tokkoof faayidaa heddu akka qabu hubachuutu barbaachisa ta'a.

Hima ijoo: _____

B. Yaada ka'uumsa jalqaba keeyyata armaan gaditti kennamerratti hundaa'uun keeyyaticha xumuri.

Dhibeen HIV/AIDSii karaa adda addaan darba. _____



Gilgaala 5:

Shaakala Keeyyata Barreessuu

A. Keeyyata osoo barreessuu hineegaliin dura, gumee qopheessuun barbaachisaadha. Gumee armaan gaditti mataduree “Faayidaa Barnootaa” irratti qophaa’ee hubadhu. Itti aansuun, gumicha irratti barreeffama keeyyata sadii qabu barreessi

Faayidaa Barnootaa

1. Naannoo keenya hubachuuf
 - 1.1. Haala jireenya hawaasaa
 - 1.1.1 Aadaa hawaasaa
 - 1.1.2 Walitti dhufeenya hawaasaa
 - 1.2 Walitti dhufeenya hawaasaafi umama naannoo
 - 1.2.1 Hawaasaafi biqiltoota
 - 1.2.2 Hawaasaafi haala qilleensaa
2. Rakkoowwan numudataniif furmaata barbaaduuf
 - 2.1 Rakkoowwan dhuunfaa
 - 2.2 Rakkoowwan hawaasaa

2.3 Rakkoowwan biyyaa

3. Waan haaraa argachuuf

3.1 Kallattii qonnaa

3.2 Kallattii saayinsii

3.3 Kallattii tajaajilaa

3.4 Kallattii fayyaa

B. Haaluma kanaan atis mataduree “Faayidaa Bosonaa” jedhu irratti gumee qopheessuun barreeffama keeyyata lamaa hanga shaniitti qabu qopheessi.

C. Matadureewwan armaan gadii keessaa tokko filachuun gumee qopheessi. Gumee qopheessite irratti hunda’uun barreeffama keeyyata sadi qabu barreessi.

1. maatii

4. ijoollummaa

2. fayyaa

5. mana barumsaa koo

3. ganda koo

6. ispoortii



Gilgaala 6:

Shaakala Sirna Tuqaalee

A. Himoota armaan gadii keessatti sirna tuqaalee barbaachisu hunda fakkeenyaaf qoodduu, mallattoo waraabii, mallattoo raajeffannoofi mallattoo gaaffii akkasumas, tuqaa fayyadamuun irra deebi’ii barreessi.

1. Mammaaksa Oromoo Quuqqaa cinaacha jalaa abbaatu beeka jedhu hiika saa beektaa.
2. Ati amma eessaa dhufta Hanga yoonaa eessa turte jedhe Tolaan.
3. Abbaan koo akka har’a hojjetan bor jiraatu jedhe yeroo heddu dubbata.

4. Ishoo бага gammaddan jettee na simatte Ayyaantuun.

5. Yeroo inni Mootaniittu siin jedhe ati ni gammaddee.

B. Keeyyata armaan gadii keessatti sirni tuqaalee sirriin bakka barbaachisaa ta'etti hingalle. Sirna tuqaalee barbaachisaa ta'an hunda galchuun keeyyaticha irra deebii barreessi.

Raadiyoon biyyoota Afrikaa keessatti faayidaa heddu qaba faayidaan inni jalqabaa raadiyoon uummata baadiyaa jiraatu salphaatti qaqqabuu danda'a akka televiziyinaa teknooloojii walxaxaa ta'e heddu hinbarbaadu tamsaasuuf. Ogeessi raadiyoo tokko faayidaan raadiyoon ummata Afrikaaf qabu ilaalchisse Radiyoon uummata Afrikaaf waan hunda jechuudha jedhe dubbatee ture. Haala waliigalaatti raadiyoon salphaatti uummata Afrikaa baadiyaa keessa jiranuuf oddeeffanno salphaatti geessisuu danda'a kanarraa kan ka'e nammoonni hedduun raadiyoo hiriyaa laphee jedhanii waamuun

Barannoo 3: Caasluga

Yaadannoo

Murnaaalli gosa hennaa ta'ee kan dhimma ykn gocha fulduratti raawwatamu ykn raawwatamuuf shakkamu tokko ittiin agarsiisnudha.



Gilgaala 7:

Shaakala Murnaala

A. Waan fuulduratti hojjechuu/ raawwachuu kee shakkitu shan barreessi.

Fkn: 1. Ani nandeema ta'a.

2. Inni xalayaa hiri'yaa isaaf nibarreessa ta'a.

- B. Odeeffanno gabatee kanaan gadii keessatti dhiyaate irratti hundaa'uun, Badhaatuun torbee dhufu keessa maal raawwachuu akka qabdu kan ibsan himoota shan barreessi.

Badhaatuu	Sanbata Xiqqaa	Dilbata
	Fira gaafachuu	Wuccuu miiccachuu
	Mana qulqulleessu	Hiriiyoota ishee bira deemuu
	Biqiltuu dhaabuu	Televisiyiina daawwachuu

- C. Cimdii cimdiin ta'uun waan torbee dhufu, ji'a dhufuufi waggaa dhufu hojjechuu keessani shakkitan walgaafadhaa. Gabatee kanaan gadii dabtara keessani irratti erga garagalchitanii booda, hiriyaan keessan maal hojjechuu isaa/ishii akka shakku/shakkitu gaafachuun gabatee keessatti barreessi.

Maqaa Hiri'yaa keetii	Gocha raawwatamuuf mammaa ta'e		
	Torbee dhufu	Ji'a dhufu	Waggaa dhufu

Boqonnaa 13: Aramaafi Dhukkuba Biqiltootaa

Kaayyoo: Dhuma barnoota boqonnaa kanaati:

- dandeettii dubbisa dubbistee ergaa isaa hubachuu cimsatta.
- hima keessatti walqabsiisota sirrii ta'anitti fayyadamu dandeessa.
- jechootaafi gaaleewwan dubbisa keessatti maal akka bakka bu'an hubatta.
- gabatee keessatti odeeffannoo dhiyaate qindeessuun barreessita.
- barreeffama keessatti sirna tuqaalee sirritti fayyadamuu dandeessa.

Barannoo 1: Dubbisuufi Dubbachuu



Gilgaala 1:

Shaakala Dubbisuun Duraa

A. Garaagarummaa fakkiwwan armaan gadii irratti mari'adhaa.



B. Dubbisa armaan gaditti isiniif dhiyaate dubbisuun dura gaaffiiwwan dhiyaatan irratti gareen mari'achuun dareef afaaniin gabaasaa.

1. Dhimmoota qonnaa irratti miidhaa geessisan keessaa maal fa'i beektu?
2. Miidhaan aramaan qonnaa irratti geessisu maal maal jettanii yaaddu?
3. Naannoo keessanitti dhukkuboota biqiltootaafi gosoota haramaa qonnaa irratti dhiibbaa geessisaa jiranu maal fa'i?
4. Yaanni ijoon dubbisa dubbisuuf deemu maal isinitti fakkaata?

C. Jechoota armaan gadii osoo dubbisuu hineegaliin dura hiika isaanii tilmaami.

1. dalaga

2. da'oo

3. dawaa

4. farra



Gilgaala 2:

Shaakala Yeroo Dubbisuu

- A. Dubbisa armaan gadii ariitiidhaan dubbisuudhaan gaaffiiwwan armaan gadii deebisi.
1. Aramaan akkam godhee biqiltootaa irratti miidhaa geessisa?
 2. Tooftaawwan saffisa guddina aramaafi faca'iinsa isaa ittissuuf nama gargaaran barreessi.
 3. Lubbu-qabeeyyii ijaan hinmullanne tahanii, kan biqiltoota irratti dhiibbaa geessisan kam fa'i?
 4. Lubbu-qabeeyyii xixiqqaan burqaa dhukkuba midhaanii ta'an eessatti walhoru?
 5. Fangasii, baakteeriyaafi vaayrasii qaama biqiltootaa keessa jiraatan akkam godhamee xiqqeessuun danda'ama?

Aramaafi Dhukkuba Biqiltootaa

Qonnaan bultoonni oomisha qonnaa garii akka hinarganne kan godhan keessaa aramaafi dhukkubni biqiltootaa jalqaba irratti argamu. Aramaan dhukkuba biqiltootaa kanneen akka fangasiifi baakteeriyaa akkasumas ilbiisootaaf da'oo ta'a. Kana malees bishaan, nyaataaafi aduu biqiltoota jalaa saama. Haalli kunis oomisha midhaanii xiqqeessa. Aramaan waan dafee guddatuufi biqiltoota irratti dhiibbaan isaa baayyee cimaadha. Kanaafuu, guddinaafi faca'insa aramaa ittisuun hojii midhaan qulqullinaafi baay'inaan oomishuu keessatti bakka guddaa qaba.

Saffisa guddina haramaafi faca'insa isaa ittissuuf tooftaa adda addaa fayyadamuun barbaachisaadha. Kanneen keessaa sanyii midhaanii qulqulluufi filatamaa facaasuu, humna ofiitti yookaan meeshaa qonnaatti fayyadamuudhaan gocha farra haramaa geggeessuufi keemikaalota farra aramaa ta'an fayyadamuudha. Reeba'uuniis gocha farra haramaati. Kunis midhaan facaasuun duratti qotiiyyoon yookiin meeshaa biraatiin biyyee lafa qonnaa garagalchuun hidda arama fonqolchanii dirreetti baasuudha.

Miidhaa aramaan geessisu caalaa dhukkuba biqiltootaa kan ta’an lubbu-qabeeyyii ijaan hinmullanne hedduutu jiru. Isaanis fangasii, baakteeriyaafi vaayrassiifaadha. Lubbu-qabeeyyiin kun qaama midhaanii irraafi keessa jiraachuun oomiisha midhaanii baay’ee miidhu. Miidhan isaaniis hanga biqiltoota guutumaa-guututti ajjeesuutti ga’uu danda’a. Lubbu-qabeeyyii xixiqqaan burqaa dhukkubaa midhaanii tahan qaama fangasiifi baakteeriyaa keessatti walhoru.

Lubbu-qabeeyyiin kun miidhaa isaan biqiltoota irratti geessisaa jiran baayyee cimaa waan ta’eef, hanga danda’ametti ittisuuf carraaquun baayyee barbaachisaadha. Fakkeenyaaf, fangasii qaama biqiltootaa gubbaa jiraatan dawaa itti biifuun ittisuu nidanda’ama. Haata’u malee, fangasii, baakteeriyaafi vaayrasii qaama biqiltootaa keessa jiraatan yarsanii dhabamsiisuun rakkisaadha. Kana jechuun dhukkuba biyyee keessaa jiranu salphisuu hindanda’mu jechuu miti. Yeroo ammaa yaalii hedduutu godhamaa jira. Kanneen keessaa tokko, dawaa sablinaa bulbulamee biyyeen walitti makamuu danda’u raphuun lubbu qabeeyyii xixiqqaa dhabamsiisuudha.

Walumaagalatti, miidhan aramaafi dhukkubni biqiltootaa oomisha qonnaa irratti fidaa jiran baayyee ballaa ta’ee argameera. Rakkinni kun ammo harka caalmaatti biyyoota guddachaa jiran keessaatti gadifageenyaan mullata. Carraaqiin dhiibbaa aramaafi dhukkuba biqiltootaa hirrisuuf godhamu adeemsa biyyi tokko nyaataan ofdanda’uuf gootu keessatti bakka guddaa qaba.

B. Dubbisa armaan olitti dhiyaate irratti hunda’uun “dhugaa” yookaan “soba” jedhii deebisi.

1. Aramaan dhukkuba biqiltootaa kanneen akka fangasiifi baakteeriyaa akkasumas ilbiisotaa adda addaaf da’oo taha.
2. Aramaan waan dafee hinguddanneef biqiltoota irratti dhibbaan isaa baayyee cimaa miti.

3. Reeba'uu jechuun midhaan eega facaasanii booda qotiyyoon yookiin meeshaa biraatiin biyyee lafa qonnaa garagalchuun hidda aramaa fonqolchanii dirreetti baasuudha.
4. Fangasii, baakteeriyaa fi vaayirasii qaama biqiltootaa keessa jiraatan guutumaa guutuutti dhabamsiisuun nidanda'ama.
5. Miidhaan aramaafi dhukkubni biqiltootaa oomisha qonnaa irratti fidaa jiranuharka caalmaatti biyyoota guddachaa jiran keessaatti gadifageenyaan nimullata.

C. Jechooniifi gaaleewwan armaan gadii dubbisa kanaan olitti dhiyaate keessatti hiika maal akka qaban barreessi.

- | | |
|--------------|---------------|
| 1. miidhaa | 6. dawaa |
| 2. oomisha | 7. fonqolchuu |
| 3. faca'insa | 8. da'oo |
| 4. saffisa | 9. yaalii |
| 5. farra | |

D. Odeeffannoo gabateewwan kanaan gadii keessatti dhiyaatan dubbisa kanaan olitti dubbiste irratti hundaa'uun iddoo duwwaa guuti.

Gabatee 1: Aramaa

Akkaataa Aramaan Miidhaa Itti Geessisu	Miidhaa Aramaan Qonnarratti Fidu	Tooftaa Miidhaan Aramaa Ittin To'atamu
1. Da'oo dhukkuba biqiltootaafi ilbiisota ta'uun	1. _____ _____	1. _____ _____
2. _____ _____	2. _____ _____	2. Humna namaafi meeshalee gocha farra aramaa geggeessuu
3. _____ _____	3. _____ _____	3. _____ _____

Gabatee 2: Dhukkuba Biqiltootaa

Haala Jireenya Isaanii	Miidhaa Aramaan Qonnaarratti Fidu	Tooftaaa Miidhaa Jaraa To'achuf Nama Gargaaru
1. Qaama biqiltootaa keessa	1. _____	1. _____
2. _____	2. Lubbuu biqiltuu balleessuu	2. _____
3. _____	3. _____	3. _____

**Gilgaala 3:**

Shaakala Dubbisuun Boodaa

Miidhaa aramaaniif dhukkubni biqiltootaa oomisha qonnaa naannoo keessanii irratti geessisaa jiru ilaalchisuun keeyyata tokko qopheessi. Keeyyanni kees tooftaawwan qoteebultoonni naannoo keetii miidhaa armaafi dhukkuba biqiltoota kana hirrisuuf fayyadaman of keessatti haaqabaatu.

Barannoo 2: Caasluga

**Gilgaala 4:**

Shaakala Walqabsiisotaa

A. Walqabsiisota kanaan gaditti kennaman keessaa filachuun bakka duwwaa himoota kanaan gadii keessatti galchuun barressi.

osoo

malee

fi

moo

hoo

akkuma

qofa

kana malees

1. Gurbichi nibarata, _____, nidaldaala.
2. Tolaan _____ abbaa isaa dheeraadha.
3. Qarshii qofa _____ hinta'in deeggarsi yaadaas barbaachisaadha.
4. Obboleettiin kee barachaa jirti, ati _____?
5. Obsaa _____ Gammadaan obboleessota.
6. Nyaata _____ dhugaatii barbaadda?
7. Boontuu _____ waami.
8. Qarshiin dhabe _____ siifan bita ture.

B. Walqabsiisota kanaan gadii fayyadamuun himota mataa keetii ijaari.

- | | | |
|---------------|-------------|-----------------|
| 1. kanaafuu | 2. yookaan | 3. moo |
| 4. fi | 5. garuu | 6. akkasumas |
| 7. kanaa achi | 8. haa ta'u | 9. kanaaf jecha |
| 10. waan | | |



Gilgaala 5:

Shaakala Sirna Tuqaalee

Dogongora sirna tuqaalee keeyyata armaan gadii keessatti argamu sirreessuun keeyyatcha irra deebi'uun barreessi.

Dur dur leenca qeerransa waraabessaafi harreetu adamoo deeman jedhan Guyyaa sadiif walitti aansanii homaa dhabanii qoonqoon isaanitti yaate. Akkamitti akkana ta'a nu keessaa namni cubbuu hojjete tokko jira jechuun gungumuu jalqabani. Cubbuu jaraafis jalaa ka'ii gaafachuu akka qabu irratti waliigalan. Dursees leenci faxuulaatii cubbuu kanaan dura godhe himachuutti ka'e. Eeyee natu cubbu godhe. Gaaf tokko jabbii xiqqoo tokko ganda keessatti argadheen nyaadhe jedhe. Bineensonni kaan miti, kun cubbuu miti jedhan. Itti aansuun qeerransiifi waraabessi cubbuu nuti hojjenne jedhanii kan yaadan walitti aansuun dubbatatan. Bineensonni kaanis cubbuu akka hintaane mirkaneessaniif. Dhumarratti dabareen harree ga'e. Yeroo tokko namni ba'aa natti fe'ee osoo deemaa jirru namtichatti karadeemaan tokko itti dhufee dhaabbatanii haasaa jalqabani. Anis karaarraa goreen hanga inni dhufuti marga bubbutadhe achumaanis fe'iinsi sun natti ulfaannan ittiin ciise jette. Xiqqoo erga mariyaatanii booda, kun cubbuudha kun cubuudha sababni rakkoo keenyaa si'i jedhaniin. Achumaan harreettii kukkutanii nyaatan jedhama.

Boqonnaa 14: Bilillee (Maahibuubaa)

Kaayyoo: Barnoota boqonnaa kanaatiin booda:

- Yaada ijoo dubbisichaa addaan baafatta
- hiika jechootaa akkaataa galumsa isaaniitti himta.
- yaada haqaafi yaada dhuunfaa addaan himata.
- seenaa namoota beekamoo ta’anii barreessita.
- Yaada rarra’anii hafan guutta.
- qajeelfamoota hordofuun haala wanti tokko itti raawwatamu ibsita.

Barannoo 1: Dubbisuufi Barreessuu



Gilgaala 1:

Shaakala Dubbisuun Duraa

A. Dubbisa armaan gadi itti dhiyaate dubbisuun dura gaaffiiwwan dhiyaatan gareen irratti mari’achuun dareedhaaf gabaasaa.

1. Seenaa jireenya nama dhuunfaa dubbistee beektaa? Yoo dubbiste kan eenyuufaa akka dubbiste himi.
2. Seenaa nama dhuunfaa dubbisuun faayidaa maali qaba?
3. Namoota dhalataa Oromoo ta’anii sababa daldala gabraatin biyya kana gara biyya alaatti gurguraman eenyuufaa beekta?
4. Daldalli gabraa maali? Eenyutu gurgurama? Eenyutu gurgura? Eessatti gurguramu?

B. Jechoota armaan gadii osoo dubbisuu hinegaliin dura hiika isaani tilmaami.

1. naatoo
2. booji’amuu
3. doo’achuu

**Gilgaala 2:****Shaakala Yeroo Dubbisuu**

- A. Dubbisa armaan gadii ariitiidhaan (Saffisaan) dubbisuudhaan gabatee armaan gadii guuti.

bara	bakka	gocha raawwatame
1820	Gummaa	
1835-6		
1837		
1840		
27,1840		

Bilillee (Mahibuubaa)

Namoota dhalataa Oromoo ta'anii sababa daldalaa garbaatiin gara Awurooppaatti gurguramanii qorannoo ogummaa Oromoof bu'aa guddaa buusan kanneen akka Akkafeetee Daallee, Oshuu Aгаа, Amaan Gondaafi Bilillee faan warroota gara Jarmaniitti fudhataman keessaa muraasa. Mee seenaa dargaggoota kanaa keessaa seenaa Bilillee haa ilaallu.

Bililleen maqaa maatiin ishee, akkuma aadaafi duudhaa Oromtichaatti isheedhaaf baheedha. Kan dhalatte Oromiyaa dhihaa bakka Gummaa jedhamuutti . Barri isheen dhalattee 1820 keessa. Dhalattee yoo waggaa kudhan guuttuu, bara 1835-6, biyya isheen dhalatetti lolli ka'e. Abbaafi oobboleewwan ishee jahaan niajjeefaman. Bililleefi oobboleetiin ishee



ammoo booji'amanii gabrooman. Sanaan booda obboleewwan lamaan kun gara Gondoritti fudhatamuun achittis gargar bahan; sana booda deebi'anii walhinagarre.

Gondoriin booda Bililleen dura karaa Kaartuum itti aansee gara magaalaa guddittii misraa, Kaayirootti bara 1837 keessa gurguraaf geeffamte. Yeroo kana ilmi mootii Jarman tokko Kaayiroo gahe. Innis Harmaan Paklar jedhama. Gaaf kaan gabaa gabroonni itti gurguraman ilaaluu dhaqe. Guyyaa kana Bilillee gurguruuf gabaa baasanii turan. Ilmi mootii kun akkuma naatoo Bililleen qabdu argeen bituuf itti gaggabe, nibitates. Maqa ishees Mahibubaa jedhee moggaseef. Mahibuubaa jechuun Afaan Arabaatiin 'jaalallee koo' jechuudha.

Umriin ishee ijoollee haata'u malee, yaanniifi hojiin ishee akka nama guddaa ture. Kun ammoo Paklaar daran akka ishee jaalaatu taasise. Qulqullina garaa isheefi fedhiin Bililleen barumsaaf qabdu guddisaniituma qalbii isaa fudhatan. Kanarraa kan ka'e, Afaan Arabaafi Afaan Jarmanii akka barattu waan barbaadeef, bakka do'ii deemu hundattu Mahibuubaa of biraa hin hanbisu ture. Yaanni isheen iddoo tokko erga daawwate booda kennitu baay'ee isa ajaa'ibsiisaa ture. Amalli ishii kun amala cima mootii kan Paklar yeroo Awurooppaadhaa dhufu qabu akka jijjiirratu godhe. Kanaaf, Paklar yeroo tokko, "Nama dhugaan wajjiin jirtu wajjiin ooleen, yeroo baay'ee booda nama dhugaa ta'e," jedhee barreesse.

Biyyoota bahaa waggaa sadiif erga doo'atan booda, bara 1840 Paklariifi Mahbuubaan gara Awurooppaa deebi'an. Yeroo kana Mahibuubaa dhukkubni sonbaafi heexoo waan qabeef, baay'ee dhukkubsatte. Nafti ishees baay'ee huqqattee lafeetti baate. Paklaar osoo garaan jibbuu Mahibuubaa mana isaa Muskaa jiru keessatti dooktora isaatti amaanaa kennatee haadha manaa isaa dhukkubsatte gaafachuu Barliin deeme. Yeroo kana baay'e dhukkubsattullee, Mahibubaan dardarri biyya ishee Oshuu Aagaa kan jedhamuun walbarte. Oshuu Aagaa irraan immoo, hayyicha Jarman kan Afaan Oromoo qoratu, Tuucheekiin, walbarte. Sirba

Oromoo kan Bililleen sirbite hayyichi kun galmeesee dhalootaaf dabarsee jira.

Ijoollummaa isheetii kaasee guddisee jaalallee akka ija isaatti ilaalu kan taasise, Paklaar, haati manaa isaa waan guddaa dhukkubsateef Barlinii gara Mahibuubaatti deebi'uu hindandeenye. Garuu xalayaa nibarreessaaf ture. Mahibuubas dhukkubni guyyuma guyyaan itti cimaa adeeme. Akka hindandamanne garaan waan beekeef, yoo duutu Paklar akka ishee bira taa'u guddaa hawwite. Fedhii ishee kanas dhukkubsatte barreessuu waan dadhabdeef dooktorri ishee barreesseef. Yeroo xalayaan kun harka Paklar gaheetti haati manaa isaa daran waan dhukkubsatteef gara Mahibuubatti hatattamaan deemuu hindandeenye. Kanaaf, rakkina irra jiru ibsee xalayaa fi meetii maqaan 'Maahibuubaa' jedhu irratti bocame ergeef. Garuu yoo xalayichifi meetichi Onkololeessa 27, 1840 Muskaa gahu, Bililleen garuu arguu hin dandeenye; isheenis, isa dhumaaf addunyaa kanarraa boqatte.

B. Dubbisicha suuta dubbisuun gaaffiiwwan armaan gadii deebii kee barreeffaman deebisi.

1. Ergaan keeyyata 2^{ffaa} keessatti darbe maali?
2. Waa'een amalaafi dandeettii Bilillee keeyyata meeqaffaa keessatti ibsame?
3. Bililleen dhalata biyya abbaa ishee kan ta'e eenyuun Jarmanitti walbarte?
Gumaachi isaa isheef maali?
4. Tuucheek bu'aan inni ogbarruu Oromoof buuse maali?
5. Ergaan keeyyata 4^{ffaa} keessatti darbe maali?

C. Jechoota raga 'A' jalaa hiika isaanii roga 'B' jalaa wajjin walitti firoomsi. Deebii keessanis gareen irraitti mari'adhaa.

'A'

1. ilaaluu
2. miidhagina
3. dardara
4. eegalee
5. hayyuu
6. jalaa bahuu
7. addunyaa irraa boqochuu
8. qulqullina garaa
9. itti gaggabuu
10. garaa nyaachuu

'B'

- A. dandamachuu
- B. fedhii guddaa agarsiisuu
- C. gaarummaa
- D. beekaa
- E. itti gammaduu
- F. du'uu
- G. qaana'uu
- H. dargaggeessa
- I. mararuu
- J. naatoo
- K. doo'achuu
- L. jalqabe
- M. irra qabuu



Gilgaala 3:

Shaakala Dubbisuun Boodaa

Gaaffiiwwan armaan gadii hubannoo dubbisarraa argatteefi muuxannoo kee walitti fiduun deebisi.

1. Seenaa jireenyaa Bilillee irraa maal hubatta?
2. Baroota Bililleen keessatti dhalatte sun har'a irra teessee akkamitti ilaalta?
3. Ergaan waliigala dubbisa dhiyaatee maal sitti fakkaata?

Barannoo 2: Caasluga

Yadannoo

Yaadni haqaa yaada yeroo hunda bakka hundatti nama hunda biratti dhugaa ta'e. Yaadni dhuunfa garuu yaada ykn ilaalcha nama/ garee tokko calaqqisiisu.

Fkn. Yaada haqaa: Lubbu-qabeeyyiin jiraachuuf bishaan barbaadu.

Yaada dhuunfa: Oromiyaan baayyee bareedduudha.



Gilgaala 4:

Shaakala Yaada Haqaafi Dhuunfaa Adda Baasuu

A. Gaaffiwwan armaan gadii yaada dhuunfaa, ykn yaada haqaa ta'uu isaanii adda baasi barreessi.

1. Bilillee Maatii ishee ijoollumaatti dhabde.
2. Aduun Bahaan baatee Lixaan lixxi.
3. Lafatu aduu naanna'a malee, aduun lafatti hinnaannoofu.
4. Namni bishaan malee jiraachuu hindanda'u
5. Namni durii waggaa dhibba jiraata.

B. Yaadolee haqaafi dhuunfaa sadi sadi barreessuun agarsiisi.

I. Yaada haqaa

1. _____
2. _____
3. _____

II. Yaada dhuunfaa

1. _____
2. _____
3. _____

Barannoo 3: Afoola



Gilgaala 5:

Shaakala mammaakkaa, hibboofi durdurii

A. Mammaaksoota armaan gadii yaanni isaanii rarra'ee hafe guutuu taasisuun gareen irratti mar'adhaa deebisaa.

1. Akka ebaluuttan sirbaan _____
2. Baddu baddi malee _____
3. Afaan bal'ateef _____
4. Akka hiree malee _____
5. Eeboo darbatanii _____

B. Hiibboo armaan gadii keessaa yaadolee rarra’anii hafan xumuri. Deebii isaa gareen irratti mari’adhaa.

1. Wajjumaan nyaannaa maaf _____?
2. Hoxxee gamaa _____
3. Ciisu akka reeffaa, ka’u akka _____
4. Takka dhayee _____
5. Sabbata aayyoo _____ dadhabe

C. Oduun durii (sheekkoon) armaan gadii kun yaanni isaa rarra’ee kan hafeedha. Kanaaf yaada hafe itti guuti.

Dacheen Irraa Bu’uus...

Bara durii intala mootii bareedduu tokkotu jirti ture. Dardarri namni sadii, “anatu fuudhaa, anatu fuudhaa,” irratti walqaban. Abbaan intalaas, “sadan keessanuu intala kana argadhaa isiniifan kennaa,” jedheen.

Yeroo kana manguddoo ergatanii, maatii fixatanii gudduunfaan geessanii beellama qabatanii galan. Jara sadeeniifuu guyyuma tokkotu qabame. Gaaf guyyaa cidhaa oggaa dhiyaatan abbaan intalaa yaamee, “Mee ati sadan isaanii keessaa kam filattaa? Moo atihoo akkam jetta?” jedheen. “Ani kan dachii kana ol fuudhettin heeruma” jettee deebifteef intalli. Yeroo kana abbaan, jara sadaniin, “kunoo egaa intalli akkana, jettii kan fuudhu eenyuu,” jedhee gaafate...

Yaadannoo

Mana kitaabaatti Fayyadamuu

- Manni kitaabaa dandeettii dubbisuu fi barreessuu barataa gabbisuuf gahee olaanaa qaba. Kanaaf, mana kitaabaatti fayyadamuuf, barattoonni wantoota beekuu qaban jira. Sababiin isaas, manni kitaabaa seera mataa isaa qaba. Yeroo mana kitaabaatti fayyadamnu wantoota gurguddoo lama beekuu qabna. Isaanis:
- Mala saffisaan odeeffannoon barbaadame ittiin argamu gonfachuun barbaachisaadha.
- Beekumsa mala kaataaloojiifi indeeksiin ittiin qophaa'aniidha.

Kaardii kaataaloojii mana kitaabaa

Kaataaloojiin kardii walduraa duuba qubeetiin meeshaaleen mana kitaabaa irratti galmeeffamaniidha. Haata'u malee yeroo ammoo dhalli namaa meeshaalee ammayyaafi saayinsiitti kan akka kompitarratti fayyadamuutti jira. Biyya keenya keessattis iddoo tamsa'inni intarneetii jirutti haalan itti fayyadamaa jiru. Gama haala itti fayyadama kaataaloojii yoo dhufnu kitaabni hundi karaa sadiin kaataaloojii irratti galmeeffaman:

A. Kaataaloojii Damee Barumsaa (subject catalogue)

Gosa beekumsaa ykn qu'annaa kam irratti kitaabichi akka barreeffame agarsiisa.

1. Multicultural Education
2. 205.265
3. James A. Banks ,2010 N 50f
4. Chapel Hill, the University of Addis Ababa Press. 2010
5. V, 760 front --- places 25cm
6. " Selected bibliography " : P.27-33

1. Diversity in Ethiopia
2. Federalism in Ethiopia
7. HD .N7865 33-165774
Library of Kennedy

Furtuu: Lakkoofsonni armaan olii kan ibsan:

1. Jifaar / Dame barnoota / barumsaa
2. Lakkoofsa
3. Barreessaa
4. Mata-duree, Maxxansaa
5. Baay'ina fuulaa
6. Odeeffannoo addaa
7. Odeeffannoo hojjetoota mana kitaabaatiif fayyadu.

B. Kaataaloojii Barreessaa

* Maqaa barreessaa akka walduraa duuba qubeetiin galmeessaa.

205-265 James A. Banks, 2010 N 50f – Chapel Hill, the University of Eastern Michigan University , Perss 2010 V, 760 front... plates 25cm

C. Kaataaloojii Mata Duree

Mata duree kitaabichaa walduraa duuba qubee mata dureen ittiin eegaluun galmeessaa.

Multicultural Education , P. 27-33 Diversity and Federalism in

Ethiopia, university of Addis Ababa press, 20110, V, P. 33- ffont plotes 25cm

Barannoo 4: Kaataaloojiifi Galmee Jechaa



Gilgaala 6:

Shaakala kaataaloojiitti fayyadamuu

Gaaffiiwwan armaan gadii fakkeenya kaataaloojii damee barumsaa kan armaan oliitti kennameerratti hundaa'uun gareen irratti mari'adhaa.

1. Walumaagalatti kitaabichi waa'ee maali ibsa?
2. Odeeffannoon kitaaba kanaa maaliif bal'ata?
3. Kitaabicha mana kitaabaatii akkamitti argachuun danda'ama?
4. Odeeffannoon kitaabichaa haarawaa?
5. Haala odeeffannoon dabalataa ittiin argamu ni ibsa?



Gilgaala 7:

Shaakala Galmee Jechaatti Fayyadamuu

A. Gaaffiiwwan armaan gadii gareen mari'achuun deebii barreeffamaan kenni.

1. Faayidaan galmee jechaa maali?
2. Hiika jecha tokkoo galmee jechaa keessaa argachuuf tooftaan itti fayyadamtu maali?
3. Jechoota armaan gadii akkaataa tartiiba isaan galmee jechootaa keessatti qa-baachuu danda'aniin tarreessi

oyiruu	lafee	yaada	gadaa
haadha	utubaa	mirga	ateetee
jaalala	sibila	ayyaana	caaccuu
meedhacha	nageenya	bokkuu	

B. Gaaffiwwan armaan gadii keessatti jechoota jala sararaman hiika galmee jechaa kenniif.

1. Beekaan mirga isaa kabachisee kan ormaas kabaja.
2. Duurbeekumsi sibiila tumuu osoo jajjabaatee, har'a konkolaataa oomishuu ni danda'u ture.
3. Caaltuun haadha Eebbaati.
4. Eebbaan barumsa addaan kutuu hinbarbaadu.
5. Laliseen hiriyaa ishee baay'ee jaalatti.

Yaadannoo

Faayidaan galmee jechootaa isaan gurguddaan:

- A. Hiika jechootaa karaa kallattii ta'een, gama adda addaatiin nuuf hiika. Fakkeenyaaf, jechi yemmuu maqaa ta'u, maqibsa ta'u, xumura ta'u hiikni isaan maal akka fakkaatu nuuf ibsuuf.
- B. Galmeen jechoota haala ogummaarratti hundaa'uun waan qophaa'uuf gahee ol'aanaa qaba.
- C. Namoonni afheddee akka ta'aniif ni gargaara.
- D. Jechoota tartiiba qubeetiin kaahuun akka salphaatti hiika isaanii argachuuf gahee olaanaa qaba.

Barannoo 5: Barreessuu



Gilgaala 8:

Shaakala Seenaa Jireenyaa

Gaaffiiwwan armaan gadii akkaatuma gaafatamteen deebisi

1. Seenaa jiraanya nama naannoo keetti beekkamadha jettu tokko barreessi.
2. Hayyoota armaan gadii keessaa tokko filadhu seenaa jireenya isaa barreessuun dhiyeessi.
 - A. Asteer Gannoo Salban
 - B. Jeneral Taaddasaa Birruu
 - C. Abbaa Jifaar Abbaa Gommool (Jimmaa)
 - D. Shee Bakrii Saphaaloo (Abubakar Usmaan Odaa)

Yaadannoo

Seenaa Jireenyaa

Namoonni seenaa jireenyaa isaaniifi kan nama biroo barreessuu danda’u seenaan jireenyaa kun kan hawaasni irraa waa baratu ta’uu qaba. Seenaan jireenyaa yemmuu barreeffamu qabxiiwwan gurguddoo armaan gadii of keessatti hammachuu qaba. Isaanis: bakka dhalootaa, bara, akkaataafi bakka guddina, muudannoo gaariifi yaraa /hamaa jireenya keessatti isa muudateefi kan kana fakkaatuudha. Yeroo baay’ee namoonni beekamoon seenaan jireenyaa isaanii barreeffamu, hayyuu abbaa gadaa, goota, ayyaantuu, jaarsa biyyaafi kan kana fakkaatan ta’uun nimala. Fakkeenyaaf, seena Bilillee boqonnaa kana kessatti xinxalluun ni danda’ama

Boqonnaa 15: Looga Afaan Oromoo

Kaayyoo: Barnoota boqonnaa kanaatiin booda:

- loogota naannoofi hawaasaa addaan baafatta.
- Afaan Oromoo keessatti garaagarummaan loogootaa jiraatus uummanni haala salphaan waliigaa'uu danda'uu isaanii adda baafatta.
- jechoota kennaman keessaa kan hiika addaa qaban baasta.
- seera loojiikiitti fayyadamuun yaada kee ibsatta.
- faaruu daa'immanii garaagaraa walitti qabuun barreessita.

Barannoo 1: Dubbisuufi Dubbachuu



Gilgaala 1:

Shaakala Dubbisuun Duraa

A. Dubbisa armaan gadiitti dhiyaate dubbisuun dura gaaffiwwan dhiyaatan gareen irratti mari'achuun afaaniin dareedhaaf gabaasaa.

1. Jechoota armaan gadii kana dubbistee maal akka irraa hubatte hiriyoota keetti himi.
 - A. hubboo, oytee, ottee, okkotee, huuroo
 - B. gugee, bullaallaa, saphaliisa, makoodii, andarii
 - C. Dansaa, gaarii, mishaa, wayyaa, baroo
2. Jechoonni gaaffii 1ffaa jalatti tarreeffaman kun garaagarummaa qabu?
3. Gaffii 2ffaa 'eeyyee' yoo jette garaagarummaa kana maali jettu?
4. Garaagarummaan kun guddina afaaniirratti dhiibbaa qabaa? Maaliif?

B. Jechoota armaan gadii osoo dubbisuu hin eegaliin dura hiika isaanii tilmaamaa.

1. korniyaa
2. dalagaa
3. looga



Gilgaala 2:

Shaakala Yeroo Dubbisuu

A. Dubbisa armaan gadii saffisaan dubbisuudhaan gaaffiiwwan armaan gadii deebisi.

1. Jechoonni ‘akkam, ‘attam’ jedhaman keeyyata meeqaffaa keessatti mul’atan?
2. Yaanni dimshaashaa dubbisa kanaa maalii?
3. Hiikni looga afannii keeyyata kam keessatti ibsame?
4. Caasaalee hawaasaa warri jedhaman maal faadha?
5. Afaan Oromoo looga meeqatti qoodamee jira?

Looga Afaan Oromoo

Maalummaan loogaa hayyoota garaagaraa biratti haala walfakkeenya qabuun hinmul’atu. Kunis, garaagarummaa ilalalchaa namoonni loogarratti qabanirraa madda. Kanaaf, loogni adda addummaa sagalee, dhamsaga, akkasumas, jecha haasarratti dubbattoota afaan tokkoo gidduutti mul’atu, garuu waliigaluu irratti rakkoo uumuu hindandeenye. Kun afaan kam keessattuu waan mul’atuudha.

Dubbatoonni afaan tokkoo, teessuma lafaatiniis ta’ee caasaa hawaasaatiin walirraa fagaachuu danda’u. Kanneen teessuma lafaatiin fageenya qaban gidduu akkaataa fayyadama afaanirraitti (kan dhamsaga, birsagaafi jechaa) garaagarummaa qabaachuu danda’a. Kun ammoo, hawaasa afaan tokko dubbatu gidduutti haallan gara garaa jiraachuu agarsiisa. Garaagarummaan loogawwan afaan tokkoo keessatti mul’atan kan teessuma lafaa qofaa bu’uureffatee osoo hintaane, caasaalee ni ilaallata. Caasaaleen hawaasaa kunis umrii, korniyaa, qabeenya, taayitaa, sadarkaa barnootaafi kan kana fakkaatu bu’uureffata. Caasaan afaan hawaasa tokkoo caasaalee hawaasaa kunneen bu’uureffachuun garaagarummaa agarsiisuu danda’a. Garaagarummaan fayyadama afaanii haala kanaan argamu ammoo looga hawaasaa jedhama.

Fakkeenya Looga naannoo yoo fudhannee, Oromiyaa Bahaatti nagaa gaafachuuf, ‘akkam’ yoo jedhamu Oromiyaa Lixaatti ammoo ‘attam’ jedhu. Akkasumas, Baha Oromiyaatti ‘dalagaa’ jechii jedhamu Lixa Oromiyaatti ammoo ‘hojii’ jedhama. Gama looga hawaasaa yoo dhufne garuu, hawaasa tokko keessa namoonni sadarkaafi hojii adda addaa qabu. Fakkeenyaaf, hojjetaan buufata fayyaa keessa hojjetuufi waajjira qonnaa keessa hojjetu, jechoota ogummaatti yoo fayyadamani dubbatan inni tokko kan isa tokko wallaluu danda’a. Haa ta’u malee, afaaniin walii ibsuu danda’u waan ta’eef waligaltee isaanirratti dhiibbaa hinfidu.

Afaan tokko loogota adda addaa qabaachuun isaa miidhaa hin qabu. Inuumaa bal’ina afaanichaa agarsiisa . Gabaabumatti, haala qabatamaa keessatti yoo ilaaluu afaaniifi loogni adda adda. Afaan loogaan yoo walbira qabamu, namoota hedduun kan dubbatamu, walta’insa loogawwanii kan ta’e, Caasaafi qabiyyee isaatiniis soressa kan ta’eefi of danda’ee uummanni abbaan afaanichaa ittiin waamamu afaani. Kanaaafuu, loogni Afaan Oromoo dagaagina Afaan Oromoof abdi guddaadha.

B. Gaaffiiwwan armaan gadii dhugaa yookiin Soba jechuun deebisi.

1. Loogni Afaan Oromoo keessa malee afaan biroo keessa hinjiru.
2. Uummanni Oromoo inni baha, lixa, kaabafi kibba jiru salphumatti waliigala.
3. Loogni guddinna afaan tokkootiif gahee ol aanaa qaba.
4. Oromiyaa bahatti ‘haajaa’, lixatti ‘maayii’ jedhama. Kun fakkeenya looga hawaasaati.
5. Akka yaada dubbisichaatti loogni gufuu guddina afaan tokkooti.
6. Garaagarummaan loogaa kun lafti Oromiyaa waan bal’oo taateef, wanta uumameedha.
7. Garaagarummaan dhamjechootaafi jechootaa kan naannoo Oromiyaa muraasa waan ta’aniif qunnamtirraitti rakkoo hinuumu.
8. Loogota waalteessuun barreeffamaan waliigaluuf baay’ee barbaachisaadha.
9. Eessumaayyuu haadhufuu, namoota Afaan Oromoo dubbatan jidduu garaagarummaan tokkollee hinjiru.
10. Sadarkaan barnootaa fakkeenya looga naannooti.

**Gilgaala 3:****Shaakala Dubbisuun Boodaa**

Gaaffiwwan armaana gadii hubannoo dubbisarraa argateerratti hundaa'uun dalagi.

1. Ergaan keeyyanni 3ffaan dubbisa armaan olii maali?
2. Jechi 'kun' jedhu keeyyata 1ffaa keessatti maal ibsa?
3. Jechii 'kunis' jedhu keeyyat 2ffaa keessatti maal ibsa.
4. Loogni naannoo keetti dubbatamu kanneen iddoo birootti dubbataman shan tarreessi.

1. -----
2. -----
3. -----
4. -----
5. -----

5. Looga naannoofi looga hawaasaaf fakkeenya shan shan barreessi.

Looga naannoo

- (a) _____
- (b) _____
- (c) _____
- (d) _____
- (e) _____

Looga hawaasaa

- (a) _____
- (b) _____
- (c) _____
- (d) _____
- (e) _____

6. Sababa loogaatiin namoonni ati osoo walii hingaliin hafte jiraa?
7. Looga namoonni dubbataniin eenyummaa isaanii adda baasuun ni danda'amaa? Akkamitti?
8. loogni maali?
9. Caasaalee hawaasaa warri jedhaman maal faadha?
10. Afaan Oromoo looga meeqatti qoodamee jira?

Barannoo 2: Jechootaa



Gilgaala 4:

Shaakala Hiika Jechootaa

A. Jechoota garee 'A' jalatti kennaman kannen garee 'B' jalaatiin jiran waliinwaliitti firoomsi.

A

1. haqa
2. baatii
3. makoodii
4. soquu
5. mishaa
6. maayii
7. rooba
8. qajjisa
9. teellaa
10. michuu

B

- A. barbaaduu
- B. dhimma
- C. andarii
- D. bokkaa
- E. dhugaa
- F. gaarii, dansa
- G. ji'a
- H. hiriya
- I. rifeensa
- J. qalbii
- K. booda

B. Jechoonni lakk. 1-10 kennaman kunniin hormaata namaa ykn beelladaa wajjiin deema. Kum kam wajjin akka deemu hubachuun sanduqa keessatti mallattoo (/) kana kahuun deebii kee agarsiisi.

Nama	Horii	Hoolaa	Ra'ee	Qalaamaa fardaa	Harree
1. dhaluu					
2. guusuu					
3. foolachuu					
4. dahuu					
5. guntutuu					
6. oofkaluu					
7. ciniifachuu					
8. irraa bahuu					
9. gatachuu					
10. dilluu buusuu					

C. Jechoota afran keessaa kan adda ta'e filadhu.

- | | | | |
|----------------|---------------|--------------|------------|
| 1. A. qeerroo | B. dardara | C. durba | |
| D.gaamareessa | | | |
| 2. A. jibicha | B. mirgoo | C. maseena | D. korma |
| 3. A. baataa | B. qalaamaa | C. ciloo | D. waatii |
| 4. A. goromsa | B. sa'a | C. jabbii | D. raada |
| 5. A. goromtii | B. tumaleessa | C. korbeessa | D. duba |
| 6. A. dhaltii | B. raada | C. sa'a | D. harkuu |
| 7. A. malkaa | B. laga | C. haroo | D. madda |
| 8. A. gur'uu | B. gooba | C. mucha | D. harma |
| 9. A. itittuu | B. baksaa | C. harma | D. ayeetuu |
| 10. A. oota | B. obbaatii | C. dil'uu | D. qoofraa |

D. Jechoonni 'B fi C' jalatti kennaman kun naannoo keetti maal akka jedhaman hiriya kee wajjin irratti mari'adhu.

E. Jechoota raadiyoodhaan ykn teelewijiniidhaan dhageesse kan naannoo keerraa adda ta'e kudhan barreessuun dareedhaaf gabaasi.

- | | |
|----------|-----------|
| 1. ----- | 6. ----- |
| 2. ----- | 7. ----- |
| 3. ----- | 8. ----- |
| 4. ----- | 9. ----- |
| 5. ----- | 10. ----- |

Barannoo 3: Loojii



Gilgaala 5

Shaakala Seera Loojii

A. Haala duraa duuba gochaatti yookiin guddinaatti tartiiba kamtu sirriidha.

1. A. facaasuu, qotuu, aramuu, haamuu, ayiduu, callaa galchuu
B. qotuu, facaasuu, aramuu, haamuu, ayiduu, callaa galchuu
C. Callaa galchuun, aramuu, qotuu, haamuu, ayiduu
D. aramuu, qotuu, facaasuu, haamuu, ayiduu, callaa golchuu.
2. A. Yaaduu, dalaguu, gamagamuu, karoorsuu
B. Karoorsuu, dalaguu, yaaduu, madaaluu
C. Yaaduu, karoorsuu, dalaguu, madaaluu
D. Karoorsuu, yaaduu, dalaguu, madaaluu
3. A. Buna miccuu, akahuu, tumuu, danfisuu.
B. akaahuu, tumuu, danfisuu, buna miccuu.
C. tumuu, buna miccuu, akaahuu, danfisuu
D. Buna miccuu, tumuu, akaahuu, danfisuu.

B. Akka seera loojikiitti jecha sirrii ta'e filadhu.

1. Ameessi aananiif yoo ta'e, tumaleessi _____ ta'a
A. lafeef B. gogaaf C. qonnaaf D. fooniif
2. Namaaf guntuta yoo ta'e, gurruun ammoo. _____
A. hoolaa B. horii C. ra'ee D. hunduu
deebiidha
3. Goromtii jedhee korbeessa yoo jedhe jibicha jedhee, _____ jedha
A. hoola B. tumalessa C. raada D. korbeessa

4. Sangaa jedhee mirgoo yoo jedhe suubboo jedhe _____ jedha
 A. qeerroo B. farda C. gaangee D. haarree
5. Dhadhaa jedhe baksaa yoo jedhe, aanan jedha _____ jedha.
 A. itittuu B. dhama C. ayeetuu D. baaduu

Barannoo 4: Afoola

Faaruu Daa'immanii

Hawaasa Oromoo keessatti waan hundumtuu seeraafi heera ittiin gaggeeffamu ni qabaata. Osoo qarroomni fi teeknooloojiin jabanaa biyya Afrikaa hin seenin, Oromoon sirna Gadaa jedhamuun of bulchaa akka ture galmeewwan seenaa tokko tokko irraas ta'ee haftee sirna Gadaa hanga har'aa ittiin hojjetamaa jiru hubachuun ni danda'ama . Sirna Gadaa keessatti daa'imman qooda akkamii akka qaban yoo ilaalle. daa'imman umriin isaanii waggaa saddeetii gadi kan ta'an yeroo ta'u abbaafi haati isaanii Abbaa Bokkuu yookiin luba bira geessanii hammachiisu, eebbisiisu, maqaas moggaasisu. Kana booda mucaan kun akka inni qananiidhaan guddatu haatiifi abbaan dirqama isaanii yoo ta'e iyyuu, keessumaa haadhooliin dugdatti baatanii, laphee isaanii irratti hammatanii ijoollummaan waan sammuu isaanii keessa hin baaneen faarsu. Yeroo urursanis akkana jedhu;

Ururuu yaa mucayyoo

Mucayyoo yaa xinnayyoo

Atis ni taata namaa

Sirraa haa qabu hamaa
Afaan kee haa ta'u dammaa
Ururuu yaa mucayyoo
Aannaan feetu dhugi
Qoraasee siinaqeera
Irriba jettu rafii
Haxaayee si afeera
Haati kees ni gammaddee
Erga mucaa argattee
Waaqni si haa guddisuu
Inni hunda mul'isuu
Inni xinnaa guddisuu
Inni duudaa dubbisuu
Inni qallaa furdisuu
Ururuu jennaan rafi
Ka'i jennaan dammaqi

Jedhanii urursu.



Gilgaala 6:

Shaakala faaruu daa'immanii

- A. Gaaffiiwwan armaan gadii barreeffama armaan olitti dubbiste kanarratti hunda'uun deebisi.
1. Daa'ima urursitee beektaa? Mee akkaataa itti urursitee sagalee dhageessisuun dareetti himi.
 2. Sirna Gadaa keessatti daa'imman haala kamiin iddoo argachaa turan.
 3. Urursuun daa'immaniif faayidaa maalii qaba?
 4. "Atis ni taata namaa; Sirraa haaqabu hamaa;" , yoo jettuun maal jechuu isheeti?
 5. "Waaqni si haa guddisu; Inni hundaa mul'isu, inni xinnaa guddisu inni duuda dubbisu;" , yoo jedhee ururuu kana keessatti maal ibsuu barbaadeeti?
- B. Gaaffiiwwan armaan gadii muuxannoo keefi wanta dubbisarraa argatte walitti fiduun deebisi.
1. Faaruu urursuu daa'immanii maatii kee gaafachuun barreessi dareef dhiyeessi.
 2. Saayinsiifi teeknooloojiin amayyaa aadaa daa'ima urursuu kana balleessee jiraa? Akkamitti?

Boqonnaa 16: Yeroo Yeroon Qabi

Kaayyoo: Barnoota boqonnaa kanaatiin booda:

- Yaada walaloo dubbistee himta.
- walaloo xiinxaluufi dandeettii caacculee /ruqoota walaloo adda baasta.
- faayidaafi amaloota walaloo tarreessita.
- garaagarummaafi tokkummaa walaloofi holooloo hubatta.
- ciigoo keessaa sorgoofi sokoo baasta.
- faaruu loonii qacceessita

Barannoo 1: Dubbisuufi Barreessuu



Gilgaala 1:

Shaakala Dubbisuun Duraa

- A. Walaloo armaan gadiitti dhiyaate dubbisuun dura gaaffiwwan dhiyaatan ga-reen irratti mari'adhaa
1. “Yeroon qabeenya “yoo siin jedhan dhugaadha jettaa? Maaliif?
 2. Itti fayyadamummaan yeroo naannoo keetti maal fakkaata?
 3. “Yeroo yeroon qabi” jechuun maal jechuu sitti fakkaata?
 4. Walaloon maali? Faayidaan isaa hoo?
 5. Tokkummaafi garaagarummaa walaloofi holooloo ibsi.
- B. Jechoota armaan gadii dubbisa keessatti gufuu akka sitti hin taane hiika isaanii tilmaami.
1. qayyabachuu
 2. gaabbii
 3. maayii

Yeroo Yeroon Qabi

Jiruu jedhee manaa ba'ee

Isa jiruun ala ta'ee

Har'a yeroon kan tattaafate

Utuu fiiguu bu'ee bahee
 Boruuf yaadee cimuu baannaan
 Itti dhufa gaabbiin boodaan.

Inni baratu jajjabaatee
 Waan dhufeefis akeekkatee,
 Yeroo isaatti bahuun maa'ii
 Guddifannaan fedhii hojii
 Kufee hin hafu wayi argata.
 Bakka yaades niqaqqaba.

Bu'aa yeroo qayyabatee
 Wayitii eegee facaafatee
 Dhaggeeffatee gorsa ogeessaa
 Yoo hordofe haala ammayyaa
 Isa argates quqqusannaan
 Ni badhaadha innis kanaan.

Inni hojjetus jabaachuudhaan
 Akka kanniisaa tattaafachuun
 Daldalatees innumti galu
 Jireenya isaa kan ittiin oolu
 Yeroo isaatti yoo carraaqee
 Ni guddata bakka dhaqee
 Ilmi namaa bakka hundaa
 Xiyyeeffatee kaayyoo guddaa
 Dhugaa qabee dhugaaf falmuun
 Yoo socho'e yeroo qabuun,
 Kufees, ka'ee ni argata
 Kaayyoo isaas ni guuttata.

**Gilgaala 2:****Shaakala Yeroo Dubbisuu**

A. Dubbisa armaan gadii saffisaan dubbisuudhaan gaaffiiwwan armaan gadii deebisi.

1. Walaloon kun buufata, buusaafi bo'oo meeqa akka qabu adda baasi?
2. Xiyyeeffatee _____ guddaa.
3. _____ yaades niqaqqaba.
4. _____ yaade cimuu baannaan
5. _____ isaas niguuttaata.

B. Gaaffiiwwan armaan gadii suuta dubbisuun deebii kee barreeffamaan kenni .

1. Walaloon kun barattoonni maal haa godhan jedha.
2. Hidhaa/buufata sadaffaan waa'ee maalii ibsa ? Gorsa akkamii dabarsa?
3. Hidhaa /buufata isa kamtu waa'ee gaabbii calaqqisiisa?
4. Namni tokko kaayyoo isaa galmaan gahachuuf maal gochuu qaba ?
5. Buufata/hidhaa Shanaffaan waa'ee eenyuuti ibsa? Maal haa godhan jedha?

**Gilgaala 3:****Shaakala Dubbisuun Boodaa**

Gaaffiiwwan armaan gadii muuxannoo keefi kan wanta dubbistee walitti fiduun deebii kee barreessi. Mee buufata kanneen lamaan ilaali?

Inni baratu jajjabaatee

Yeroo isaatti bahuun maayii

1. Buufanni kunniin lamaan rakkoon isaanii maal inni?
2. Buufattoota walaloo fuula 153-154 irra jiru buufata isaa lama lamaan mee ilaali, bu'aan isaa maali?
3. Bu'aa yeroo qayyabatee, wayitii eegee facaafatee. Yoo jedhu maal jechusaatii?
4. Walaloon kun jechoota muraasan yaada bal'aa dabarsuu danda'eeraa moo hin dandeenye ? Maaliif?
5. Amaloota walaloon holooloo irraa adda ta'u barreessi.
6. Ergaa waliigala walaloo kanaa keeyyata tokkoon barreessi.

Barannoo 2: Ogbarruu



Gilgaala 4:

Shaakala Qaaccessa Ergaa Walaloo

Gaaffiiwwan armaan gadii akkaataa gaafatamteen deebisi.

Fakkeenyaaf hidhaa /buufata/ 1ffaan

1. Hidhaa 1ffaa walaloo fuula 153-154 irra jiru bifa holoolootiin yemmuu barreeffamu. Dhalli namaa jiruuf jireenya isaa keessatti jireenya isaa moo'achuuf nitattaafata, kan yeroo isaa itti fayyadamee hojjate akka milkaa'uufi kan yeroo isaatti fayyadamuu hindandeenye, boruuf warri hin yaanne, booddee jireenya isaanii keessatti nigaabbu.
Hidhaawwan /buufata/walaloo armaan olii kanneen hafan hunda isaa, dhaamsa isaanii bifa holoolootiin barreessi.



Gilgaala 5:

Shaakala faaruu loonii

A. Faaruun armaan olitti dhiyaate gosa afoola Oromooti bifa walalootiin dhiyaata dhaamii isaa maal akka ta'e holooloo keeyyata lamaan ibsi.

Faaruu Loonii

Loon wayyaa

Loon wayyaa

Dibatan miidhaagsoo

Dhugan qabbaneessoo

Yoo jirani loonii

Yoo du'anis foonii

Dhugumaa loon wayyaa! (2 X)

Ishoo! ...

Eessa kee gaturee

Yaa loonii,

Ittiin sii kooru malee,

Faayidaarra si oolchu malee

Loon wayyaa (2x)

Dhugumaa loon wayyaa

Foon irbaata ta'aa

Kan ittiin bulanii

Gaafii waancaa ta'aa

Kan bunaan dhuganii

Gogaan itilleedhaa

Kan irra rafanii

Dhugumaa loon wayyaa (2x)

Ishoo! ...

B. Gaaffiiwwan armaan gadii walao faaruu loonii kanarratti hundaa'uun deebisi.

1. Akka faaruu kanaatti loon lubbuun yemmuu jiran faayidaa maal kennu?
Yeroo qalaman hoo?
2. Buufata 5ffaa fi 6ffaa faaruu kanaarraa maal hubatta?
3. Buufataalee walao kanaa keessatti kan irra deddeebi'ame isa kamii?
Maaliif irra deddeebi'an sitti fakkaata?
4. Faayidaan loonii kan geerarsa kana keessatti ibsameen ala yoo kan hafe
jiraate gareen mari'adhati dareef ibsaa.
5. Naannoo keetti faaruu Oromoo loon (saawwa) faarfatu kan dhiyaate

kanaan addaa ?Yoo adda ta'e walaloo guutuu dura sagaleen dhageessisi. Sana booda dareef barreessun dhiyeessi.

Yaadannoo: Afoola Oromoo

Ogwalaloon dhalootaa dhalootaatti jecha afaaniin kan walharkaa fuudhamaa dhufee fi amala ogummaa dandeettii dhalli namaa waa kalaquuf qabu kan calaqqisiisu, dhalli namaa yaada isaa, hawwii isaa, fedhii isaafi kkf ogummaa ittiin ibsatuudha.

Ogwalaloon dhimma hawaasummaa tokko keessatti dubbachuun, weeddisuun jecha afaaniin kan kalaqaman yeroo ta'u aadaa, duudhaa, muuxannoo, seenaafi mudannoo hawaasni tokko jiruufi jireenya isaa keessatti isa muudate kanittiin ibsatuudha. Ogwalaloo geerarsaa kan yeroo qonnaa, kan tikee, kan ayyaanaa waggaa, faaruu jaalalaa, faaruu loonii, eebbaafi kan kana fakkaatu ta'uu danda'u.

Haalumaa kanaan ogwalaloowwan armaan gadii fakkeenya afoola Oromooti.

Faaruu Jaalalaa

Ashaakiltii baala nyaatuu

Naa ergi baala waleensuu

Magaaltittii nyaara kuullee

Naa ergi waan na jabeessuu

Muree mureen mana ijaaraa

Yoo Sokorruun mana taatee

Dhufee dhufeen si ilaalaa

Jalaloo soogidda taatee

Barannoo 3: Ciigoo



Gilgaala 6:

Shaakala Ciigoo Bifa Walalootiin Dhiyaate

Ciigoowwan armaan gadii dubbisii sorgoofi Sokoo isaanii addaan baasii barreessi.

Fkn

1. Cululleen saamtuudhaa yaada hinqabdu fayyaa
Ani ishee hineeguu sinbirallee wayyaa.
A. Ciigoo : sinbirallee wayyaa
B. Sorgoo : Cululleerra sinbirroo wayya
Sokoo : Isin wajjin (isin bira wayya)
2. Osoo waa hinnyaatin torban guute agabuu
Hojjedhee akka hinnyaanne anuu quba hinqabu.
Ciigoo : quba hinqabu.
Sorgoo : qaamni koo hir'uudha
Sokoo : Odeeffannoo hinqabu (hindhageenye)
1. Akkaatuma fakkeenya armaan oliitiin ciigoo shan deebii wajjin barreessi dareef dhiyeessi.
A. _____

B. _____

C. _____

D. _____

E. _____

2. Ciigoowwan armaan gadii soorgoofi sookoo isaa addaan baasii barreessi
- A. Daadhiis ta'e farsoo hundarraa of eegaa
Qulqulluu bishaanii isa wayya dhugaa.
 - B. Hojjaa hin bulchiinaa mee fixaa bayeessaa
Waayaas mimiiccadhaa bareechaa addeessaa.
 - C. Mi'a baate malee ofii nama hin hubuu
Bakka geessu hin beeknuu inni abbaa hin qabuu.
 - D. Nuu sifoofnaan hunduu nyaachuu maal qabaree
Garuu garuu hunda caala kan barbaree.

Boqonnaa 17: Garaa Walitti Nahe

Kaayyoo: Barnoota boqonnaa kanaatiin booda.

- asoosama dubbistee isaa himta.
- hiika jechootaa akkaataa galumsaatiin addaan baafatta.
- jechamoota fayyadamuun hima ijaarta.
- malleen dubbiifi gosoota isaanii ibsita.
- sirba yeroo cidhaa sirbamu dareetti fidde sirbuun xinxalta.
- caaccullee asoosama xiinxalta.
- hiika mammaaksi kennita.

Barannoo 1: Dubbisuufi Barreessuu



Gilgaala 1:

Shaakala Dubbisuun Duraa

- A. Dubbisa armaan gadiitti dhiyaate dubbisuun dura gaaffiiwwan dhiyaateerratti gareen mari'adhaatii afaaniin dareedhaaf dhiyeessa.
1. Kitaabbilee hanga yonaatti dubbistee maqaa dhahi.
 2. Kitaabbilee dubbiste keessaa kam irra filatta? Maaliif?
 3. Asoosama dubbistee beektaa? Asoosama dubbisuun kee si gammachiise moo si gaddisiise? Maaliif?
 4. Asoosama dubbiste maqaa isaanii tarreessi.
- B. Jechoota armaan gadii osoo dubbisuu hineegaliin dura hiika isaanii tilmaami.
1. subii
 2. simboo
 3. milkii

Garaa Walitti Nahe

Guyyaan isaa guyyaa Kibxataa ganama subiidha. Abbaan Galaan kadhatee dhiisii dubbannaanuu biyya raasa. Jaarsonni inni barii ergate barraaqa qa'ee Abbaa Gaaddisaatti namaan. Osoo jaarsi quba hin qabaanne itti dhaqan. " Abjuufi milkiin waan nuuf qajeeleef mucayyoo keessan akka ilma keenyaaf kenniitaniif dhufne." Jedhan. Nama isaan ergate osoo hin himiin gara dhimmichaa seenan.

Dabaree dabareen walirraa fuudhanii nama gorora liqimse, Soorressa, xiixaa nama hedduuf dabarsseefi arjaa, nama rakkinarratti dursee nama dhaqqabu ta'uu isaa ibsan. Abbaan Gaaddisaas, " Silaa ta'ee eenyu?" jedhanii gaafatan," Abbaa Galaaniif " jedhan. " Nutis abjuu ilaaltee deebii isiniif laannaa ji'a tokko booda koottaa, "jedhanii jaarsota beellamanii gaggeessan.

Kana booda, keessumoonni erga deemanii haati Lookoo dhimmicha abbaa manaa ishee gaafatte. Yaada abbaa warraa baruuf malee silayyuu dhageessee jirti. "Dhuufuun mariin dhuufan hin xirooftu "akka jedhan san itti himan. Lamaanuu gammadanii walitti kokkolfan. Silas abbaan maqaadhumaaf beellama dheeressan malee achumatti garaatti fixan. Lamaanuu fuuluma duraafuu intalli isaanii niitii soorressa guddaa ta'uu ishee sammuutti yaadanii itti boonan. Haata'uu malee, duriyyuu warri lookoo yaada kana fakkaatu yaa hawwaniifi malee, isheen dhimma jaalala horii hin qabdu.



Lookoon cidha gaayila hiriya isheetiif asiifi achi taf-taf jetti. Badhaatuun har'a waan heerumtuuf yaannii ishee marti sana irra jira. "Qalbiin argu malee jijji hin argu, "jedhama mitii? Namni qa'ee sana dhufee fi dhiisee hin beektu. Fiigichoo har'aa kana keessa akka tasaa yaanni tokko sammuu ishee dhufe. "Bara barri jedhe kan koo maal ta'a laata? " Jettee of gaafatte. Carraa gaarii hiriya ishee irraa kaatee isa borii yaadde.

Yeroon ga'ee amaamoni fardaan hurriisee dhufe. Isaan keessaa hunda caalaa kan dheeratu Disaasaadha. Inni har'a waayila Jaatanii ta'ee waan dhaabbatu osoo hin ta'in, nama fuudhee deebi'u fakkaata. Simboon isaa har'a dhiisii duruu miidhagina isaa adda. Hanga kutaa kudhaniitti baratee qonnatti deebi'e. Humna cabsee qotuu qaba. "Amma sangaan ga'u laddaan ga'a" jedhama. Innis nimirqaana; niseesseeqas. Ilkaan isaa akka jirbii qabaan tolee addaata. Michuuwwan isaa silas, "si butanii hanbifatanii akka harka duwwaa nu hin deebifne," jedhanii itti qoosaa turan.

Qa'een warra intalaa ni hoo'a. Namoonni hedduminaan mul'atu. Weedduu haa ta'uu arrabsoo sirriitti addaan hin baafne malee sirbi qa'ee ho'isaa jira. Hamaamoonni sirbaa jira. Shamarran arrabsoo kutanii itti gadii lakkisaa jiru.

"Asooyyee sooyyee birriituu

Fardamoo Harree siibituu

Kan soddeen ittiin ejjituu

Asooyyee sooyyee birriituu

Dubrii keenya akkatti hodhaa hodhituu "jedhu.

Weedduu kana kan baastu Lookoodha. Magaallee naatoo qabeettiidha. Hojjaan ishee akka maqaa isheeti. Intala waggaa kudha saddeetii hin fakkaattu. Barumsas xiqqoo yaaltee jirti hin xumurre malee. Gar-tokkeen ija ishee waanuma ala jiru fakkaata. Ijji Disaasaa alaalaatti kan ishee irra bu'e. Jaarsonni karra seenanii amamoonni akka galu eeyyama gaafatan. "Seenaa "jedhaman shamarran sirbaa jiran garuu amaamota galuu dhorkan.

Hamaamoonni warra gurbaa shamarran tatamsaasee yemmuu seenu, haaloo arrabsoo itti bahuuf haa ta'uu dubbii barbaachiisaa hin beekamne, Disaasaan Lookoo bilcheessee qimmide. Ol jettee ija isaa keessa ilaalte. Ijaan walwaranaan. Ni seeqe. Duruu seequun isaa humna qaba. Isheenis ni qabanoofte. Bira lufe. Isaanis bakka amaamootaaf qophaa'e misirroo fudhatanii taa'an; affeerran itti fufe.

Hamaamoonni dhufee, nyaatee milkiidhaan gara ga'ee gurbaaqqitti deebi'e. Kana booda Disaasaan adamsee bakka itti tole maratti ijaan madaqsuu jalqabe. Isheenis gama isheetiin Disaasaa gaafa cidhaa agarte sammuu ishee keessatti qofa osoo hin taane laphee isheettis maxxanfamee hafeera. Kanaafis, akkuma inni ishee barbaadu isheenis isa barbaaduu ishee malaan calaqqisiisuu eegalte. Hanguma walbaraa deemaniin caalalatti waljaalataa Afaan isaanii walitti mi'aahaa dhufeera.

Kana booda itti dhimmee waa'ee ishee hordofuu eegale. Hordoffii qofa osoo hin taane jaarsa ergate. . Haa ta'u malee, mucayyoo namni umriin gita ishee hin taane akka jaarsa ergate dhagahee ture. Qabeenyaaf jedhanii mucayyoo kana fakkaattu jaarsaa kennanii waan jedhu yaadaa ture. Haa ta'u malee jaarsoliin ergaman waanuma inni dhagahe kana mirkaneessaniif.

Guyyaa tokko akka tasaa qophaatti argatee, eenyuuf akka ishee kennuuf deeman itti hime. Osoo hin beekin imimmaan fuula irra yaa'e. Waa'ee Abbaa Galaan kan dhageesse ija ishee dura dhufe. Beera lama fuudhee akka hiikeefi ijoollee afur akka qabu. Innis, mari'imaan isa raafame isa garaadhaa qabduu osoo hinbeekne," si dhabuu mannaa si fudhee baduu wayyaa, "jedhe. Akka "tole "hin jenne warra dhiibuus hin sodaatte. Akka hin dinne Jireenyi ishee Abbaa Galaanii wajjin yaadaan alaalumatti itti dukkanaa'e.

Disaasaanis laphee ishee keessa bakka afatee rafee wawarraaqe. Ishees, qalbiin bakka lamatti qoodame. Kan qabu dhiiftee isa hin qabneetti baqachuus hin sodaatte. "Abbaa fi haati koo, jaarsonni maal naan jedhu?" jette. Garuu ni murteessite; gammachuu sammuu isheetiif dursa kennite.



Gilgaala 2:

Shaakala Yeroo Dubbisuu

- A. Dubbisa armaan gadii saffisaan dubbisuudhaan gaaffiiwwan armaan gadii deebisi.
1. Mammaaks “Qalbiin arguu malee ijji hinargu “jedhu keeyyata meeqaffaa keessatti argama?
 2. Yaanni dimshaashaa dubbisa kanaa maali?
 3. Namoonni asoosama kana keessatti maqaan isaanii eerame eenyu faadha?
- B. Gaaffiiwwan armaan gadii asoosama dhiyaatee keessaa kan bahaniidha. Jechoota ykn gaaleewwan jala butamaniif akka galumsaatti hiika isaanii barreessi.
1. Innis mar’imaan isaa raafameera
 2. Afaan isaanii walitti mi’aayeera.
 3. Lookoon cidha gaayila hiriya isheetiif asiifi achi taf-taf jetti.
 4. Osoo jaarsi quba hin qabaanne itti nam’an
 5. Walharkaa fuudhanii nama gorora liqimse, sooressa xiixaa jedhanii itti himan.
 6. Shamarran arrabsoo kutanii itti gadi lakkisaa jiru.
 7. Lookoo adeemsa bakka itti tolu hundatti ijaan madaqsuu jalqabe.
 8. Disaasaan Lookoo bilcheessee qimmide?
 9. Namni umriin gita ishee hin taane jaarsa ergate.
 10. Ishees qalbiin bakka lamatti qooddame.
 11. Isheen dhimma horii jaalala calchistuuf hin qabdu.



Gilgaala 3:

Shaakala Dubbisuun Boodaa

- A. Gaaffiiwwan armaan gadii hubannoo dubbisarraa argatte irratti hundaa'uun deebisi.**
1. Dubbisa kana keessatti qabeenya moo jaalalatu olaantummaa argate? Maaliif ?
 2. Lookoon fedhii maatii isheetin ala adeemuun ishee sirriidhaa? Maaliifi?
 3. Lookoofi Disaasaa, Lookoofi maatii ishee jidduu walitti bu'iinsi jiraa? yoo waldiiddaan jiraate furmaata akkamii argate ?
 4. Asoosama kana yemmuu dubbistu qalbii kee si rarraasee jiraa? Eessarratti?
 5. Asoosama kana yemmuu dubbistu gareen ati deeggarte jira? Maaliif?
 6. Asoosama kana yemmuu dubbistu wanti si gammachiseefi sigaddisiisee jiraa? Maaliif?
 7. Keeyyanni 3ffaan asoosama kanaa ergaa maal dabarsa?
 8. Arrabsoo guyyaa cidhaa jedhamu kana akkamiitti ilaalata?
 9. Keeyyanni dhumaa asoosama kanaa waa'ee maalii calaqqisiisa?
 10. Akkaataan asoosamni kun itti barreeffameefi haalli jechoota fayyadamu isaa akkamitti ilaalta?
- B. Gaaffiiwwan armaan gadii dubbisicharratti hundaa'ii qaacceessi.**
1. Keeyyata 1ffaa keessatti Abbaan Galaan kadhatee dhiisii dubbannaan biyya raasa, yoo jedhu maal jechuusati.
 2. “Silas abbaan maqaadhumaaf beellama dheeressan malee achumatti garaatti fixan “yoo jedhu maal jechuu isaati?
 3. Adeemsi yaadaa asoosama kanaa maal fakkaata? Sababaafi bu'aa qabaa?
 4. Namfakkiiwwan asoosama kanaa keessaa kam dinqisiifatta ?Maaliif?
 5. Asoosama kana keessatti yoomessi ni mul'ataa moo hinmul'atu? Akkamitti?

6. Walitti bu'iinsi/Waldiddaan cimaan kan taasifame eenyuufi eenyu jidduutti?
7. Asoosama kana seenaa Bilillee wajjin yoo walcinaa qabdee ilaalate maaltu adda godha?
8. Barreessan asoosama kanaa asoosama kana itti hirmaate dhiyeesse moo asoosamichaan ala ta'eeti.
9. "Garaa walitti nahe", yoo jedhu maal jechuusaati?

C. Gaaffiiwwan armaan gadii dubbisa dubbistee fi muuxannoo kee walitti fiduun deebii kee barreeffaman kenni.

1. Yaanni asoosama kana keessatti dhiyaate kun jiruufi jireenya hawaasaa keessatti nicalaqqisaa ? Akkaamitti?
2. Asoosama kana keessatti himoonnifi jechoonni dhiyaatan akka gaariitti waan tokko ibsuu danda'uu? Miidhagina qabu yoo jette muraasa baasii agarsiisi.
3. Wanti sammuu namaatti kalaqamee barreeffamuufi dhugaan akka jiruutti barreeffamu maal jedhamu?
4. Sirba yeroo cidhaa naannoo keetti mana warra intalaafi warra mucaatti sirbamu barreessi dareef dhiyeessi.
5. Caacculee asoosama warren jedhaman maqaa dhahi.
6. Asoosama jechuun maal jechuudha.
7. Asoosama gabaabaafi dheeraa tokkummaafi gaaraagarummaa isaanii ibsi.

Barannoo 2: Afoola



Gilgaala 4:

Shaakala Jechamootaa

A. Jechamoota armaan gadiitti jala sararaman deebii kee barreeffaman kenni.

1. Lookoon Abbaa ishee gurra nyaatte.
2. Lookoon nyaara haaddatte
3. Disaasaan garaa bal'ata.
4. Gurbaan fuudhu Ulee jituu harkatti qabata.
5. Tolaan gara laaffisa, waan ta'eef dhimmicha nifixa.

B. Jechamoota shan barreessi hima ittiin ijaaruun hiika isaanii agarsiisi.

- A. _____
- B. _____
- C. _____
- D. _____
- E. _____

Yaadannoo

Malleen Dubbii

Hima asoosama olii keessaa bahe kana mee haa ilaallu. Ilkaan isaa akka jirbii qabaan tolee addaata. Hima kana keessatti amalli tokko amala waan biraatiin walbira qabamee ilbsameera.

Haalli kunis fakkii wanta sanaa akka gaariitti sammuu namaa keessatti uumuu danda'a 'jirbiin qabaan isaa tole,' ilkaan isaa hangam akka addaatu agarsiisa. Addeenya. Haala kanaan wanti tokko isa biraa ibsuuf “ akka maaloo, ebaluu ta'e, yookiin fakkaate' jedhamee yemmuu ibsamu akkasaa jedhama. Akkasaan fakkaattii wanta ibsu sanaa sirriitti agarsiisa. Kunis dubbii haalawaa jedhamee beekkama.



Gilgaala 5:

Shaakala Malleen Dubbii

A. Akkaatuma armaan olitti ibsameerratti hunda'uun malleen dubbii keessaa akkasaa irratti xiyyeeffaachuun himoota adda addaa shan barreessi.

- Fkn: 1. Dubbiin ishee akka dammaa mi'aawa
2. Ijji Leensaa akka bakkalcha barii ifa

1. _____
2. _____
3. _____
4. _____
5. _____

B. Gosoota dubbii qolaa /haalawaa/ keessa akkasaa fakkeenya wajjiin bartee jirta. Mee ati ammoo warroota hafaniif fakkeenya sadi sadi kenni agarsiisi.

1. Iddeessaa

- A. _____
- B. _____
- C. _____

2. Nameessaa

- A. _____
- B. _____
- C. _____

3. Arbeessaa

- A. _____
- B. _____
- C. _____


Gilgaala 6:
Shaakala Mammaaksaa

A. Mammaaksota asoosama keessa bahan kanneen hiika isaanii kenni.

1. Dhuufuun mariin dhuufan hinxirooftu.
2. Qalbiin argu malee ijji hin argu.

B. Mammaaksota armaan gadiif deebii sirrii ni ta'a kan jettu filadhu.

1. Jarjartuun _____ hin hortu.

- A. hoolaa B. ra'ee C.. sa'a D. lukkuu

2. Buddeen nama quubsu eelerratti _____

- A. furdaadha B. beeku C, nyaatu D. gubata

3. Ganna darbe _____

- A. mana hin ijaaran C. midhaan hin facaasan

- B. horii hin bitan D. marga hin bitan.

4. _____ kan hin qabne, gangee namaa tuffata.

- A. hoolaa B. harree C. sangaa D. farda

5. Kan garaa malee, kan maqaa yoom nudhibe jedhe . _____

- A. qeerransi B. leencii C. waraabessi D. sareen

6. Dubartiin fira hin qabne mana _____ baqatti

- A. abbaatti B. masaanuutti C. alagaatti D. ollattii

7. Midhaan muka dheeraa, amma _____ nyaatu.

- A. beela'aan B. quufaan C. qaqqaban D. hundeetti.

8. Midhaan warra raatuu _____ nyaatu.

- A. bonaafi gannaa B. har'aafi bor C. torbaniin D. bona bona

9. Ijoolleefi _____ ollaaa waliin gaha.

- A. ra'ee B. harree C. hoolaa D. adurree

10. Alagaa gaafa kolfaa _____ gaafa golfaa.

- A. fira B. olla C. hiriya D. dalagaa.

C. Mammaaksota 'A' jalatti kennaman waliin ergaa walitti dhiyaatu dabarsu kan jettu 'B' jala kan jiran wajjin walitti firoomsi.

- 'A'
1. Mee dura kurupheen foon haataatu.
 2. Daldala baddee gabaa haalomfatte.
 3. Kana taa'umsatti jibban kaatee namatti sirbiti.
 4. Iddoo cite dhukkuba
 5. Qunceen walgargaartee arba hiiti.

- 'B'
- A. Kan jibbantuu nama dhaala.
 - B. Utuu horiin hingaliin hattuun mooraa guutte
 - C. Akka malee ejjetanii, "Maal lafti dabaan kun" jedhu
 - D. Mixiin walqabattee laga ceeti.
 - E. Alagaa gaafa kolfaa fira gaafa golfaa
 - F. Suuqan malee soqanii hin argan

D. Ergaa mammaaksota armaan gadii barreeffamaan ibsi.

1. Akka baran osoo hin taane akka baraa bulan
2. Kan akka walii horii walitti oolfatti
3. Maqaa baduu manna mataan baduu wayya
4. Kan haqa qabu murtii hin dhabu.
5. Boru hin beekneen qodaan bukoo ishee sagali.

E. Akkaataa hanga ammaatti hubatteen, mammaaksii himoota kaan irraa kan adda taasisu maali?

Barannoo 3: Barreessuu



Gilgaala 7:

Shaakala Asoosama Gabaabaa Barreessuu

- A. Akkaataa ilaalcha mataa keetiitti haala qoddattoota armaan gadii keeyyata tokko tokko barreessi dareef dhiyeessi.
- A. Abba Galaan
 - B. Disaasaa
 - C. Lookoo
- B. Kalaqa mataa keetitiin asoosama gabaabduu tokko barreessi dareef dhiyeessi.

Boqonnaa 18: Xalayaa Barreessuu

Kaayyoo: Barnoota Boqonnaa kanaatiin Booda:

- faayidaa xalayaafi akkaataa xalayaan itti barreeffamu nihimta.
- kutaalee qaama xalayaafi qabiyyee xalayaan hammatu nihimta.
- Barreeffama keessatti bakka qub-guddeessaan barbaachisuutti fayyadamta.
- tokkummaafi garaagarummaa xalayaa hojiifi firaa qabu adda baasta.
- xalayaa barreessitee daree keessatti dhiyeessita.

Barannoo 1: Dubbisuufi Barreessuu



Gilgaala 1: Shaakala Dubbisuun Duraa

A. Gaaffiiwwan armaan gadii gareen irratti mari'adhaati dareef gabaasaa.

1. Erga mana barumsaa seentee xalayaa dhimma keetiif yookiin firaa barreessitee beektaa ?
2. Xalayaa barreessite sana mee yaadadhu, akkamiitti jalqabdee, akkamitti xumurte? Qabiyyeen isaanii hoo?
3. Xalayaa ofii keetii ykn namootaaf gara wajjiraatti barreessitee beektaa? Yoo barreessite qaama xalayaa sanarratti maal faatu hammatame jira?
4. Mana barumsaa keetiif xalayaa barreessitee beektaa?
5. Namoonni adda addaa ykn waajjiraaleen mootummaa ykn miti mootummaa xalayaa siif barreessanii beekuu? Qabiyyeefi qaamni xalayoota kanaa maal of keessatti hammatanii jiru.

B. Gaaffiiwwan armaan gadii dhuunfaan dalagi.

1. Gaaffiiwwan armaan olii irratti mari'attan kana yoo ilaalte gosoota xalayaa kam faarratti xiyyeeffata?
2. Tokkummaafi garaagarummaa xalayaa dhunfaafi hojii/Waajjiraa tarreessi.

2.1 Tokkummaa**Xalayaa dhuunfaa**

- A _____
- B. _____
- C. _____
- D _____
- E. _____

Xalayaa hojii

- a) _____
- b) _____
- c) _____
- d) _____
- e) _____

2.2. Garaagarummaa**Xalayaa dhuunfaa**

- A _____
- B. _____
- C. _____
- D _____
- E. _____

Xalayaa hojii

- a) _____
- b) _____
- c) _____
- d) _____
- e) _____

3. Xalayaan maali ?

- A. Xalayoota armaan gadii hubannoon dubbisi .

B. Fakkeenya xalayaa dhuunfaa

Kumee Irranaa
 Godina Baale
 Yuunivarsitii Madda Walaabuu
 Baalee
 Gurraandhala 15,2004

Tolosaa Qajeelaa
 Godina Shawaa Kaabaa
 Mana Barumsaa sad. 2ffaa
 Kuyyuu

Haa gahuu nageenyi koo kabajamaa hiriya koo Tolosaa Daadhii ani nagaa kooti. Tollii barnoonni akkamii? Jabaadhu, atis yoo Rabbii jedhe bara dhufu Yuunivarsiitii tokko niseenta.

Tollii, ani mudannoo hedduun qaba. Dhimma barnootaa ilaalchisee, Yuunivarsiitiin akka mana, barumsaa sadarkaa 2^{ffaa} miti. Wanta baay'eedhaan adda. Moora Yuunivarsitii keessa manni kitaabaa, kaafee (mana nyaataa), dormii, mana yaalaafi kan kana fakkaatuutu jiru. Wantoonni kun hundi barattoota tajaajiluuf kan mijataniidha. Kanaaf, jecha jireenya baay'ee namatti tola.

Haata'uu malee, waggaa jalqabaa waan ta'eef jechoonni hedduun barattoonni waggaa 2^{ffaa} fi sana olii fayyadaman hedduun isaanii nuuf haara ture faakkeenyaaf, ' Bagtaraa', 'didi maasiccaa', firash xooxaa' fi kkf jechuun iddoofi dhimmoota biroo ibsu. Wanti guddaan baay'ee natti tole Gumii Dagagiina Afaan Oromoofi Ogbarruun jiraachuu isaati . Gumiin kun aadaa Bahaa isa liixaatiin, aadaa kaabaa isa kibbaatiin, kan hunda isaanii warra jiddugaleessa Oromiyaa wajjin walbarsiisuuf gahee olaanaa qaba. Kun aadaa, seenaa, falasama saba keenyaa guddisuufi walbarsiisuuf gahee ol aanaa qaba.

Marafuu hiriyoota keenyaa warra kaanii nagaa itti naaf himi. Barnoota keetin cimi, jabaadhu.

Nageenyi siif haata'u

Hiriyaa tee kumee.



Gilgaala 2:

Shaakala Yeroo Dubbisuu

Gaaffiwwan armaan gadii dhunfaadhaan erga dubbiste booda, gareedhaan irratti mari'achuun deebisaa.

1. Ragaaleen xalayaa Kumee kana xalayaa dhunfaa taasisu maal faadha?
2. Yaanni dimshaashaa xalayaa kanaa maali?
3. Xalayaan kun kutaalee meeqa qaba? Bakki teesumni isaanii eessa?
4. Qaamonni xalayaa kanaa sirnaan taa'ee jiraa?
5. Itti fayyadamni sirna tuqaaleefi qubguddeessi xalayaa kana keessatti akkamitti ilaalta?
6. Ergaa dabarsuu barbaadde haala ifa ta'een dabarsitee jiraa ?
7. Kumeen yaada barbaachisoo ta'eerraa of qusattee jirtii? maaliif?
8. Walduraa duubaa yaada haalaan itti fayyadamtee jirtii?
9. Walqabsiisota hima tokkorraa gara hima biraatti, keeyyata tokkorraa gara keeyyata biraatti sirritti ceesistee itti fayyadamtee jirtii?
10. Ati osoo Tolasaa taatee deebii akkamiiti kumeef barreessita? Maal faarratti xiyyeeffatta?

Fakkeenya 2: Xalayaa hojii

Biiroo Barnoota Oromiyaa

Finfinnee

Lakk. 33/2/2011

Guyyaa 6/06/2011

Gaarii Turaa

Itti gaafatamaa

Barnoota sad. 2^{ffaa}

Waajjira barnoota Wallaggaa Lixaa

Dhimmi : Qacarrii Ilaala

Akkuma armaan oliitti ibsamuuf yaale barattuu Galgalee Ibsaa Yuunivarsitii Jimmaa irraa gosa barmootaa Afaan Oromoofi ogbarruutiin eebbifamte, yeroo barattoonni carraa kaasan waan rakkinni ishee qunnameef waan carraa hin kaasneef, amma garuu, carraa Kaasisnee godina keessan waan ishee dhaqqabeef gargaarsa akka gootaniif kabajaan gaafanna.

Nagaa wajjin

**Gilgaala 3:****Shaakala Dubbisuun boodaa**

Gaaffiwwan armaan gadii gareen irratti mari'adhaa.

1. Xalayaan hojii kun xalayaa dhuunfaarraa maaliin adda ta'a? Ibsi.
2. Xalayaa dhuunfaa keessatti chaappaan barbaachisaadha? Maaliif?

Yaadannoo**Xalayaa Barreessuu**

Xalayaa barreessuun dhimma ogummaafi muuxannoo gaafatuudha. Gosonni xalayootaa hedduun waan jiraniif, xalayaa barreessuun isaa kana jedhanii barreessuun baay'ee rakkisaadha, wantoota xalayaa keessatti ijoo ta'an yoo akka itti barreessan yoo barama gahaadha.

Kutaawwan xalayaa

- A. Teessoo: Teessoon xalayootaa kan barreeffamu jidduutti hiquun yoo ta'u, maqaa namicha ergamuufi, aanagoo, maqaa waajjiraa/dhaabbatichaa/ yoo namicha barreessituuf hin beekne iddoo duwwaa yookiin aangoo isaan qabaniin barreessuu. Fkn. Itti gaafatamaa human namaa .
- B. Nagaa Gaaffii
Kutaan kun iddoo itti kabajamaa Obbo Ebelu Jenne eegaluudha.
- C. Keeyyata seensa
Kutaa kana jalatti waan xalayaa barreessinuuf iddoo itti ibsinuudha yookiin dhimma barreessinuuf iddoo itti kaasnuudha.
- D. Qaama xalayaa
Kutaan kun seensa xalayaarratti hundaa'uun kan bal'achaa dhufuudha.
- E. Xumuraa xalayaa
Iddoo kanatti waan jechuu barbaaddu hunda iddoo itti jettee xumurtuudha

Hiriyaa koo/too

Jaalallee koo/too

Obboleessaa kee/Obboleettii tee

Guca Xalayaa Hiriya

Teessoo

Guyyaa

Kabajamaa /tuu

Hiriya kee/tee

Mallattoo

HUB : Xalayaan hiriya al-idileedha**Dugda ykn Qola xalayaarratti Akkaataa itti barreeffamu**

Maqaa nama

Barreessuu

L.S.P

Iddoo teessoo

Teembirii

Maqaa Namichaa

Ergamuufi

L.S.P

Bakka teessoo

Gucaa Xalayaa Hojii

Lakk. _____

Guyyaa _____

Teessoo _____
_____**Maqaa Nama Erguu**_____
_____**Maqaa Namichaa Ergamuuf**_____

Seensa _____

Qaama _____

Xumura _____

Nagaa Wajjin

Maqaafi Mallattoo _____

Barannoo 2: Barreessuu



Gilgaala 4:

Shaakala Qubguddeessaa

A. Gaaffiiwwan armaan gadii gareen irratti mari'adhaa.

1. Qub-guddeessi barreeffama keessatti gatii /faayidaa/ qabaa ?
2. Osoo qub-quddeessaaf xiyyeeffannoo kennuu baannee maaltu ta'a sitti fakkaata ?

B. Himoota armaan gadii rakkoo qubguddeessa waan qabaniif sirreessii barreessi.

1. godinni baallee iddoo hawwatan turtisitti hedduu qaba. Isaani dirree sheek huseen, sofuumar, paarkii dinshoo faadha.
2. oromoonni looga adda addaa lixatti, bahatti, kabaatti, kibbaatti jiddugaleessa Oromiyaatti haa dubbatan malee karaa salphaa ta'een waliigalu.
3. finfinneedhaa kaatee nageellee boranaa deemuuf magaalooni keessa qaxxaamurtu diikam, biishooftuu, mojoo, baatuu, shaashamannee hawaasaa alata wandoo booree adoolaa fi kkf.
4. kuusa gadoo kan barreessa gaaddisaa birruuti.
5. irreechaan Biishooturratti ummata miliyoona heddu ta'uu waggaa waggaa ji'a fulbaana keessa kabajama



Gilgaala 5:

Shaakala Xalayaa Barreessuu

Gaaffiiwwan armaan gadii haala gaafatamteen deebisi.

1. Xalayaa dhunfaa tokko barreessi dareedhaaf dhiyeessi
2. Xalayaa hojii tokko barreessi dareedhaaf dhiyeessi.
3. Mee xalayoota akka fakkeenyaatti siif kennaman kana xiinxaluun irratti mari'adhu.
4. Poostaan teessoo meeqa qaba? maalfaadha? Eessatti barreeffamu?
5. Xalayoota hiriyaa ykn maatii keetii barreeffaman fiduun xinxalii

Yaadannoo

Qubguddeessaa

Qubeen Afaan Oromoo bakka lamatti qoodama: Qubee guddaafi xiqqaadha. Isaan kun lamaan yeroo barreeffamaan akkasumas walmakanii odoo hin ta'iin seera barreeffamaa eeganiiti, Qubee guddaafi xiqqaa seera malee walkeessa makuun sirrii miti. Jechaa yookiin hima, akkasumas yaada tokko yeroo barreessinu, seera barreeffamaa eegnee quboota gosa lamaanuutti fayyadamna. Faayidaalee quboota guguddaa Kanneen armaan gadii faayidaalee gurguddaa qubguddeessati.

1. Maaqa dhuunfaa'

Fkn. Boontuu, Araarsoo

2. Biiroo, manneen hojii mootummaa, waldootaa fi kkf.

Fkn. Waldaa Qaxxaamura Diimaa

Yuunivarsitii Haroomaayaa

3. Maqaalee biyyootaa, kutaalee biyyootaa magaalaawwan, ardiilee, laggeen, tulluuwwan, haroowwanfi kkf

Fkn. Godina Baalee

Jimmaa

Madda Walaabuu

Finfinnee

4. Maqaa afaan tokkoof kenname

Fkn. Afaan oromoo

Afaan Ingiliffa

Afaan Amaraa

Afaan Sumaalee

5. Qubee jalqabaa hima haarayaa

Fkf. Ilmaan Hundee keessaa shamarran ciccimoodha.

6. Guyyoota torbanii, ji'oota waggaafi ayyaanota beekamoo

Fkn. Wixataa hanga Jimaatatti ni dalaga

Fulbaana, Amajjii, Muddee

7. Jecha jalqaba mallattoo waraabii keessa jiru. Akka Sooqoraxisiitti, “ Dhalli namaa bineeleda hawaasummaan gurmaawe “

JIBSOO

Antima (object)	kan gochi irratti raawwatamu.
Bamaqa (pronoun)	bakka maqaa bu'uun tajaajila maqaa kan kennu.
Birsaga (syllable)	wal-ta'iinsa dubbifamaafi dubbachiisaa ykn dubbachiisaa qofaan ijaaramuun sagalee ykn afuura tokkoon kan dubbifamu.
Dandeettii	dandeettii waliigalaa kan barnootaafi leenjiin ijaaramu.
Dhamjecha (morpheme)	qaama xiqqaa afaanii hiika qabeessa ta'e.
Durduubee /firoomsee/ (adposition)	dura ykn duuba gaalee maqaatti galuun wal-hidhiinsa inni garee jechootaa kanneen biroo waliin qabu agarsiisa.
Fufii (affix)	akaakuu dhamjecha hirkataa ta'ee garee jechaa kan jijjiiru ykn tajaajila caaslugaa kan agarsiisu.
Gaalee (phrase)	wal-hammannaa jechootaa kan tajaajila tokkoof dhaabatani.
Gochibsa (adverb)	gochima dura galuun gochima, maqibsafi gochibsa biroo kan ibsu.
Gochima (verb)	jecha haala ykn gocha raawwatame ykn raawwatamu tokko agarsiisu.
Haala raawwii (aspect)	tajaajila caaslugaa kan haala wanti tokko itti raawwate agarsiisu.
Hennaa (tense)	tajaajila caaslugaa kan yeroo raawwii agarsiisu.
Hennaa Ammennaa (simple present tense)	ammennaan gocha amma raawwatamaa jiru yookiin yeroo maraa dhugaa ta'e kan agarsiisu, yookiin gara fuula duraa raawwatamuuf jedhu mul'isa.
Hennaa Amsiiqaa (present continuous tense)	amsiqaan gocha hinraawwatamne yookiin yeroo gabaabaafis ta'ee yeroo dheeraadhaaf raawwatamaa jiran mul'isa.
Hennaa Darbeennaa (simple past tense)	gocha yeroo darbe keessa raawwate ykn gocha yeroo darbe keessa gocha biraa dura raawwate ykn gocha yeroo darbe keessa raawwatamaa ture ibsa.

Hennaa Keessa Tarsiiqaa gocha yeroo darbe keessa raawwatamaa ture ibsa.
(past continuous tense)

Hennaa Murannaa murannaan, gocha gara fuul-duraa raawwatamuun isaa
(simple future tense) hinoolle, garuu yeroon itti raawwatamu kan adda bahee hinbeekkamiin, ibsa.

Hennaan Murannaala murannaalaan gocha gara fuul-duraa raawwatamuu malu
(indefinite future tense) ibsa. Gochi muraannalaan ibsamu kun gara-fuulduraa raawwatamuu ykn raawwatamuu dhabuus nidanda'a.

Hennaa Raawwima gocha duraan eegalee hanga ammaatti itti fufaa jiru
A m m e e n n a a ykn gocha yeroo darbe keessaa raawwatee xumurame
(present perfect tense) garuu bu'aan isaa amma argamu/mullatu ykn gocha yeroo darbe keessa raawwatame kan yeroo raawwiin isaa hinyaadatamne/ hinbeekamne ibsuuf tajaajila.

Hennaa Raawwima gochoota yeroo darbe raawwataman keessaa gocha dursee
Darbeenna raawwatame ibsa.
(past perfect tense)

Jecha diigala / tishoo / jechoonni lamaafi isaa ol walitti dhufuun akka jecha tokkootti
(Compound word) dhaabatani hiika duraan qabanrraa hiika addaa tokko yammuu argatani.

Maqibsa (adjective) maqaa booda dhufuun waa'ee maqaa sanaa odeeffannoo dabalataa kan kennu.

Mataa gaalee(head word) dura bu 'aa gaalee sanaa jechuudha.

Mathima (subject) kan gocha raawwate ykn kan waa'een isaa dubbatamu.

Ogummaa shaakala walirraa hincinneen (akkuma bishaan daakuufi farda gulufsiisuu faa) kan gonfatamu